

EZEKIEL

Esekiel ena mata-hanai

¹ Lağoni ihatoi-ahuina ai, hua ihanina dinana iha-imana ai, lau na dauhai e hanohodia taudia bogaragidiai, sinavai ladana Kebara isena ai. Bena guba e parara; bena Dirava na mata hanailaia. ² Hua dinana iha-imana ai (una na King Iehoiaikini dauhai ai e hanohoava lağonina iha-imana lalonai), ³ Iehova ena hereva na ha-helağā tauna Esekiel, Busi natuna, enai e kau, Kaldea taudia edia tano ai, Kehara sinavaina isena ai. Iehova imana na ia latanai mia una gabu ai.

⁴ Na roha lao, bena na itaia, lai gubana ta miringini kahana amo ema, bona dagadaga ta, diari ese e hadiaria heğege, bona ia lalona amo lahi na e hururua lasi loulou, bona lahi bogaraginai ġau ta, ita-itana auri labora-labora hururu-hururuna na heto. ⁵ Bena bogaragina amo mauri ġaudia hani hetomadia e hedinarai. Ita-itadia na iniheto: oromadia na taunimanima na heheto, ⁶ a vairadia na hani hani amo, bona hanidia na hani hani amo. ⁷ Aedia na mamaoro-mamaoro; aedia palapaladia lalodia na boromakau natuna aena palapalana lalona na heto; bona e kimore-kimore, aun laboralabora na heto. ⁸ Hanidia henudiae, kahadia haniosi ai, imadia na mimia, taunimanima imadia na heheto. Hahaniosi vairadia bona anidia na iniheto: ⁹ hanidia na e hekapa hekapa heheni; hahaniosi na e raka vairava, asie hegirova. ¹⁰ Vairadia ita-itadia na iniheto:

vaira kahadia ai ta ta vairadia na taunimanima vairadia, idibadia kahadia ai hahaniosi vairadia na leona vairadia, lauridia kahadia ai hahaniosi vairadia na boromakau mamaruanedia vairadia, bona muridia kahadia ai hahaniosi vairadia na ugava vairadia. ¹¹ Vairadia na unuheto. Hanidia n; l atai ai e hetoi roro; hari mauri ġaudia ta ta hanidia rua rua e hetoi roro, bena mauri ġauna ta hanina na mauri ġauna ma ta hanina ida e hekapa heheni; a hanidia rua rua ese tau-anidia e ġovadria. ¹² Idia na ta ta e lao vaira: lauma e urava baela gabudia,unu e laova, bona laodia ai asie hegiro. ¹³ Hari mauri ġaudia bogaragidiai na ġau ta, ita-itana na gida hururu-hururudia na heheto, eiava kede na heheto, mauri ġaudia bogaragidiai e loa eva-evava. Lahi na mai hururu-hururuna, bona lahi lalona amo kevaru na e kevarua isi. ¹⁴ Bona hari mauri ġaudia na e tata eva-eva, kevaru na heto.

¹⁵ Hari mauri ġaudia na raraidia, bena ava-keikeina na tanobada ai na itaia, mauri ġaudia ta ta ediai ta ta. ¹⁶ Unu ava-keikei ita-itadia bona ikaradia dalana na iniheto: ita-itadia na krusolito* ena kiama-kiama na heto; haniosi oromadia na heheġegereġere, ikaradia dalana be e hekara ava-keikeina ta ava-keikeina ta lalonai na heto. ¹⁷ E hekei laova negana ai, ena be asie hegiro to kaha haniosi ilao-henidia mai dibadia. ¹⁸ Hari ava-keikei haniosi na mai isedia auridia kuborodia bona heto'o-tao auridia; bona isedia auridia kuborodia idoidiai na mata ai e honu. ¹⁹ Bena mauri ġaudia e loava negadia ai hari ava-keikei na idia ida e loa hebouva; bona mauri

* **1:16:** Krusolito bona gabisi na nadi hururu-hururudia ladadia.

ḡaudia na tano amo e daeva negadia ai hari ava-keikei danu e dae e laova. ²⁰ Lauma e urava bainela gabudia na idia danu e lao heniva, bona hari ava-keikei na idia ida ela; badina be hari mauri ḡaudia laumadia na ava-keikei lalodai. ²¹ Unu na e laova negadia ai, ini danu e laova; unu na e giniva negadia ai, ini danu e giniva; bona unu na tano amo e daeva negadia ai, hari ava-keikei na idia ida e daeva; badina be hari mauri ḡaudia laumadia na ava-keikei lalodai.

²² Hari mauri ḡaudia kwaradia daedai ḡau ta, ita-itana na guba na heto, e hururu-hururu gabisi na heto; kwaradia daedai e heidi roro. ²³ Hari guba henunai idia hahaniosi hanidia na e toi roro heheni; bona mauri ḡaudia ta ta na mai hanidia rua rua, tau-anidia igovalaidia ḡaudia. ²⁴ E rohova negana ai, hanidia reğedia na kamonai, sinavai momo reğedia na heheto, eiava Siahu-idoinai Diravana ena guba-rahu reğena na heto, eiava tuari oreana bada-hereana helogō-helogōna na heto. E gini negadia ai, idia ese hanidia e hakapudia. ²⁵ Bena kwaradia daedai e miava gubarta daena amo gado ta ema; idia e gini negadia ai na hanidia e hakapudia.

²⁶ Hari kwaradia daedai e miava gubana daenai na ḡau ta, terono ta hetomana, ita-itana na sapairo[†] na heto; bona hari terono hetomana ḡauna daenai na ḡau ta helaina ai na itaia, taunimanima oromana hetomana. ²⁷ Bena ia koekoena hetomana ḡauna amo e dae e laova na itaia, e hekara auri labora-labora hururu-

† **1:26:** Sapairo na nadi hururu-hururuna ta ladana.

hururuna na heto, ita-itana na lahi hekou hegegena na heto; bona ia koekoena hetomana gauna amo e diho e laova na itaia, ita-itana na lahi na heto, bona diari badana ese e gegea dae. ²⁸ Medu e dihomu dinana ai kevau na ori ai e hedinaraimu na heto, hari e hahegegea dae diarina na unuheto.

Iehova hairaina hetomana ita-itana na unuheto. Bena na itaia negana ai, lau na goru diho; bena gado ta na kamonai.

2

Esekiel iboirina

¹ Bena ia ese e hamaorogu, eto, Taunimanima natuna e, a gini tore, bena baina hereva henimu. ² Ia ese e hereva henigu negana ai, Lauma ese e rohegu bona e haginigu tore, bena ma na kamonai, e hereva henigu. ³ Ia ese e hamaorogu, eto, Taunimanima natuna e, Israel taudia dekedia na siaimumu, dagedage besena, lau e dagedage henigumu taudia, dekediai; idia bona tamadia ese vada e kara dika henigu ema bona hari ina dina ai. ⁴ Unu taunimanima danu asie matauraigumu, bona lalodia e ha-aukadiamu; dekedia na siaimumu, ba hamaorodia, baoto “Gaubada Iehova na ini e gwau tomamu”. ⁵ Bena bema kamonai eiava basiema kamonai (badina be idia na dagedage besena), to vada bae diba peroveta tauna ta na idia bogaragidiai vada ema. ⁶ Oi danu, taunimanima natuna e, idia garidia basio gari bona edia hereva basio garilaidia; ena be au ginigini bona ava ginigini na emu ai bona doadoa o helaidia taomu, to edia hereva garidia basio

gari bona edia vaira-hua basio garilaia, badina be idia na dağedağe besena. ⁷ Egu hereva ba hamaorolaidia, bena bae kamonai eiava kamonai basie ura; badina be idia na dağedağe besena.

⁸ A taunimanima natuna e, na hamaorolaimumu herevana ba kamonai: oi na basio dağedağe, una dağedağe besena na heto; udumu a hagaia, aina henimu ġauna bavania. ⁹ Bena na roha lao, ima ta na itaia, e hetoi roro henigu, bona lalonai na pepa mai revarevana helokunta. ¹⁰ Bena ia ese lau vairagu ai e hulalaia: pepa kahana kahana na mai revarevadia, unu kaha ruaosi ai herohe-ahu bona taitai bona lalo-hisihisi herevadia vada e hetore.

3

¹ Bena ia ese e hamaorugu, eto, Taunimanima natuna e, na dudui henimu ġauna na bavania; ina pepa helokuna bavania, bena baola, Israel taudia ba hereva henidia.

² Taunabunai, lau ese udugu na hagaia; bena ia ese pepa na e henigu, baina ania. ³ E hamaorogu, eto, Taunimanima natuna e, ina na henimumu pepana bavania, bogamu ba hakunulaia. Bena na ania; udugu ai e gaiho, bada-ranuna na heto.

⁴ Bena ia ese e hamaorogu, eto, Taunimanima natuna e, Israel besena dekena baola, egu hereva na ba hamaorolaidia. ⁵ Badina be idau gado aukana ta taudia dekedia asina siaimumu, a Israel besena enai; ⁶ dia bese idau-idau momo, edia gado na i'idau bona a'auka besedia, ediai. Momokani, unuhetomadia ediai bama siaimu, idia ese bema kamonai henimu. ⁷ A Israel besena ese basine kamonai henimu, badina be idia na

asie uramu lau bae kamonai henigu. Badina be Israel taudia iboudiai na vairadia e huamu bona lalodia e ha-aukamu. ⁸ A itaia, oi vairamu vada na ha-aukaia, idia edia vaira-auka davana; bona oi vairamu vada na hahuakaia, idia edia vaira-hua davana. ⁹ Vairamu vada na ha-aukaia, nadivasiga ena auka e hereaiamu nadina na heto; idia garidia basio gari bona edia vaira-hua basio garilaia, badina be idia na dağedağe besena. ¹⁰ Ma e hamaorogu, eto, Taunimanima natuna e, na herevalai henimumu herevadia iboudiai na lalomu ai bavabi dae, bona taiamu amo ba hakala henidia. ¹¹ Aola, dauhai e hanohodia taudia, emu bese taudia, dekediai, bena ba hamaorodia, baoto “Gaubada Iehova na ini e gwau tomamu”; bena bae kamonai eiava kamonai basie ura.

¹² Bena Lauma ese e abigu isi; bona Iehova hairaina na gabuna amo e tore isi negana ai tano-laga badana reğena na murigu kahana ai na kamonai; ¹³ una na mauri ǵaudia hanidia e hetomu heheni reğedia bona idia badibadidai e miava ava-keikeidia reğedia, e hekara tano-laga reğena na heto. ¹⁴ Lauma ese e abigu isi, dauha e laohaigu; laumagu siahuna iditana ai nala, badina be Iehova imana na auka, lau latagu ai. ¹⁵ Bena dauhai e hanohodia taudia dekediai na kau, Telabibi ai; idia na Kebara sinavaina isena ai e nohova. Bena unuseni ai na helai, idia bogaragidiai, laumagu na e daure ela bona dina hitu e ore.

Israel igimana tauna

¹⁶ Dina hitu e ore ai, Iehova ena hereva na egu ai e kau, eto, ¹⁷ Taunimanima natuna e, lau ese Israel besena igimana tauna ai vada na

halaomu; lau udugu herevana ta ba kamonai negadia iboudiai na lau ladagu ai do ba sisiba henidia. ¹⁸ Kara dika tauna bama hamaoroa, bama toma “Oi na vada ba mase”, bena oi basioma sisiba henia, una kara dika tauna na ena dala dikana amo ihakau-sirina bona ena mauri irauana herevadia basioma sisibalai henia, una kara dika tauna na ena dika ai baine mase; a ia rarana davana na oi imamu amo baina gwauraia.

¹⁹ A kara dika tauna boma sisiba henia, bena ia na ena kara dika amo eiava ena dala dikana amo basine raka siri, ia na ena dika ai baine mase; a oi ese sibomu emu mauri do ba rauaia. ²⁰ Ina danu, kara maoromaoro tauna ta na ena kara maoromaoIo amo bema raka siri, bena bema kara havara, bena lau ese hekwakwanai ġauna ta ia vairanai bama atoa, ia na baine mase; oi ese to sisiba henia dainai ia na baine mase, ena kara dika bagunai, bona ena kara maoromaorodia, guna ia ese e kara ġaudia, na basie lalodia tao; a ia rarana davana na oi imamu amo baina gwauraia.

²¹ Ġau tamona, oi ese kara maoromaoro tauna boma sisiba henia basinema kara dika, bena basine kara dika, ia na do baine mauri, badina be sisiba herevana na e abia dae; bena oi ese sibomu emu mauri do ba rauaia.

Peroveta tauna e mu

²² Unuseni ai Iehova imana na lau latagu ai mia. Bena ia ese e hamaorogu, eto, A tore isi, ba raka lasi, taora baola; unuseni ai baina hereva henimu. ²³ Taunabunai na tore isi, na raka lasi, taora nala; unuseni ai Iehova hairaina ginina ai na itaia, Kebara sinavaina isena ai na itaia hairaina heġereġerena. Bena na goru diho. ²⁴ A

Lauma ese e rohegu, bena ia ese e haginigu tore. Bena e hereva henigu, eto, Aola, sibomu emu ruma lalonai ba hekou ahu. ²⁵ Taunimanima natuna e, a itaia, oi na varo amo bae ġimiu, bena taunimanima dekediae basio raka lasi diba. ²⁶ Bena lau ese malamu na udumu atai maona ai baina hakapea dae; taunabunai vada ba mu, bena basio gwau henidia diba; badina be idia na dağedäge besena. ²⁷ A baina hereva henimu negana ai, udumu do baina hahāgaia, bena ba hereva henidia, baoto “Gaubada Iehova na ini e gwau tomamnu”. Kamonai e uramu tauna na baine kamonai; bona kamonai se uramu tauna na basine kamonai; badina be idia na dağedäge besena.

4

Ierusalem ikou-ahuna

¹ Taunimanima natuna e, e tunua nadina ta bavabia, vairamu ai bavatoa diho; bena ia kopina ai Ierusalem hanuana laulauna ta ba tore: ² ituari-henina ġaudia bona ikoulaina maguna bona tano senudia bona taruha bona vaġoma danu laulaudia ba tore. ³ Bena auri palakapalakana ta bavabia, auri maġuna ai bainela, oi bona hanua padamui ai; bena ba raraia tao, ikou-ahuna bona ituari-henina ba ha-aukaia. Ina na toa ta, Israel besena enai.

⁴ Bena ohemu laurina ai ba eno dere; bena lau ese Israel besena ena dika davana na oi latamu ai baina atoa; dina edehohodia ai ba eno dere na edia dika davadia latamu ai bae mia. ⁵ Badina be dina na gwaurai henimumu, dina sinahu-toi taurahanita-ahui, idia ese edia dika davadia bae

abi lağanidia heğereğeredia; nega unudaudauna na Israel besena ena dika davana latamu ai baine mia. ⁶ Unu dina ba hağugurudia, bena nega iharuana ai ma ba eno dere, a ohemu idibana ai, bena Iuda iduhuna ena dika davana na latamu ai baine mia; dina hari-ahui na gwaurai henimumu, dina ta ta be lağani ta a toadia. ⁷ Bena Ierusalem ikou-ahuna ba raraia tao, mai imamu ġagħaena Ia; bena hanua ihadikana ba perovetalaia. ⁸ A itaia, lau ese varo ai baina guimu, bena basio eno hegiro diba, ela bona emu hanua ikou-ahuna dinadia ba haguğrudia.

⁹ Ina danu, oi ese uit, bali, bini, *lentil, millet*, bona rae na bavabidia, nau tamona ai ba udadia hebou, bena igabu ba kara. Bena ohemu ai ba eno dere dinadia hidaosi, dina sinahuttoi taurahanita-ahui lalodiae bavani. ¹⁰ Bavanianina metauna ba hahetoho, sekele ruahui* dina ta lalonai; dina ta ai nega tamona mo bavaniani. ¹¹ Ba inua ranuna danu ba hahetoho, ranu hini ta ba karoaia, karoa tauratoi, bena karoa† tamona ba inua; dina ta ai nega tamona mo ranu ba inu. ¹² Bavanian, bali atagana na heto, idia vairadiai ba gabua, taunimanima taġedia kakorodia lahina latanai. ¹³ Bena Iehova na e tomu, Israel taudia adia aniani mirodiaunu bae ani toma, ediai baina luludia lao besedia bogaragidiae.

¹⁴ Bena lau nato, Ġaubada Iehova e, a itaia, lau na sibogu asina hahemiro; merogu negana amo ema bona hari ina nega sibona e mase kava ġauna

* **4:10:** Sekele ruahui = 327 grams sisivana. † **4:11:** Hini ta bae karoaia, karoa tauratoi, bena karoa ta = 1 litre sisivana.

ta eiava uda boromadia ese e darea ġauna ta asina ania, bona vamu bodagana taina na nega ta ai udugu ai se vareai.

¹⁵ Bena ia ese e hamaorogu, eto, A itaia, na gwau maoromu, amu ataga na taunimanima taġena kakorona lahina latanai basio gabua, a boromakau taġena kakorona lahina latanai ba gabua. ¹⁶ Ma e hamaorogu, eto, Taunimanima natuna e, a itaia, Ierusalem ai mauri anianina na baina abia oho; aniani metauna bae hahetohoa guna bena bae ania mai garidia ida; bona ranu na bae hahetohoa guna, bena bae inua mai kudou-hetahadia ida. ¹⁷ Unu baina kara toma, bena aniani ai bona ranu ai bae dabu, bae heroha heheni mai kudou-hetahadia ida, bona edia dika davadia daidiae taudia bae varoda.

5

¹ Taunimanima natuna e, dare ganona ta bavabia, kwaramu inauna ġauna ai ba halaoa, kwaramu ba naua bona aukimu huina bavabia; bena metau ihahetohona ġauna bavabia, hui ba karoa, karoa toi. ² Bena karoa toiosi amo karoa ta na lahi ai ba gabua, hanua bogaraginai, hanua idai-ahuna baine ore negana ai; ma karoa ta bavabia, dare amo ba tara utu-utu, hanua heġegemadai ai; ma karoa ta na lai ai ba giġiə oda-oda; bena unu muridiai lau ese dare na pauana lalona amo baina veria lasi. ³ Bona unu amo danu hui haida bavabi, emu dabua gevema ai ba turidia. ⁴ Ma unu haida danu bavabi, lahi ai ba tahodia kau, ba gabudia; bena unu amo lahi ta baine lasi Israel besena idoinai enai.

⁵ Ģaubada Iehova na ini e gwau tomamu: Ierusalem binai, bese idau-idau bogaragidiai vada na atoa, tano idau-idau ese e gegeā daemu. ⁶ A ia ese bese idau-idau vada e hereadia egu hahedua herevadia iutudia ai, bona hegegemadai tanodia vada e hereadia egu taravatu itata-utudia ai; egu hahedua herevadia vada e dadaraidia, bona egu taravatu daladia ai asie raka. ⁷ Taunabunai Ģaubada Iehova na ini e gwau tomamu: Badina be umui ese e gegemui ahumu besedia na o hereadiamu, heloōgo ahuahu ai, bona egu taravatu daladia ai asio raka bona egu hahedua herevadia asio badinadia, a e gegemui ahumu besedia edia hahedua herevadia, vada o badinadia; ⁸ una dainai (Ģaubada Iehova na ini e gwau tomamu) a itaia, lau ese na inai henimuim, bona hahemaoro karadia baina kara umui bogaragimui ai, bese idau-idau vairadiai. ⁹ Bona emui kara dikarohorohodia iboudiai daidiae lau ese nega gunana ta ai asina karaia bona nega gabena ta ai basina karaia lou karana ta baina kara henimui. ¹⁰ Taunabunai, umui bogaragimui ai tama ese natudia bae anidia, bona memero ese tamadia bae anidia; bona lau ese baina hahemaoro henimui, bona hahidaosi ba roho mauri na lai kahadia iboudiae baina gigimui rohoroho. ¹¹ Ģaubada Iehova na e tomu, Taunabunai na maurimu hegeregere, umui ese egu gabu helaġana na emui ġau dikahereadia bona emui kara dikarohorohodia amo vada o hamiroa dainai, momokani lau ese baina negemui daure; basina hageremui bona basina bogamui hisi. ¹² Emui oreia lalona amo kaha ta be dai-hanai gorerena amo bae mase bona doe

amo bae ore bogaragimui ai; ma kaha ta na dare amo bae mase emui orea hegegemadai ai; ma kaha ihatoina na lau ese lai kahadia iboudiai baina ġigidia rohoroho; bona idia muridiai dare na pauana amo baina veria lasi.

¹³ Unu amo egū badu baine ore; egū badu ġaraġarana amo baina kara henidia ela bona lalogu baine keru. Bena idia na bae diba lau Iehova na egū vageġe ai vada na hereva, egū badu garagarana na latadiai baina ha-orea negana ai. ¹⁴ Ina danu: lau ese baina haduemui, bona hesivarai ġauna ai baina halaomui, e ġegemui ahumu besedia bogaragidiai bona rakahai taudia iboudiai vairadai. ¹⁵ Umui na hesivarai bona heġonāġonalai bona sisiba bona hahegari ġauna ai baola, e ġegemui ahumu besedia ediai, lau ese baina hahemaoro henimui mai badugu bona mai lalo-siahugu bona mai hedabba aukadia ida negana ai. Lau Iehova vada na hereva. ¹⁶ Una negana ai egū doe dibadia amo baina tarakimui mamase, hahebua-tari dibadia, umui ihabua-tarimui totona baina kinodia; doe na baina habadaia loulou emui ai, emui mauri anianina na baina abia oho. ¹⁷ Lau ese doe bona uda boromadia baina siaidia vasi, umui ihadikamui totona; idia ese natumui na emui amo bae dadidia oho; dai-hanai gorerena bona rara ese bae daemui, bena dare na latamui ai baina siaia. Lau Iehova vada na hereva.

6

Peroveta herevadia Israel ororodia latadiai

¹ Iehova ena hereva na egū ai e kau, eto
² Taunimanima natuna e, Israel ororodia ba

raraidia tao, latadiai ba peroveta, ³ baoto, Israel ororodia e, Ĝaubada Iehova ena hereva a kamonai! Ĝaubada Iehova ese ororo badadia bona maraġidia, koura dobudobudia bona kourakoura na ini e gwau henidia tomamu: A itaia, lau ese dare na latamui ai baina hadihoa, bona emui atai gabudia helāġadīa baina habuadia tari. ⁴ Emui ihaboulaina patadia bae vahu, emui muramura mai bonadia patadia bae heġiġi dobi, emui mase taudia na emui kaivakuku vairadiae baina tahodia dobi. ⁵ Israel taudia na masedia ai baina hahekidadia diho, edia kaivakuku vairadiae; bona turiamui baina ġigidia rohoroho, emui ihaboulaina patadia hegegemadai ai. ⁶ Emui noho gabudia iboudiai lalodiae emui hanua bae vahu bona emui atai gabudia helāġadīa bae heġiġi dobi; emui ih-aboulaina paladia bae vahu bona bae heġiġi dobi; emui kaivakuku bae makohi bona bae hebua tari; emui muramura mai bona dia patadia bae heġiġi dobi bona emui ġaukara anidia bae boio. ⁷ E aladiamu taudia na bogaragimui ai bae hekida diho; bena ba diba lau na Iehova.

⁸ A umui haida na maurimui ai baina rakatanimui. Dare amo bae roho mauri taudia haida na bese idau-idau bogaragidiae bae noho, bona tano idau-idau ai ba karoho rohoroho negana ai, ⁹ umui roho-mauri taumui hahidaosi ese lau ba lalogu tao, iguimui ai bae laohaimui besedia bogaragidiae. Bona mai lebulebudia ida vada e rakatanigu taudia na lalodia baina gugubadia, bona mai lebulebudia ida edia kaivakuku e gavadiamu taudia na matadia baina hakepuludia negana ai, idia na sibodia bae hedadarai, edia

kara havara bona edia kara dika-rohorohodia iboudiai daidai. ¹⁰ Bena idia na bae diba lau na Iehova; ini baina karadia toma nato negana ai na asina hereva kava.

¹¹ Gaubada Iehova na ini e gwau tomamu: Imamui ba pata bona aemui ba pana dagu, baoto, Madi ihabaida! Israel besena ena kara dika-rohorohodia iboudiai daidai; badina be dare bona doe bona dai-hanai gorerena amo bae mase. ¹² Gabu daudau ai e nohomu tauna na dai-hanai gorerena amo baine mase; bona gabu kahikahina ai e nohomu tauna na dare amo baine mase; bona do noho maurina tauna na doe amo baine mase. Unuhetomana egu badu-ğarağara baina ha-orea idia latadiai. ¹³ Bena edia mase tau-dia na edia kaivakuku bogaragidiai bae hekida diho, edia ihaboulaina patadia hegeğemadai ai, bona ororo latalatadia iboudiai latadiai, bona ororo badadia iboudiai doridia ai, bona au mau-ridia iboudiai bona *oak* audia urumo-urumodia iboudiai henudiae, muramura mai bonadia edia kaivakuku e gabu henidia gabudia iboudiai lalo-diae; una negana ai ba diba, lau na Iehova. ¹⁴ Lau ese imagu baina toia roro, idia ihadikadia totona, tano baina habuaia tari bona baina havahua, edia noho gabudia iboudiai lalodiai, tano ğagæna amo ela bona Ribla. Bena bae diba lau na Iehova.

7

Nega dokona

¹ Iehova ena hereva na egu ai e kau, eto,
² Taunimanima natuna e, Ğaubada Iehova ese Israel tanona na ini e hamaorolaia tomamu: Dokona binai! Dokona vada e kau, tano dai-gunina haniosi latadiai. ³ Harihari dokona na

oi latamu ai vada e kau, egu badu na oiemu ai baina hulalaia, bona emu kara heğereğeredia ai baina hahemaoro henimu, emu kara dika-rohorohodia iboudiai davadia do baina henimu. ⁴ Lau ese basina hageremu bona basina bogamu hisi; a emu kara davadia baina henimu, emu kara dika-rohorohodia na doini bogaragimu ai mimia negana ai. Bena ba diba, lau na Iehova.

⁵ Čaubada Iehova na ini e gwau tomamu: Dikadika ta murinai na dikadika ma ta! A itaia, ia na vada e maimu. ⁶ Dokona vada e kau, dokona korikori vada e kau; anina na emu ai vada hedinarai. A itaia, ia na e maimu!

⁷ Tano inoholaina taumu e, emu ai baine kau ġauna vada e kau; negana vada eme kau; helogo-ahuahu dinana vada eme kahikahi, dia moale lolodia dinana ororo latadiai. ⁸ Asi vanahana egu badu ġarāgarā na latamu ai baina bubua, egu badu na emu ai baina ha-oreea, bona emu kara heğereğeredia ai baina hahemaoro henimu; bena emu kara dika-rohorohodia iboudiai davadia baina henimu. ⁹ Basina hageremu bona basina bogamu hisi; emu kara davadia baina henimu, emu kara dika-rohorohodia na doini bogaragimu ai mimia negana ai. Bena ba diba, lau na Iehova, herahu-mase Diravana.

¹⁰ A itaia, dinana binai! A itaia, ia na e maimu! Emu ai baine kau ġauna na vada e kau; kara gageva-gageva vada e papa, hekokoroku vada e gara kau; ¹¹ dağedağe vada e tubu, kara dika vada e tubu kau. Idia ta basine noho; edia kohu-momo bona edia tağā basie mia; bona idia bogaragidiai ta basine herea. ¹² Negana vada e kau, dinana vada eme kahikahi. E hoihoimu tauna basine

moale, bona kohu e hoiholaimu tauna lalona basine hisihisi, badina be badu ġaraġara na edia-hotuhotu iboudiai latadiai. ¹³ Badina be kohu e hoiholaimu tauna ese e hoilaia kohuna basine lou henia, edia mauri dinadia iboudiai. Badina be badu ġaraġara na edia hotuhotu iboudiai latadiai, bona basine heabi oho. Ena kara havara dainai tau ta ese sibona ena mauri basine rauaia diba.

¹⁴ Kibi vada e hiriria, ġau iboudiai vada e hegaelgaelai; a ta na tuari se laomu, badina be egu badu na edia hotuhotu iboudiai latadiai. ¹⁵ Murimuri ai na dare; laloma ai na dai-hanai gorerena bona doe. Tano paka ai e nohomu tauna na dare ai e masemu; hanua ai e nohomu tauna na doe bona dai-hanai gorerena ese e hamaseamu. ¹⁶ Haida bema roho mauri, idia na ororo ai bema noho, koura punedia na hehetu; iboudiai na bae ġanaġana, ta ta ena kara havara ena kara havara daidiai. ¹⁷ Ima iboudiai na e mamanomu; tui iboudiai na e heroġe-herogemu, ranu na heto. ¹⁸ Puse dabuadie e riomu, gari ese e hahonudamu; iboudiai vairadia e hemaraimu, iboudiai kwaradia e naudiamu. ¹⁹ Edia *silver* na ariara ai e negeamu, bona edia *gold* na ġau mirona na heto. Iehova ena badu-ġaraġara dinana ai, edia *silver* bona edia *gold* ese basie hamauridia diba; edia hitolo basie ha-orelai diba, bona bogadia basie hakuñulai diba. Badina be una na ihahekwickwanailaidia ġauna edia kara havara ai. ²⁰ Edia herahera mai hairaidia e heagilai, bona edia kaivakuku dika-rohorohodia bona edia ġau dika-hereadia na unu amo e karadia; taunabunai lau ese ġau mirona ai baina halaoa idia ediai. ²¹ Lau ese idau taudia imadia ai baina atoa, idia damu-

dia ai bainela, bona tanobada ena taunimanima dikadia baina henidia, idia dinadia ai bainela; bena idia ese bae hamiroa. ²² Bena idia edia amo baina mede daudau, egu gabu ġoева-даена na bae hamiroa totona; dadidadi taudia ese ia lalonai bae raka vareai, bae hamiroa, ²³ bona bae havahua.

Badina be tano na rara-hebubu kara dikadia ai e honumu, bona hanua na ala-ala ai e honumu. ²⁴ Bese dika-hereadie baina mailaidia, edia rum a bae ġaunaidia; edia goada, e heaġilaiamu ġauna, baina ha-oreu; edia gabu helaġadie bae hamirodia. ²⁵ Lalo-hisihisi bada baine kau negana ai, idia ese maino bae tahua, to basie davaria. ²⁶ Dikadika na dikadika latanai e kaumu; hari lahuluhuna ta na hari lahuluhuna ta murinai e maimu. Mata-hanai na peroveta tauna enai e tahuamu; a taratvatu na hahelaġa tauna enai e boiomu, bona hahealo na hanua tau-badadia ediai e oremu. ²⁷ Hanua pavapavana e taitaimu; hanua lohiana darana e dokomu; bona tano taudia imadia na e hedabarai, gari dainai. Idia edia kara heġereġerena ai baina kara henidia, bona idia edia hanemaoro herevadia heġereġeredia ai baina hahemaoro henidia; bena bae diba, lau na Iehova.

8

Ierusalem ena kara dika-rohorohodia

¹ Laġani ihatauratoina huana ihatauratoina dinana iha-imana lalonai, lau ese egu rum a i na helaiva; bena Iuda tau-badadia na lau vairagu ai e helaiva ai na Ġaubada Iehova ese imana na lau latagu ai e atoa kau. ² Bena na roha isi, ġau

ta na itaia, ita-itana taunimanima na heto; ia koekoena hetomana ġauna henunai na lahi, bona koekoena daenai na diari-diari hetomana, auri laboralabora hurwu-hururuna na heto. ³ Ima hetomana ġauna ta e toia lasi, doboraġigu ai e abigu; bena Lauma ese e abigu isi, tanobada bona guba padadiai, bena Dirava imata-hanailaina ai Ierusalem e laohaigu, ela bona laloma maguna ikoukouna raka-vareaina, mirigini kahana e vaira henia ġauna; unuseni ai vaġeġe kaivakukuna, vaġeġe e havaraiamu ġauna, ena gini gabuna e miava. ⁴ Na itaia danu, Israel Diravana hairaina na unuseni ai, taora ai mata-hanai ai na itaia heġereġerena.

⁵ Bena ia ese e hamaorogu, eto, Taunimanima natuna e, a gaga isi, mirigini kahana ba roha henia. Bena na gaga isi, mirigini kahana na roha henia, na itaia, ihaboulaina patana ikoukouna mirigini kahana ai, raka-vareaina ai, hari vaġeġe kaivakukuna na mia. ⁶ Bena ia ese ma e hamaorogu, eto, Taunimanima natuna e, idia na ede e kara tomamu o itaiamu a? Kara dikarohoroho bada-hereadie, Israel besena ese egu gabu helāġana amo bae lulugu oho helaoreana ai e karamu ġaudia, o itadiamu a? A kara dikarohorohodia haida, ini kara e hereadiamu ġaudia, na do ba itadia.

⁷ Bena ma e laohaigu, maġu ikoukouna badibadinai, bena na gaga isi, mauru ta magu ai na itaia. ⁸ Bena ia ese e hamaorogu, eto, Taunimanima natuna e, maġu ba hamaurua. Magu na hamaurua, bena iduara ta na itaia. ⁹ Bena ia ese e hamaorogu, eto, A raka vareai,

kara dika-rohoroho badahereadia unuseni ai e karamu na ba itadia. ¹⁰ Bena na raka vareai, na roharoha; unuseni ai e raumu ġaudia idau-idau bona boroma dika-rohoroho-lia bona Israel taudia edia kaivakuku iboudiai laulaudia na haba ai vada e tore. ¹¹ Unu laulau vairadiae Israel tau-badadia hitu-ahui e gini, bona Iaasania Safana na bogaragidiai e gini. Idia ta ta mai edia gida keberedia imadia ai, bona muramura mai bonana, e gabua ġauna, kwalahuna e daeva, ori na heto. ¹² Bena ia ese e hamaorogu, eto, Taunimanima natuna e, Israel tau-badadia na dibura ai ede e kara tomamu, ta ta ena laulau daiutuna ena laulau daiutuna lalodiae, vada o itaia a? Badina be idia na e tomu “Iehova ese se itadamu; Iehova ese tano vada e rakatania”. ¹³ Ia ese ma e hamaorogu, eto, Kara dika-rohorohodia haida, ini kara e hereadiamu ġaudia, idia ese e karamu na do ba itadia.

¹⁴ Bena ia ese Iehova ena dubu mirigini kahana ikoukouna raka-vareaina e laohaigu; unuseni ai hahine haida na itadia, e helaiva, Tamusu* taina e taiya. ¹⁵ Bena ia ese e hamaorogu, eto, Taunimanima natuna e, ina na vada o itaia a? Kara dika-rohorohodia haida, ini kara e hereadiamu ġaudia, na do ba itadia.

¹⁶ Bena ia ese Iehova ena dubu ena laloma maġuna lalonai e laohaigu. Iehova ena dubu helāġana vairanai, dehe toi-lasi rumana bona ihaboulaina patana padadiai, taunimanima ruahui-imma sisivana e gini; Iehova ena dubu

* **8:14:** Tamusu na bese gunadia haida edia dirava; e laloa ia na laġani ta ta amo keru negana ai e mase bena siahу negana ai ma e mauri lou, edia taitai bona edia ġuriġuri daidai.

helağana e muri henia bona mairiveina kahana e vaira henia, dina e toma henia dihova mairiveina italaina ai. ¹⁷ Bena ia ese e hamaorogu, eto Taunimanima natuna e, ina na vada o itaia a? Iuda besena taudia ese hari kara dikarohorohodia iniseni ai e karamu na ġau pipikina a, una dainai idia ese tano na daġedāġe amo e hahonuamu, bona e habadugu hereamu? A itaia, idia ese ududia mukurodia e kara. ¹⁸ Taunabunai, lau ese badu ġaraġara karadia baina kara; basina haġeredia bona basina bogadia hisi; ena be taiagu ai bae tai mai gao badadia ida, to basina kamonai henidia.

9

Kara dikka taudia iala-masedia

¹ Bena ia ese taiagu ai e lolo, mai gao badana ida, eto, Hanua ihabua-tarina taumui e, a raka kahira, ta ta mai emui ala-ala ġaudia imamui ai.

² Bena na itaia, tatau tauratoi na atai ikoukouna, mirigini kahana e vaira heniamu ġauna, kahana amo ema, ta ta mai edia ala-ala ġaudia imadia ai. Ma tau ta danu idia ida ema; ia na dabua aukana e hahedokilaia, toretore ġaudia vainana danu e daharaia. Bena idia na e raka vareai, ihaboulaina patana, auri labora-labora ġauna, badibadinai e gini.

³ Una negana ai Israel Diravana hairaina na kerubi daedia, vaia e miava gabuna, amo e dae, dubu raka-vareaina e lao henia; bena ia ese hari dabua aukana e hahedokilaia bona toretore ġaudia vainana e daharaia tauna na e boi henia.

⁴ Iehova ese e hamaoroa, eto, Ierusalem hanuana ba rakaia hanai, kara dikarohorohodia iboudiai,

hanua lalonai e karamu, na e taitailaidiamu bona e ġanāġanalaidiamu taudia bagudia ai toa ba kara. ⁵ Bena na kamonai, ia ese unu haida e hamaorodia, eto, Ia murinai hanua ba rakaia hanai, bavala-ala; basio haġeredia bona basio bogadia hisi; ⁶ iahu bavaladia mase, bona uhau, ulato, memero, kekeni, bona hahine danu; a baguna mai toana tauna ta basio daua toho. Egu gabu helāġana amo ba matamaia. Taunabunai idia ese unu hanua tau-badadia dubu vairanai nohodia ediae e matamaia.

⁷ Bena ia ese ma e hamaorodia, eto, Dubu ba hamiroa, bona maġudia na mase tau-anidia amo ba hahonudia. A raka lasi! Taunabunai, idia na e raka lasi, hanua na e daea. ⁸ Idia e daea negana ai, lau na sibogu na nohova, bena na goru diho, na tai, nato, Ĝaubada Iehova e, emu badu ġaraġara Ierusalem latanai iseina ai na Israel orena idoinai ba habuadiah tari a?

⁹ Bena ia ese e hamaorogu, eto, Israel bona Iuda besedia edia kerere na bada herea; tano na rara ai e honumu, bona hanua na hahemaoro karadia gageva-gagevadia ai e honumu. Badina be idia na e tomu “Iehova ese tano vada e rakatania; Iehova na se heitamu”. ¹⁰ A lau be basina haġeredia bona basina bogadia hisi, a edia kara heġereġeredia ai na tubuadiah ai baina kara.

¹¹ Bena hari dabua aukana e hahedokilaia bona toretore ġaudia vainana e daharaia tauna ese hereva ma e loulaia, eto, O haġanilaigu heġereġerena ai vada na karaia.

10

Iehova hairaina ese ena dubu e rakatania

¹ Bena na roha lao, na itaia, kerubi daedai, unu kerubi daedia gubana ai, ġau ta e hedinarai, sapairo* nadina na heto, oromana na terono ta hetomana. ² Bena ia ese hari dabua aukana e hahedokilaia tauna e hamaoroa, eto, Hari e hegiro-hegiromu ava-keikeidia bogaragidai baola, kerubi henudiai, imamu ruaosi na gida hururu-hururudia amo ba hahonudia, kerubi bogaragidai; bena hanua latanai ba peta-dia rohoroho.

Bena ia na lau vairagu ai e raka vareai. ³ Hari kerubi na dubu diho kahana ai e giniva, una tau e raka vareai negana ai; bona ori ta ese laloma maġuna e hahonuava. ⁴ Bena Iehova hairaina na kerubi edia amo e dae lao, dubu raka-vareaina e lao henia; ori ese dubu e hahonua, bona Iehova hauaina diaridiarina ese maġu e hahonua. ⁵ Kerubi hanidia hudia na murimuri maġuna ai e kamonai; unu hu na Siahu-idoinali Diravana gadona, e herevamu negadia ai, na heto.

⁶ Bena ia ese hari dabua aukana e hahedokilaia tauna e hagania eto “Lahi na e hegiro-hegiromu ava-keikeidia padadia amo bavabia, kerubi bogaragidai” negana ai, ia na ela, ava-keikei ta badibadinai e gini. ⁷ Bena kerubi ta ese imana e toia roro, hari kerubi bogaragidai e arava lahina amo gida e abi, una dabua aukana e hahedokilaia tauna imana ai e ato; bena una tau ese e abi, e raka lasi. ⁸ Hari kerubi hanidia henudiai na ġau ta, ita-itana na taunimanima imana hetomana.

⁹ Bena na roha lao, ava-keikei hani na itadia

* **10:1:** Sapairo na herahera nadina ta ladana.

unu kerubi badibadidiai; ava-keikei ta ta kerubi ta ta badibadidiai. Hari ava-keikei ita-itadia na krusolito[†] nadidia kiama-hamadia na heheto. ¹⁰ Haniosi ita-itadia na hegeregere; oromadia na tamona, ava-keikei ta ava-keikei ta lalonai na heto. ¹¹ E hekei laova negana ai, ena be asie hegiro to kaha haniosi ilao-henidia mai dibadia, a edena kaha ai vaira ava-keikeina ese e vaira henia, murina kahana gaudiā na ia murnai ela, bona laodia ai asie hegiro. ¹² Isedia auridia kuborodia bona ito'o-tao auridia bona ava-keikei na mata ai e honu, kerubi hahaniosi ava-keikeidia bunu. ¹³ Na kamonai, unu ava-keikei na e gwauraidia “E hegiro-hegiromu ava-keikeidia”. ¹⁴ Idia ta ta vairadia na hani: vaira gini-gunana na kerubi vairana; vaira iharuana na tau vairana; vaira ihatoina na leona vairana, bona vaira ihahanina na ugava vairana.

¹⁵ Hari kerubi na e dae ela; idia na unu mauri gaudiā, Kebara sinavaina isena ai na itadia gaudiā. ¹⁶ Bena kerubi e laova negadia ai na hari ava-keikei danu idia badibadidiai e laova; bena kerubi ese hanidia e idi roro, tano amo bae roho isi totona, negadia ai, hari ava-keikei na idia badibadidia amo asie hekei oho. ¹⁷ Idia na e gini negadia ai, unu danu e gini; bona idia na e dae negadia ai, unu danu e dae; badina be unu mauri gaudiā laumadia na idia lalodiae.

¹⁸ Bena Iehova hairaina na dubu raka-vareaina amo e raka lasi, kerubi daediae e miava. ¹⁹ Bena kerubi ese hanidia e idi roro bona raka lasidia ai tanobada amo e dae ela, lau vairagu ai; bona ava-keikeidia na idia badibadidiai. Bena idia

† **10:9:** Krusolito na herahera nadina ta ladana.

na Iehova ena dubu mairiveina kahana ikoukouna iduarana enai e gini; bona Israel Diravana hairaina na idia daediai.

²⁰ Unu mauri ġaudia Israel Diravana henunai na itadia ġaudia, Kebara sinavaina isena ai; bona na diba idia na kerubi. ²¹ Idia ta ta vairadia na hani hani amo, bona hanidia danu na hani hani amo, bona hanidia henudiai na ġau haida, ita-itadia na taunimanima imadia hetomadia. ²² Vairadia ita-itadia na Kebara sinavaina isena ai na itadia ġaudia vairadia ita-itadia heġereġeredia. Idia na ta ta e lao vaira.

11

Israel lohiadia igwau-henidia

¹ Bena Lauma ese e haheabigu isi, Iehova ena dubu mairiveina kahana ikoukouna, mairiveina kahana e vaira henia ġauna, e laohaigu. Hari ikoukou iduarana ai tatau ruahui-ima na itadia, bona idia bogaragidiae laasania Asuru bona Peltaia Benaia, bese lohiadia, na itadia. ² Bena ia ese e hamaorogu, eto, Taunimanima natuna e, kara havara e lalo hatamu, bona hahealo herevadia dikadia ina hanua lalonai taunimanima e hamaorolaidiamu taudia bini. ³ Idia na e tomu, Ruma ihaginidia negana na do se kahikahi; ina hanua na vamu inadulaina urona, bona vamu na ita. ⁴ Taunabunai, idia latadiet ba peroveta; taunimanimanatuna e, ba peroveta.

⁵ Bena Iehova ena Lauma ese e rohegu; bona ia ese e hamaorogu, eto, A hereva, agowa, Iehova ini e gwau tomamu: Israel besena e, umui na ene o laloa tomamu; badina be lalo-hadai dahaka dahaka lalomui ai e varamu na dibagu. ⁶ Emui

mase taudia vada o hahutumadia ina hanua ai, bona ariarana na vada e aladia taudia ai vada o hahonudia. ⁷ Taunabunai, Ģaubada Iehova na ini e gwau tomamu: Emui mase taudia, hanua bogaraginai vada o atodia, idia na vamu, bona ina hanua na inadulaidia urona; a umui na bogaragina amo bae hakaumui lasi.

⁸ Ģaubada Iehova na e tomu, Dare garina vada o gari; bena lau ese dare na latamui ai baine mailaia. ⁹ Ia bogaragina amo baina hakaumui lasi, bona idau taudia imadia ai baina atomui, bona hahemaoro karadia baina kara henimui. ¹⁰ Dare ese baine alamui, bona lau ese Israel tanona hetoana ai baina hahemaoro henimui; bena ba diba lau na Iehova. ¹¹ Ina hanua na emui uro ai basinela, bona umui na vamu ai basiola ia lalonai. Israel tanona hetoana ai baina hahe-maoro henimui, ¹² bena ba diba lau na Iehova; badina be egu taravatu daladia ai asio raka, bona egu hahedua herevadia asio badinadia, a e ġeġemui dae besedia edia hahedua herevadia heġereġeredia ai vada o kara.

¹³ Bena lau na perovetava lalonai Pelatia Benia e mase. Bena na goru diho, na lolo badabada, nato, Ģaubada Iehova e, Israel kwabuk-wabudia ba ha-oredia vaitani a?

Nega matamatana do bainema

¹⁴ Iehova ena hereva na egu ai e kau, eto: ¹⁵ Taunimanima natuna e, tadikakamu, tadikakamu korikori, oi ida gabu daudau ai vada e hanohodia taudia, Israel besena idoinai, ena taunimanima iboudiai, na Ierusalem inoholaina taudia ese vada e herevalaidia, eto, Idia ese Iehova vada e rakatania, dauha vada ela; ina

tano na ita vada e henida, baita ġaunaia totona.

16 Taunabunai oi na baoto, Ġaubada Iehova na ini e gwau tomamu: Ena be dauha na laohaidia, bese idau-idau bogaragidiai, ena be tano idau-idau lalodiai na hakarohodia rohoroho, to vada ela tanodia lalodiai lau na edia gabu helāgāna ina nega hekada hanai.

17 Taunabunai baoto, Ġaubada Iehova na ini e gwau tomamu: Bese idau-idau bogaragidia, amo baina hahegogomui, bona tano idau-idau, lalodiai vada e hakarohomui tanodia, amo baina haheboumui, Israel tanona na baina henimui. **18** Benaunu baela negana ai, idia ese ġau dika-hereadiah iboudiai bona ena kara dikarohorohodia iboudiai na iena amo bae abidia oho. **19** Bena lalodia na baina hatamonadia, bona lauma matamatana na idia lalodiai baina atoa; lalo-auka na idia lalodia amo baina abia oho, Ialo-manada baina henidia. **20** Bena egu taravatu daladia ai bae raka bona egu hahedua herevadia bae badinadia bona karadia bae kara, idia na lauegu bese taudia ai baela, bona lau na edia Dirava ai bainala. **21** A lalodia ese edia ġau dika-hereadiah bona edia kara dikarohorohodia e ura henidiamu taudia be lau ese edia kara davadia na tubuadia ai baina haloudia. Ġaubada Iehova na e herevamu.

22 Bena kerubi ese hanidia e idi roro, mai ava-keikeidia idia badibadidiai, bona Israel Diravana hairaina na idia daediai. **23** Bena Iehova hairaina na hanua bogaragina amo e dae, hanua mairiveina kahana ororona ai e miava. **24** Bena Lauma ese e haheabigu isi, bona Dirava ena Lauma mata-hanaina lalonai Kaldea e laohaigu, unuseni ai vada e hanohodia taudia dekediai.

Bena hari mata-hanai, na itaia ġauna, ese e rakatanigu. ²⁵ Bena Iehova ese vada e haheita-laigu ġaudia iboudiai na lau ese unuseni ai vada e hanohodia taudia na hamaorolaidia.

12

*Esekiel ese Israel iabi-mauridia e
haheġereġerea*

¹ Iehova ena hereva na egu ai e kau, eto:
² Taunimanima natuna e, oi ese gwau-edede besena bogaraginai o nohomu. Idia na mai mata-dia, ġau bema ita, to ġau ta asie itaiamu, bona mai taiadia, hereva bema kamonai, to hereva ta asie kamonaimu; ³ badina be idia na gwauedede besena. Taunabunai, taunimanima natuna e, dauhai bae hanohoa tauna ena laolao kohuna heġereġerena ai bavabia heġaeġae, bena dina ai dauhai bae hanohoa tauna heġereġerena ai ba raka lasi idia vairadiai; dauhai bae hanohoa launa na heto emu gabu amo baola, ela bona ma gabu ta, idia vairadiai. Ena be idia na gwauedede besena, to readia lalodia bae parara.
⁴ Dina ai emu laolao kohuna ba lasilaia idia vairadiai, dauhai bae hanohoa tauna ena laolao kohuna na heto, bona adorahi ai idia vairadiai ba raka lasi, dauhai bae hanohodia taudia na heheto. ⁵ Idia vairadiai rumu habana ba hamaurua, bona mauruna amo ba rau lasi. ⁶ Idia vairadiai laolao kohuna na bavabia isi paġamu ai, bona dibura ai ba huaia lasi; vairamu ba ġovacia, tano basio itaia helaoreana; badina be lau ese toa ta ai vada na halaomu, Israel besena enai.

⁷ Bena e haġanigu heġereġerena ai na karaia. Dina ai egu laolao kohuna na lasilaia, dauhai

bae hanohoa tauna ena kohu na heto; bona adorahi ai lau sibogu imagu amo ruma habana na hamaurua, dibura ai na rau lasi, egu laolao kohuna na paḡagu ai na huaia lao, idia vairadiai.

⁸ Daba ai Iehova ena hereva na egu ai e kau, eto: ⁹ Taunimanima natuna e, Israel besena, gwau-ededebe besena, e nanadaimu, eto “Dahaka o karamu?”, ani? ¹⁰ Ba hamaorodia, baoto, Čaubada Iehova na ini e gwau tomamu: Ina hereva Inetauna na Ierusalem lohiana dainai, bona Israel besena taudia ia lalonai e nohomu iboudiai daidiae. ¹¹ Ma baoto, Lau na toa ta emui ai; lau vada na karaia heğereğerenai ai, unu bae kara henidia toma; idia na dauhai bae hanohodia mai iğuidia ida. ¹² Bena lohia tauna idia bogaragidiai ese ena laolao kohuna na pagana ai baine abia isi, dibura lalonai, bena baine huaia lao. Ia ese ruma habana baine hamaurua, bena mauruna amo baine rau lasi; ia ese vairana baine ġovaiia, ia matana amo tano basine itaia helaooreana. ¹³ Egu huo baina otoa ia iabina, bona egu idoa ai baina idoaia; Babulono, Kaldea tanona ai, baina laohaia; ġau tamona, ia ese basine itaia, ia na unuseni ai baine mase. ¹⁴ Ia bamona iboudiai, iduruna taudia bona ena tuari taudia iboudiai, na lau ese baina hakarohodia, lai kahadia iboudiai baela; bona dare na iudalaina ġauna amo baina veria lasi, idia muridia amo. ¹⁵ Bena bese idau-idau bogaragidiai baina luludia lao, bona tano idau-idau lalodiae baina hakarohodia negana ai, idia na bae diba, lau na Iehova. ¹⁶ A idia kwabukwabudia haida na dare bona daihanai gorerena bona doe amo baina harohodia mauri, bena bae lao heni besedia bogaragidiai

edia kara dikarohorohodia iboudiai na bae gwaurai hedinarai, bona bae diba lau na Iehova.

¹⁷ Iehova ena hereva na egu ai ma e kau, eto: ¹⁸ Taunimanima natuna e, amu bavania mai kudou-hetahamu ida, bona ranu ba inua mai heudeheudemai bona mai garimu ida, ¹⁹ bona tano taudia na ba hamaorodia, baoto, Ģaubada Iehova ese Ierusalem inoholaina taudia Israel tanona lalonai na ini e herevalaidia tomamu: Adia bae ani mai garidia ida, bona ranu bae inu mai kudou-hetahadia ida, badina be edia tano anina idoinai baine heabi oho vaitani, e noholiamu taudia iboudiai edia dağedäge dainai. ²⁰ E noholaidiamu hanuadria na bae vahu, bona tano na tano ġagħaena ai baine hahelao; bena ba diba, lau na Iehova.

²¹ Bena Iehova ena hereva na egu ai e kau, eto: ²² Taunimanima natuna e, emui hereva lada-isina be dahaka? Israel tanona o herevalaiamu, o tomu “Nega na e daudaumu bona mata-hanai iboudiai anidia asie varamu”, ani? ²³ Taunabunai ba hamaorodia, baoto, Ģaubada Iehova na ini e gwau tomamu: Ina hereva lada-isina na baina hadokoa; basie gwauraia lou Israel ai. A ba hamaorodia, baoto, Nega na vada e kahikahi, mata-hanai iboudiai anidia ihaġuġurudia danu vada e kahikahi. ²⁴ Badina be mata-hanai koikoidia bona bagu-haoro koikoidia na bae doko, Israel besena ai. ²⁵ A lau Iehova ese baina gwauraia herevana vada baina gwauraia, bona karana baina karaia. Basine halah, a oiemu nega ai, gwau-edede besena e, hereva baina gwauraia bona karana baina karaia. Ģaubada Iehova na e herevamu.

²⁶ Iehova ena hereva na egu ai ma e kau, eto:
²⁷ Taunimanima natuna e, a itaia, Israel besena taudia na e tomu “Ena mata-hanai na dina momo vairai ġauna, bona ena peroveta herevadia na nega daudau bainela herevadia”. ²⁸ Taunabunai ba hamaorodia, baoto, Ĝaubada Iehova na ini e gwau tomamu: Egu hereva iboudiai na ta basine halahe, a na gwauraiamu herevana anina do baine vara. Ĝaubada Iehova na e herevamu.

13

Peroveta taudia koikoidia irevadia

¹ Iehova ena hereva na egu ai e kau, eto,
² Taunimanima natuna e, Israel ena peroveta taudia latadiai ba peroveta; sibodia edia lalo-hadai e perovetalaimu taudia na ba peroveta henidia, baoto, Iehova ena hereva ba kamonai. ³ Ĝaubada Iehova na ini e gwau tomamu: Peroveta taudia kavakavadia, sibodia lalodia e badinamu a ġau ta asie itaia taudia, madi ihabaidia! ⁴ Israel e, emu peroveta taudia na uda sisiadia na heheto, e heġiġi dobi rumadia ai e nohomu. ⁵ Magu vada e gwadadia mauru gabudia asio lao henidia, Israel besena maġuna asio larebaia, Iehova ena dina ai tuari ai baine auka totona. ⁶ Vada e hereva koikoi bona vada e bagu haoro koikoi. Iehova ese se siaidia negadia al, idia na eto “Iehova ini e gwau tomamu”, bena idia banava eto ia ese edia hereva baine hamomokania. ⁷ Ena be lau asina hereva to umui oto “Iehova ini e gwau tomamu” negadia iboudiai na o mata hanai koikoi bona o bagu haoro koikoi ani?

⁸ Taunabunai, Ģaubada Iehova na ini e gwau tomamu: Hereva asi anidia vada o gwaurai bona mata-hanai koikoidia vada o ita dainai, Ģaubada Iehova na e tomu, A itaia, lau ese na inai henimuimu. ⁹ E mata hanai koikoimu bona e bagu haoro koikoimu peroveta taudia na lau imagu ese baine laodia ahu; egu orea taudia ida basie henega bou, bona Israel besena taudia ladadia itoredia ai idia ladadia basie hetore, bona Israel tanona ai basie raka vareai; bena umui na ba diba lau na Ģaubada Iehova. ¹⁰ Oibe, badina be egu orea taudia vada e koidia, eto “Maino”, maino na lasi negadia ai; bona badina be taunimanima ese haba e haginiamu negadia ai, ini peroveta taudia ese ahu amo e dahuamu; ¹¹ una dainai ahu amo haba e dahuamu taudia na ba hamaorodia, una haba na baine hegīgi dobi. Medu bada-herea baine diho, medu-hetari badadia bae moru, lai-gubana baine toa; ¹² bena haba baine hegīgi dobi negana ai, haida ese bae nanadaimu, baeto “O dahulaia ahuna be edesenai ai?” ani? ¹³ Taunabunai Ģaubada Iehova na ini e gwau tomamu: Lau ese egu badu ġarāġara ai lai-gubana baina hatoaia; bona egu badu ai medu bada-hereana baina hadihoa, bona medu-hetari badadia baina hamorudia, badu ġarāġara ai bae habuadia tari. ¹⁴ Umui ese ahu amo o dahuabana na lau ese baina ġigīa dobi tano ai, bena ia badina bae hedinarai. Baine hegīgi dobi negana ai, umui ese ia bogaraginai ba mase; bena ba diba lau na Iehova. ¹⁵ Egū badu ġarāġara naunu baina bubua ore toma, haba latanai, bona ahu amo e dahuabana taudia latadiā; bena baina hamaoromu, bainato, Haba na lasihia, ahu amo e dahuabana tau-

dia danu lasihidia; ¹⁶ Israel ena peroveta taudia bunu, Ierusalem latanai e peroveta bona matalhanai ai maino e itaia, maino na lasi negana ai. Ģaubada Iehova na e herevamu.

¹⁷ Taunimanima natuna e, oi danu vairamu ba ha-aukaia emu bese taudia natudia hahinedia, sibodia edia lalo-hadai e perovetalaimu hahinedia, ediai. Idia latadiai ba peroveta, ¹⁸ baoto, Ģaubada Iehova na ini e g vau tomamu: Taunimanima laumadia idoadia totona mea ganadia na ima ganaganadia iboudiai ai e turidia, bona heḡova-ahu mukodia, taunimanima kikina-badana kwaradia igovalaidia, e karamu, hahinedia madi ihabaidia! gu orea taudia laumadia ba idoadia bona ma haida danu laumadia ba hamauridia, umui sibomui emui namo ihabadana a? ¹⁹ Egu orea taudia bogaragidiai lau ladagu vada o hamiroa, bali taidia bona flaoa atagadia iabidia ai, basiema mase taudia na o aladia masemu, bona basiema mauri taudia na o hamauridiamu, emui koikoi amo; egu orea taudia, koikoi e abi daemu taudia, na o koidia.

²⁰ Taunabunai, Ģaubada Iehova na ini e gwau tomamu: A itaia, emui mea ganadia, taunimanima laumadia o idoalaidiamu ġaudiā, na na inai henidiamu; imamui amo baina daredia oho, bona o idoadiamu laumadia na baina kahudia nege, manu na heheto. ²¹ Emui heḡova ahu mukodia danu baina daredia oho, bona egu bese taudia na imamui amo baina rauadia, bena egu orea taudia na imamui ai basie noho, umui damumui ai basiela. Bena ba diba lau na Iehova. ²² Badina be emui koikoi amo kara maoromaoro tauna lalona vada o hamanokaia, ena be lau ese lalona

asina hamanokaia; bona kara dika tauna lalona vada o hagoadaia, ena dala dikana amo basine raka siri, ena mauri basine rauaia; ²³ taunabunai, ina murinai umui na basio mata hanai koikoi lou, bona bagu haoro karadia basio kara lou; egu orea taudia na umui imamui amo baina harohodia mauri. Bena vada ba diba lau na Iehova.

14

Kaivakuku e toma henidia dihomu taudia

¹ A Bena Israel tau-badadia haida na dekegu ema, lau vairagu ai e helai. ² Bena Iehova ena hereva na egu ai e kau, eto, ³ Taunimanima natuna e, ini tatau ese edia kaivakuku na lalodia ai vada e abidia dae, bona edia kara havara na hekwakwanai ġauna ai vada e halaoa vairadiai; bae nanadailaigu herevadia baina kamonaidia eiava lasi? ⁴ Taunabunai ba hereva henidia, baoto, Ĝaubada Iehova na ini e gwau tomamu: Israel besena tauna ta ese kaivakuku na lalona ai baine abidia dae, bona ena kara havara na hekwakwanai ġauna ai baine halaoa vairanai, bera peroveta tauna dekena bainema, lau Iehova sibogu ese baina haere henia, ena kaivakuku na momo dainai; ⁵ unu amo Israel besena taudia, edia kaivakuku daidiai vada e rakatanigu taudia, na lalodia baina abidia lou.

⁶ Taunabunai Israel besena taudia ba hamaordia, baoto, Ĝaubada Iehova na ini e gwau tomamu: A helalo kerehai, emui kaivakuku bona emui kara dika-rohorohodia iboudiai amo ba mede daudau. ⁷ Badina be Israel besena tauna ta, eiava idau tauna Israel ai e noho hedoamu ta, ese baine rakatanigu, ena kaivakuku na lalona

ai baine abidia dae, bona ena kara havara na hekwakwanai ġauna ai baine halaoa vairanai, bena peroveta tauna dekena bainema, peroveta tauna ese ia dainai baine nanadaigu totona, lau Iehova sibogu ese baina haere henia. ⁸ Lau ese vairagu baina ha-aukaia una tau enai; toa bona udu gwaurai-gwaurai herevana ai baina halaoa, bona egu bese taudia bogaragidia amo baina negea daure; bena umui na ba diba, lau na Iehova. ⁹ A peroveta tauna lalona bema hekwakwanai bena hereva ta bema gwauraia, anina be lau Iehova ese vada na koia; bena lau ese imagu baina toia roro ia ihadikana, bona egu bese Israel bogaragina amo baina habuaia tari. ¹⁰ Bena davadia bae hua; peroveta tauna davana bona henanadai tauna davana bae hegeregere; ¹¹ unu amo Israel taudia na egu amo basie raka oho lou, bona edia kara havara iboudiai amo sibodia basie hahemiro lou, a egu bese ai baela, bona lau na edia Dirava ai bainala. Ġaubada Iehova na e herevamu.

Dirava ena hahemaoro Ierusalem latanai

¹² Iehova ena hereva na egu ai e kau, eto, ¹³ Taunimanima natuna e, tano ta ese ena hebeatai karadia amo baine kara dika henigu, bena lau ese imagu na ia ihadikana totona baina toia roro bona ena mauri anianina baina abia oho, bona doe na ia latanai baina siaia, bona taunimanima bona ubu-ubu ġaudiā ia lalonai baina hamasedia, negana ai, ¹⁴ ena be ini tatau tatoiosi, Noa bona Daniel bona Iobu, na ia lalonai bema noho, to edia kara maoromaoro amo idia sibodia mo edia mauri bema heraua. Ġaubada Iehova

na e herevamu. ¹⁵ Eiava uda boromadia na una tano ai bama harakadia hanai, bena idia ese bema havahua, ela bona tano ġaġaena ai bema hahelao, bena tau ta basinema rakaia hanai diba unu uda boromadia daidiae, negana ai, ¹⁶ ena be unu tatau tatoiosi na ia lalonai bema noho, to, lau na maurimu heġereġerena (Gaubada Iehova na e gwaumu), idia tatoiosi ese natudia mamaruandia eiava hahinedia basiema hamauridia diba; idia tatoiosi sibodia mo edia mauri bema heraua, a tano na bema ġaġae. ¹⁷ Eiava dare na una tano latanai bama mailaia, bama toma “Dare na tano amo baine hanai”, bena taunimanima bona ububu ġaudia ia lalonai bama hamasedia, negana ai, ¹⁸ ena be unu tatau tatoiosi na ia lalonai bema noho, to, lau na maurimu heġereġerena (Gaubada Iehova na e gwaumu), idia tatoiosi ese natudia mamaruanedia eiava hahinedia basiema hamauridia diba, a idia tatoiosi sibodia mo bema heraua. ¹⁹ Eiava dai-hanai gorerena na una tano latanai bama siaia, bona egu badu ġaraġara na ia latanai bama bubua, rara ihahebubuna ai, taunimanima bona ubu-ubu ġaudia ihamasedia totona, negana ai, ²⁰ ena be Noa bona Daniel bona Iobu na ia lalonai bema noho, to, lau na maurimu heġereġerena (Gaubada Iehova na e gwaumu), idia tatoiosi ese natudia mamaruandia eiava hahinedia basiema hamauridia diba, a idia tatoiosi sibodia mo edia mauri bema heraua, edia kara maoromaoro daidiae.

²¹ Badina be Gaubada Iehova na ini e gwau tomamu: Matona, Ierusalem baina hahemaoro henia, egu hahehis karadia haniosi, dare bona doe bona uda boromadia dikadia bona dai-hanai

goreredia, na ia latanai baina siaidia taunimanima bona mauri ġaudia ihamasedia totona, negana ai, ia na ede baine heto! ²² Ĝau tamona, ia lalonai haida na bema mauri, bena natudia mamaruanedia bona hahinedia bema hakaudia lasi, idia na dekemu ai bae raka lasi, bena edia dala bona edia kara ba ita negana ai taumu na baine lo, dika na Ierusalem latanai vada na mailaia dainai; oibe, kara iboudiai ia latanai vada na mailai daidiae. ²³ Idia ese taumu bae haloa, edia dala bona edia kara ba ita negana ai; bona ba diba Ierusalem lalonai na kara karadia iboudiai na dia asi badina asina karadia. Gaubada Iehova na e herevamu.

15

Ierusalem na vine auna dikana na heto

¹ Iehova ena hereva na egu ai e kau, eto,
² Taunimanima natuna e, vine auna ese au haida ede e hereadie tomamu; vine rigina ese uda audia rigidia ede e hereadie tomamu? ³ Ĝau ta ikaralaina auna na iena amo e abiamu a? Iena amo ikoko ta e karaiamu bena una ikoko ai ġau ta e taua daemu a? ⁴ A itaia, lahi auna ai e halaoamu; bena lahi ese duduna duduna e aradia oremu bona bogaragina na gida ai e laomu murinai ia na mai ena ġaukara a? ⁵ A itaia, au tutuana miana ai na asi ena ġaukara; matona lahi ese vada e araia bona gida ai vada ela negana ai ena ġaukara be dahaka?

⁶ Taunabunai, Gaubada Iehova na ini e gwau tomamu: Uda audia bogaragidiai vine auna na lahi auna ai vada e halaoa heġereġerena ai, Ierusalem inoholaina taudia na unu baina kara

henidia toma. ⁷ Lau ese vairagu na ediai baina ha-aukaia; ena be lahi amo bae roho mauri, to lahi ese do baine aradia ore; bena lau ese vairagu na ediai baina ha-aukaia negana ai na ba diba lau na Iehova. ⁸ Tano danu baina havahua, badina be e kara hebeatai. Ģaubada Iehova na e herevamu.

16

Ierusalem ena kara hebeatai

¹ Iehova ena hereva na egu ai ma e kau, eto, ² Taunimanima natuna e, Ierusalem na ena kara dika-rohorohodia ba hedaraunelai henia, ³ baoto, Ģaubada Iehova ese Ierusalem na ini e hamaoroa tomamu: Senemu bona emu vara na Kanaan taudia edia tano ai, tamamu na Amoro tauna, sinamu na Hiti hahinena. ⁴ Emu vara na iniheto: emu vara dinana ai hudomu varona asie utua, ranu ai asie hurimu, ba ġoeva ġoeva totona, damena amo asie dahumu, dabua amo asie tarumu. ⁵ E itamu tauna ta ese se bogamu hisi, ini kara ta se kara henimu ena hebogahisi dainai; a tano paka ai e negemu; badina be o vara dinana ai e dadaraimu herea.

⁶ Bena na rakamu hanai negana ai na itamu, rara ai o hekure, bena rara ai hekuremu ai na hereva henimu, nato, Ba mauri, ⁷ tano paka avana na heto ba tubu. Bena o bada oho bada oho, taumu e lata, hane-ulato ai ola; ratamu e hekara, huimu e lata; ġau tamona gagaemu ai o nohova, asi dabuamu.

⁸ Ma na rakamu hanai negana ai na itamu, oi na vada o ulato; bena egu dabua amo na tarumu, taumu na govalaia; oibe, maohenimu na karaia, bona oi ida ta hegwau hamata heheni, bena

adavagu ai ola. Ģaubada Iehova na e herevamu. ⁹ Bena ranu ai na hadigumu, raramu na huria oho, bona dehoro amo na dahumu. ¹⁰ Dabua mai heraheradia amo na hahedokilaimu, bona boromakau kopina tamakadia na aemu ai na kara. Dabua aukana ġoeva-dæna amo na hariolaimu, bona dabua manoka-manokana amo na hahedokilaimu. ¹¹ Herahera ġaudia amo na haheralaimu; vagivagi na imamu ai na ato, bona ageva na ha-inulaimu.

¹² Gadei ta na udu-baubaumu ai na atoa, bona haida danu taiamu ai; bona havava ġauna ta mai hairaina na kwaramu na havavalalaia. ¹³ *Gold* bona *silver* amo unu na haheralaimu toma; emu dabua na dabua aukadia ġoeva-dædia bona dabua manoka-manokadia bona dabua mai heraheradia; amu aniani na flaoa namo-hereana bona bada-ranuna bona dehoro. Hairaimu e bada e laova, ela bona oromamu na pavapava hahinena na heto. ¹⁴ Sivaraimu danu e hehari piu, bese idau-idau bogaragidiai, hairaimu na bada herea dainai; badina be hairaimu na ġoeva-dæ, lau ese na hahairaimu dainai. Ģaubada Iehova na e herevamu.

¹⁵ A oi ese hairaimu o abidadama henia, bena ariara hahinena ai ola harimu badana dainai, raka-hanai taudia ida o lebulebu. ¹⁶ Emu dabua haida o abi, pata helagadia o haheralai, bena latadiai ariara karadia o kara; kara unuhetomana na nega gunadia ta ai se vara, bona nega gabedia ta ai basine vara Iou. ¹⁷ Emu herahera ġaudia danu, lauegu *gold* bona *silver* amo e kara bona lau ese na henimu ġaudia, na o abidia, tatau laulaudia o karalai, bena o lebulebulai. ¹⁸ Emu

dabua mai heraheradia danu o abidia,unu ġau o govalaidia, bona egu dehoro bona egu muramura mai bonana na vairadai o atodia. ¹⁹ Egu flaoa igabudia danu, na henimu ġauna, (badina be lau ese flaoa namo-hereana bona dehoro bona bada-ranuna amo na ubumu) na idia vairadai o atodia, bonadia bae moalelai totona. Ĝaubada Iehova na e herevamu. ²⁰ Bena natumu maruanedia bona hahinedia, o havaradia egu, na o abidia, boubou ġaudia ai o halaodia, idia adia. Emu ariara karadia na ġau pipikidia a? ²¹ Una dainai lau natugu o aladia mase, bona ġole-oho boubou ġaudia ai o halaodia, idia edia, a? ²² Emu kara dika-rohorohodia bona emu ariara karadia iboudiai lalodai, maragimu negana, asi dabuamu ġagaemu ai o nohova negana, rara ai o hekure, so laloa tao.

²³ Bena emu kara dika iboudiai muridiae, (Ĝaubada Iehova na e tomu, Madi, ihabaimu!), ²⁴ oi ese emu kalaga o haginidia bona emu pata helağadia o kara, ruma ariaradia iboudiae lalodiae. ²⁵ Hanua ariarana iboudiae dokodia ai emu pata helağadia o haginidia; hairaimu vada o lebulebulaia, raka-hanai tataudiae ediae sibomu o hehoihoilai, emu ariara karadia o habada. ²⁶ Aigupto taudiae, dekemu taudiae mai ediae mata-bodaga, ida danu vada o lebulebu, emu ariara karadia vada o habada, lau ihabadugu. ²⁷ Taunabunai a itaia, lau imagu na toia roro oi ihadikamu, oi ahumu, e gwaurai henimu guna ġauna, na hamaraġia, oi inaimu Filistia hahinedia, mata-ganigani hahinedia, imadia ai na atomu; idia ese emu lebulebu karadia hemaraidiae e hemaraiva. ²⁸ Asuria taudiae ida

danu ariara karadia o kara, badina be emu matabodaga na bada herea; oibe, idia ida ariara karadia o kara, a lalomu do se heğereğere. ²⁹ Emu ariara karadia o habada danu, Kaldea tanona ena hoihoi gabudia ai; a lalomu na dounu se heğereğere.

³⁰ Ğaubada Iehova na e tomu: Emu matabodaga na bada herea; una dainai ini kara iboudiai o kara, ariara hahinena se hemaraimu ena kara; ³¹ hanua ariaradia iboudiai dokodia ai emu kalaga o haginidia, bona ruma ariaradia iboudiai lalodiai emu pata helağadia o kara. Ğau tamona oi na dia ariara hahinena heğereğerenä, badina be henitaomu o dadaraiamu. ³² Oi na heuda-hanai hahinemü, idau taudia o abidia daemu adavamu gabuna ai. ³³ Tatau ese ariara hahinedia iboudiai na harihari ġaudia e henidiamu; a oi ese emu harihari gsudia na e ura henimuva taudia iboudiai o henidiava, henitodia o henidiava, kaha idau-idaü iboudiai amo emu ariara karadia ikaradia bae vasi totona. ³⁴ Taunabunai, emu ariara karadia lalodiai oi na idau, dia hahine haida heğereğeredia. Ta se noimu ia ida ba eno bou; oi ese henitaona o henia, a haida ese henitaomu se henimu. Una dainai oi na idau.

³⁵ Taunabunai, ariara hahinemü e, Iehova ena hereva ba kamonai. ³⁶ Ğaubada Iehova na ini e gwau tomamu: Badina be e ura henimu taudia ida emu ariara karadia o kara lalodiai, oi ihahemaraimu na e hehulala bona gagaemu ai na o hedinarai dainai, bona emu kaivakuku iboudiai daidiae, bona natumu, idia o henidia memerodia, raradia daidiae, ³⁷ a itaia, e ura henimu taudia

iboudiai, olebulebulaidia taudia, o ura henidia taudia bona o dadaraidia taudia iboudiai, na lau ese baina haboudia; oi ihadikamu totona kaha iboudiai amo baina haboudia, bona gagaemu ai baina haheitalaidia; taumu idoinai ġaġaena ai bae itaia. ³⁸ Bena lau ese baina hahemaoro henimu, adavadia e dihotanidiamu bona rara e hahebubuamu hahinedia e hahemaoro henidi-amu heġereġerena.

³⁹ E ura henimu taudia imadia ai baina atomu; bona idia ese emu kalaga bae ġigja dobi, bona emu mata helagadia bae hamakohidia, emu dabua bae dokidia oho, emu herahera nadidia namohereadria na bae abidia, gagaemu ai asi dabuamu bae rakatanimu. ⁴⁰ Tuari oreana ta bae mailaia, oi ihadikamu; nadi amo bae hodomu, bona edia dare amo bae dapamu rohoroho. ⁴¹ Emu rumu bae doudia; hahemaoro karadia oi latamu ai bae kara, hahine momo vairadiai; emu ariara karadia ai baina hadokomu, bona henitao basio heni lou. ⁴² Unu amo egu badu ġarāġara baina haġuġuruu latamu ai, bona egu vaġeġe ese baine rakatanimu; lalogu na baine keru, basina badu lou. ⁴³ Badina be eregabemu negana so laloa taomu; to ini ġau iboudiai amo vada o habadugu. Taunabunai, a itaia, emu kara dava-dia na tubuamu ai baina kara. Ĝaubada Iehova na e herevamu.

Emu kara dika-rohorohodia iboudiai latadiai mata-bodaga karadia ma vada o ato kau, ani? ⁴⁴ A itaia, hereva lada-isidia e gwauraimu taudia iboudiai ese ina hereva lada-isina ai bae herevalaimu, baeto “Sinana hetomana, natuna hahinenet danu unuheto”. ⁴⁵ Sinamu ese adavana bona natuna e dadaraidia, bona oi na ia natuna

hahinena; tadikakamu ese adavadia bona natu-
dia e dadaraidia, bona oi na idia tadikakadia.
Sinamu na Hiti hahinena; tamamu na Amoro
tauna. ⁴⁶ Kakamu na Samaria; ia na natuna
hahinedia ida e nohova, oi miriginimu kahana ai;
bona tadiimu na Sodoma; ia na natuna hahinedia
ida e nohova, oi dihomu kahana ai. ⁴⁷ Ģau
tamona, oi lalomu na se heğereğere idia edia dala
ai ba raka, eiava idia edia kara dika-rohorohodia
heğereğeredia ai ba kara; asi vanahana oiemu
kara mirodia ese idia edia kara mirodia e here-
adia, emu dala iboudiai lalodiae.

⁴⁸ Ģaubada Iehova na e tomu: Lau na mau-
rimu heğereğerenā, tadiimu Sodoma bona natuna
hahinena edia kara na oi bona natumu hahinedia
edia kara ida asie heğereğere. ⁴⁹ A itaia, tadiimu
Sodoma ena kerere binai: ia mai natuna ida
e hekokorokuva, e aniani boga-kunuva, e noho
namonamova mai tagadia ida; a ogoğāmi taudia
bona e dabuva taudia na asie durudia. ⁵⁰ Idia
na e hekokorokuva, kara dika-rohorohodia na
lau vairagu ai e karava; taunabunai edia kara
na itaia negana ai na na abidia oho. ⁵¹ Samaria
ena kara dika na taina bada, a oiemu na bada
herea; oiemu kara dika-rohorohodia ese idia edia
vada e hereadia; oiemu kara dika-rohorohodia
iboudiae daidiae tadikakamu ita-itadia na kara
maoromaoro hahinedia ita-itadia na heheto. ⁵² Oi
danu ihahemaraimu na ba huaia, badina be
tadikakamu ihahemaorohenidia metauna vada
o haragaia; badina be emu kara dika ai emu
kara dika-rohorohodia ese idia edia e hereadia
dainai, idia na taidia mamaoro, a oi na dika
vaitani. Taunabunai, oi danu ba hemarai, iha-
hemaraimu ba huaia, badina be tadikakamu oro-

madia na kara maoromaoro hahinedia oromadia heğereğeredia ai vada o halaodia.

⁵³ Edia noho-namo baina henidia lou, Sodoma mai natuna hahinedia ida edia noho-namo bona Samaria mai natuna hahinedia ida edia noho-namo, bona oiemu noho-namo baina henimu lou idia bogaragidiae; ⁵⁴ bena iahemaraimu ba huaia bona emu kara iboudiae daidiae ba hemarai, bena idia taudiae ihalodia hahinemui ai baola. ⁵⁵ A tadimu Sodoma bona natuna hahinedia ese edia noho dalana Kunana bae lou henia; bona kakamu Samaria bona natuna hahinedia ese edia noho dalana gunana bae lou henia; bona oi bona natumu hahinedia ese emui noho dalana gunana ba lou henia. ⁵⁶ Emu hekokoroku dinana ai oi tadimu Sodoma na udu gwaurai-gwawai herevana oi udumu ai, ani, ⁵⁷ emu kara dika do se hedinarai negana ai? Harihari oi na ia heğereğerenae, duni-dae ġauna ai vada ola Edom natuna hahinedia ediae, bona ia dekena hahinedia iboudiae ediae, bona Filistia taudiae natudiae hahinedia ediae, e ġegemu daemu bona e dadaraimumu hahinedia iboudiae ediae. ⁵⁸ Emu lebulebu bona emu kara dika-rohorohodia dava-dia metauna o huaiamu. Iehova na e herevamu.

⁵⁹ Oibe, Ġaubada Iehova na ini e gwau tomamu: Oiemu kara heğereğerenae ai baina kara henimu. Oi ese hereva helāġana vada o dadaraia, gwauhamata itata-utuna; ⁶⁰ ġau tamona, egū gwauhamata, eregabemu negana ai oi ida ta hegħwau hamata heheni ġauna, baina laloa toa, bona oi ida mia-hanaihanai gwauhamatana ta baita haginia tutuka-tutuka. ⁶¹ Bena emu kara ba lalodia tao, bona emu hane-guna bona emu hane-muritai baina abidia, natumu ai baina

halaodia, negana ai vada ba hemarai, a dia eda gwauhamata dainai. ⁶² Eda gwauhamata baina haginia tutuka-tutuka, bena ba diba lau na Iehova; ⁶³ ba laloa tao, bena ba baia, bona udumu basio kehoa lou, emu hemarai dainai, lau ese emu kara iboudiai baina lalodia nege negana ai. Ģaubada Iehova na e herevamu.

17

Hereva heğereğeredia: Ugava bona Vine

¹ Iehova ena hereva na egu ai e kau, eto:
² Taunimanima natuna e, henanadai hepuina ba gwauraia, bona hereva heğereğerena ta na Israel besena ba gwaurai henia. ³ Baoto, Ģaubada Iehova na ini e gwau tomamu: Ugava badana ta mai hanina badadia bona hape latadia, huina oromadia danu idau-idau, na Lebanon ema, sida auna ta dorina e bitua. ⁴ Ia ese dorina rigirigina e bitua kwaidu, hoihoi tanona e laohaia, hoihoi taudia edia hanua lalonai e hadoa. ⁵ Bena tano uhena e abia, tano namona ai e hadoa, ranu momo gabuna ai. E hadoa arabimi* rigirigina na heto, ⁶ bena ia na e tubu, vine auna ai ela, e raga rohoroho; bena gavena na ia e tubu henia, a ramuna na ena gini gabuna ai e mia. Taunabunai, ia na vine auna ai ela, gavena e tubu bona rauna e urumo-urumo.

⁷ A ugava ma ta ema; hanina na babada, bona huina na momo. A itaia, hari vine ramuna ese ia e hata hema bona gavena danu e tubu henia, baine hapariparidia totona. Bena e hadoa

* **17:5:** Arabimi na sinavai isena ai e varamu auna ta ladana.

tanona amo ⁸ ma e hadoa hanai, tano namona ai, ranu momo gabuna ai, gavena bae tubu bona hu huana bae dobi bona vine auna herea-daena ai bainela totona. ⁹ Baoto, Ģaubada Iehova na ini e gwau tomamu; Baine tubu namonamo a? Ramuna basine raǵadia bona gavena basine utudia, rauna matamatadia iboudiai bae marai totona, a? Dia ima mai goadana mo, eiava taunimanima hutuma mo, bae heǵereǵere ramuna amo bae raǵaia, ani? ¹⁰ A itaia, bae hadoa hanai negana ai, baine tubu namonamo a? Laurabada baine toa henia negana ai, ia na basine marai a? E tubu gabuna ai baine marai ani?

¹¹ Bena Iehova ena hereva na egu ai e kau, eto, ¹² Harihari ene daǵedáǵe besena taudia ba hamaorodia, baoto: Ini ǵau anidia na asi dibamui a? Bena ba hamaorodia, baoto, A itaia, Babulono pavapavana na Ierusalem ela, hanua pavapavana bona lohiana verina Babulono e hakaudia mai. ¹³ Bena ia ese hanua pavapavana natuna maruanena ta e abia, ia taravana e atua, bona gwauhamata helagána henunai e hanohoa. (Tano lohiadia na ia ese vada e abidia oho, ¹⁴ basileia na baine manau, basine hekokoroku, bona iena taravatu ibardinana ai baine gini helaorearria.) ¹⁵ A ia ese e daǵedáǵe henia, gwaukau taudia na Aigupto e siaidia lao, idia ese hosi haida bona tuari oreana badana ta bae henia helaooreana. Baine kwalimu a? Kara unuhetomadia e karamu tauna na baine roho mauri diba a? Taravatu baine tataia utu, bena baine roho mauri diba a? ¹⁶ Ģaubada Iehova na e tomu: Lau na maurimu heǵereǵerena, momokani hanua pavapavana ta ese tau ta na pavapava tauna ai e halaoa,

bena una pavapava ai e halaoa tauna ese dagi na e henia tauna ena gwauhamata helāgāna e dadaraia, bona e atua taravatuna e tataia utu; benaini, una tau na dagina e henia pavapavana ena noho gabuna ai baine mase, oibe, Babulono ai baine mase. ¹⁷ Farao bona ena tuari oreana mai goadana bona ena orea badana idoinai ese basie durua tuari ai, hutuma iala-masedia totona tano bae larebaia bona hanua bae magua heğege negana ai. ¹⁸ Badina be gwauhamata helāgāna e dadaraia bona taravatu e tataia utu, bona imana e dudui hen'i to ini kara iboudiai e kara, dainai ia na basine roho mauri. ¹⁹ Taunabunai, Ģaubāda Iehova na ini e gwau tomamu: Lau na maurimu heğereğerena, momokani egu gwauhamata helāgāna, e dadaraia ġauna, bona egu taravatu, e tataia utu ġauna, davadia na ia tubuana ai baina kara. ²⁰ Egu huo baina otoa, ia iabina, bona egu idoa ai baina idoaia; bena Babulono baina laohaia, unuseni ai baina hahemaoro henia, ena koikoi karadia egu ai e kara na baina hahemaorolai. ²¹ Ena abi-hidi tuari taudia na dare ai bae mase, bona roho-mauri taudia na lai kahadia iboudiai bae pere rohoroho; bena ba diba, lau Iehova vada na hereva.

Hereva heğereğerena: Sida auna

²² Ģaubāda Iehova na ini e gwau tomamu: Lau sibogu ese sida auna dorina amo rigirigi ta baina abia, bena baina hadoa; dorina rigirigidia ediai manoka-manokana ta baina gadaia oho, bena lau sibogu ese baina hadoa, ororo bada-hereana bona lata-hereana dorina ai. ²³ Israel ororona dorina ai baina hadoa, rigina bae tubu bona

huahuana bae dobi bona sida auna herea-daena ai bainela totona; bena ia henunai mauri ġaudia idau-idau bae noho; bona ia rigina ikerukerudia ai manu idau-idau ese edia rum a bae kara.²⁴ Bena tano paka audia iboudiai na bae diba lau Iehova ese au latana na hakwadogiamu bona au kwadogina na halataiamu, au maurina na hakakoroamu bona au masena na hatubuamu. Lau Iehova vada na hereva, bona karana baina karaia.

18

Kara dika tauna laumana baine mase

¹ Iehova ena hereva egu ai ma e kau, eto: ² Badina be dahaka ina hereva lada-isina o gwauraia louloumu, o tomu
“Tama ese vine huahuadia kasiridia vada e ani,
bona natudia isedia e urimu”?

³ Ġaubada Iehova na e tomu: Lau na maurimu heġereġerena, ina hereva lada-isina na basio gwauraia lou Israel ai. ⁴ A itaia, lauma iboudiai na lauegu, tama laumana bona natuna laumana danu; kara dika tauna laumana na baine mase.

⁵ Tau ta ena kara bema maoromaoro, taravatu ibadinana ai bona kara maoromaoro ikaradia ai bema noho, ⁶ ororo ai basinema aniani eiava Israel besena kaivakukudia basinema gaga dae henidia; dekena tauna adavana basinema kara miro henia eiava hahine ta na ena rara-kara dinadia ai basinema raka kahi henia; ⁷ ta na basinema hahisia, a abitorehai tauna ena abitorehai toana bema henia lou; kohu basinema dadi; hitolo taudia bema ubudia bona asi dabuadria tau-dia bema hadabualaidia; ⁸ moni basinema henitorehai mai heatokauna eiava heatokau monidia

haida basinema abi; imana na kara havara amo bema rua; taunimanima padadiai hahemaoro ġoevāġoевана bema karaia; ⁹ egu taravatu daladia ai bema raka bona egu hahedua herevadia bema badinadia ġoevāġoева: una tau na kara maoromaoro tauna; momokani ia na do baine mauri. Ĝaubada Iehova na e herevamu.

¹⁰ Natuna maruanena ta bema havaraia, bena una mero na dadidadi bona rara iħahebubuna tauna ai bema hahelao, ¹¹ bona ini ġaukara iboudiai basiema kara, a ororo ai bema aniani, dekena tauna adavana bema kara miro henia, ¹² ogoġami taudia bona e dabumu taudia bema hahisidia, kohu bema dadi, abitorehai toana basinema henilou, kaivakuku bema gaga dae henidia, kara dika-rohorohodia bema kara, ¹³ moni bema henitorehai mai heatokauna, bona heatokau monidia haida bema abi: una tau be baine mauri a? Ia na basine mauri. Ini ġau dika-rohorohodia iboudiai vada e kara; momokani, ia na baine mase; ia rarana na ia sibona latanai.

¹⁴ A ina tau ese natuna maruanena ta bema havaraia; bena natuna ese tamana ena kara dika iboudiai bema itadia, bena bema gari, bona unukara heġereġeredia ai basinema kara, ¹⁵ ororo ai basinema aniani, eiava Israel besena kaivakukudia basinema gaga dae henidia, dekena tauna adavana basinema kara miro henia, ¹⁶ tau ta basinema kara dika henia, abitorehai toana basinema abia, kohu basinema dadi, a hitolo taudia bema ubudia bona asi dabuadria taudia bema hadabualaidia, ¹⁷ imana na kara havara amo bema rua, abitorehai heatokauna eiava heatokau monidia haida basinema abi, egu hahedua herevadia bema badinadia bona egu taravatu daladia

ai bema raka: una tau na tamana ena kara havara dainai basine mase; momokani ia na do baine mauri. ¹⁸ A tamana, badina be moni na gwaurailagau amo e abiva, bona tadikakana ena kohu e dadiva, bona ena bese taudia bogaragidiae kara dia nanamo e karava, ia na ena kara havara dainai do baine mase.

¹⁹ Čau tamona, umui na o tomu “Dahaka dainai natuna basine hisihisi tamana ena kara havara dainai?” Natuna na taravatu lalonai baine ġaukara bona baine kara maoromaoro, bona egu taravatu iboudiae baine badinadia namonamo, negana ai, momokani ia na do baine mauri. ²⁰ Kara dika tauna laumana na baine mase. Natuna basine hisihisi tamana ena kara havara dainai, bona tamana basine hisihisi natuna ena kara havara dainai; kara maoromaoro tauna ena kara maoromaoro na ia sibona latanai, bona kara dika tauna ena kara dika na ia sibona latanai.

Dirava ena kara na maoromaoro

²¹ A kara dika tauna na ena kara dika iboudiae amo bema raka oho, bona egu taravatu iboudiae bema badinadia, bona taravatu lalodiae bema ġaukara bona bema kara maoromaoro, ia na momokani do baine mauri; ia na basine mase. ²² Kerere iboudiae, ia ese e kara ġaudia, na ta basie laloa tao ia latanai; ena kara maoromaoro dainai ia na baine mauri. ²³ Čaubada Iehova na e tomu: Edena na moalelaiamu, kara dika tauna baine mase, eiava ena dala baine rakatania bena baine mauri, a? ²⁴ A kara maoromaoro tauna ese ena kara maoromaoro e rakataniamu bona kara havara e karaiamu, bona kara dika-rohorohodia e karamu, kara dika tauna heġereġerena, negana

ai, ia na baine mauri, a? Ena kara maoromaorodia ta basie Laloa tao; ena koikoi karadia bona ena kara dika daidiai, ia na baine mase.

²⁵ Ĝau tamona umui na o tomu “Ĝaubada ena dala na dia maoro”. Israel besena e, a kamonai! Egu dala na dia maoro a? Lasi, umui emui dala hari dia mamaoro ani? ²⁶ Kara maoromaoro tauna ese ena kara maoromaoro baine rakatania bena baine kara havara negana ai, ia na una kara havara dainai baine mase; ena kara havara dainai do baine mase. ²⁷ Ina danu, kara dika tauna ese ena kara dika baine rakatania bena taravatu lalonai baine ĝaukara bona baine kara maoromaoro, ia ese ena mauri baine rauaia. ²⁸ E helalo bena ena kara kerere iboudiai amo e raka oho dainai, ia na momokani do baine mauri; ia na basine mase. ²⁹ Ĝau tamona, Israel besena na e tomu “Ĝaubada ena dala na dia maoro”. Israel besena e, egu dala na dia maoro a? Lasi, umui emui dala hari dia mamaoro ani?

³⁰ Ĝaubada Iehova na e tomu: Taunabunai, Israel besena e, lau ese baina hahemaoro henimui, ta ta ena dala ena dala heğereğeredia. Ba helalo kerehai, emui kerere iboudiai amo ba raka siri, kara havara ese baine hadikamui vaitani na garina. ³¹ Emui kerere iboudiai, lau o kara henigu karadia, na ba negedia daure, lalo matamatadia bona lauma matamatadia bayabi. Israel besena e, ba mase anina be dahaka? ³² Badina be lau ese ta ena mase asina moalelaiamu; taunabunai, ba helalo kerehai, bena ba mauri. Ĝaubada Iehova na e herevamu.

19

Rohe-ahu

- ¹ Israel lohiadia irohe-ahudia ba ladaia ist,
² baoto:
 Sinamu na daka leona hahinena, leona bogaragidiai;
 leona natudia bogaragidiai e goru,
 natuna e ubudia.
- ³ Natuna ta e reğua,
 ia na e bada oho bada oho,
 damuna iabina daladia vada e diba,
 taunimanima na e anidia.
- ⁴ Bese idau-idau ia dainai e ko,
 edia guri ai e abia,
 igau amo e hakaua lao,
 Aigupto tanona e laohaia.
- ⁵ Leona hahinena e diba vada e baia,
 bona ena helaro vada e boio negana ai,
 ia ese natuna ta ma e abia,
 e reğua; bena ia na e bada oho bada oho.
- ⁶ Leona bogaragidiai e loa eva-eva;
 e bada oho bada oho,
 damuna iabina daladia vada e diba,
 taunimanima na e anidia.
- ⁷ Edia gabu aukadia na e habuadia tari,
 edia hanua na e havahudia;
 gari ese tano na e butua tao,
 bona lalonai e nohova taudia iboudiai danu,
 ena ġou reğena dainai.
- ⁸ Bena bese idau-idau ese ia iabina idoadia e oto
 hegege;
 edia huo ai e abia,
 edia guri ai e abia.
- ⁹ Mai igauna ida maua ai e udaia,
 Babulono pavapavana dekena e laohaia, e
 koua ahu;

bena ia gadona na basie kamonai lou,
Israel ororodia ai.

10 Sinamu na vine auna na heto,
vine imeana lalonai,
ranu gabuna badibadinai vada e hadoa
hanai;

huahuana momo e dobi, rigina danu momo,
badina be ranu momo dainai.

11 Ia badina auka-hereana na
pavapava ena dagi auna ai ela;
e tubu dae,
rigi badadia bogaragidai;
ia sibona atai ai e noke tao,
mai rigina momo ida.

12 A hari vine auna na badu ai e raḡaia oho,
tano ai e tahoa dobi,
lai mairiveina ese e hakakoroa,
huahuana vada e huhu;
ia badina aukana e kakoro,
lahi ese e araia ore.

13 Harihari ia na tano ḡaḡaena ai vada e hehado
hanai,
tano kaukauna ai, ranu mase gabuna ai.

14 Lahi na ia badina amo vada e dae,
rigi bona huahua vada e aradia ore,
bena ia lalonai asi badi aukana ta mia,
asi dagi auna ta, pavapava ena.

Rohe-ahu bunai, e ladaia isi louloumu ḡauna.

20

Dirava ena kara Israel ena

¹ Laḡāni ihahituna huana iha-imana dinana ihagwautana ai, Israel tau-badadia haida na ema, Iehova enai bae henanadai totona; bena idia na lau vairagu ai e helai.

² Bena Iehova ena hereva na egu ai e kau, eto: ³ Taunimanima natuna e, Israel tau-badadia ba hamaorodia, baoto, Ġaubada Iehova na ini e gwau tomamu: Lau inanadaigu oma a? Ġaubada Iehova na e tomu, Lau na maurimu heğereğerena, umui ese lau basio nanadaigu. ⁴ Oi ese ba hahemaoro henidia a? Taunimanima natuna e, oi ese ba hahemaoro henidia a? Benaini, senedia edia kara dika-rohorohodia ba hadibalaidia, ⁵ ba hamaorodia, baoto, Ġaubada Iehova na ini e gwau tomamu: Israel na abia hidinana ai, Iakob vevena na gwau henidia hamata. Aigupto tanona ai na hahedinarai henidia, bena na gwau henidia hamata, nato, Lau na Iehova, emui Dirava. ⁶ Una dina ai na gwau henidia hamata, nato, Aigupto tanona amo baina hakaudia lasi, idia daidai vada na lalo davari tanonta, rata bona bada-ranuna e arumu tanona, tano herea-daena, tano iboudiai e hereadiamu ġauna, lalonai baina hakaudia vareai. ⁷ Bena na hamaorodia, nato, Ibouboumui ai, ġau dika-rohorohodia, matamui ese e moalelaimu ġaudia, na ba negedia daure, Aigupto kaivakukudia ediai basio hahemiro. Lau na Iehova, emui Dirava. ⁸ A idia ese e dağedäge henigu, asie kamonai henigu; ġau dika-rohorohodia, matadia ese e moalelaiva ġaudia, na dia iboudiai ese asie negedia daure, bona Aigupto kaivakukudia asie rakatanidia.

Bena na laloa, nato, egu badu ġaraġara na

latadiai baina bubua dobi bona egu badu na idia ihadikadia ai baina ha-orea, Aigupto tanona ai. ⁹ A lau ladagu bagunai na ġaukarava, bogaragidiai e nohova bona vairadiai Aigupto tanona amo ihakau-lasidia ai na hahedinarai henidia besedia vairadiai lau ladagu na basine miro tottona. ¹⁰ Taunabunai, lau ese Aigupto tanona amo na hakaudia lasi, bena tano ġaġaena ai na hakaudia vareai. ¹¹ Egu taravatu na henidia, bona egu hahedua herevadia ibadinadia ai taunimanima bae mauri ġaudia na na hamaorolaidia. ¹² Ina danu, egu dina helagadia na henidia, toa ai baela, lau bona Idia padamai ai, idia na bae diba lau Iehova ese na hahelagadiamu helaooreana. ¹³ A Israel besena ese e daġedäge henigu, tano ġaġaena ai; egu taravatu lalodai asie raka, a egu hahedua herevadia, ibadinadia ai taunimanima bae mauri ġaudia, na e dadaraidia, bona egu dina helagadia na e hamirodia herea.

Bena na laloa, nato, egu badu ġaraġara na latadiai baina bubua dobi, tano ġaġaena ai, bona baina ha-orea vaitani. ¹⁴ A lau ladagu bagunai na ġaukarava, vairadiai na hakaudia lasi besedia vairadiai lau ladagu basine miro helaooreana. ¹⁵ Ina danu, tano ġaġaena ai na gwau henidia hamata, baina henidia nato tanona, rata bona bada-ranuna e arumu tanona, tano herea-daena, tano iboudiai e hereadiamu ġauna, lalonai basina hakaudia vareai; ¹⁶ badina be egu hahedua herevadia e dadaraidia, bona egu taravatu lalodai asie raka, bona egu dina helagadia e hamirodia; badina be lalodia ese edia kaivakuku e lalo tao. ¹⁷ Ĝau tamona, matagu ese e bogadia hisi; asina

habuadia tari eiava asina ha-oredia vaitani, tano ġaġaena ai.

¹⁸ Bena tano ġaġaena ai idia natudia na hamaorodia, nato, Tamamui edia taravatu lalodai basio raka, eiava edia hahedua herevadia basio badinadia, eiava edia kaivakuku itomadiħo-henidia ai sibomui basio hahemiro. ¹⁹ Lau Iehova na emui Dirava; lauegu taravatu lalodai ba raka, bona egu hahedua herevadia ba badinadia namonamo; ²⁰ bona egu dina helagadia ba matauraidia, bena toa ai baela, lau bona umui padadai, bona ba diba lau Iehova na emui Dirava. ²¹ A idia natudia ese e daġedäge henigu; egu taravatu lalodai asie raka, bona egu hahedua herevadia; ibadinadia ai taunimanima bae mauri ġaudia, asie badinadia namonamo, egu dina helagadia danu e hamirodia.

Bena na laloa nato, egu badu ġaraġara na latadiai baina bubua dobi, bona egu badu na idia ihadikadia ai baina ha-orea, tano ġaġaena ai. ²² A imagu na na rua, bona ladagu bagunai na ġaukara, vairadiai na hakaudia lasi besedia vairadias lau ladagu basine miro helaoreana. ²³ Ina danu, tano ġaġaena ai na gwau henidia hamata, nato, bese idau-idau bogaragidai baina hakarohodia bona tano idau-idau ai baina hakarohodia rohoroho; ²⁴ badina be idia ese egu hahedua herevadia asie badinadia, bona egu taravatu e dadaraidia, bona egu dina helagadia e hamirodia, bona tamadia edia kaivakuku e haġeredia. ²⁵ Ina danu, taravatu dikadia bona hahedua herevadia, ibadinadia ai mauri basie davaria ġaudia, na henidia; ²⁶ bona sibodia edia herahia ġaudia

amo na hamirodia; badina be na koidia, natudia roboadiah iboudiai na ġole-oho boubou ġaudia ai bae halaodia, baina hagaridia totona. Unu na kara toma, idia na bae diba lau na Iehova helaoreana.

²⁷ Taunabunai, taunimanima natuna e, Israel besena taudia ba hereva henidia, baoto, Ĝaubada Iehova na ini e gwau tomamu: Ina kara ai danu senemui ese e uduguirai, e kara koikoi henigu dainai. ²⁸ Badina be na gwau hamatalaia baina henidia nato tanona lalonai na hakaudia vareai negana ai, idia ese ororo latana ta eiava rauna urumona auna e itaia negadia iboudiai na edia boubou ġaudia na unuseni ai e hahelaġadie, bona edia herahia karadia amo danu e habadugu. Unuseni ai taunimanima lalodia ihanamodia bona-dia e hadaedia, bona unuseni ai danu edia inuinu bouboudia ududia ahudia e bubu nege. ²⁹ (Na hamaorodia, nato, Atai gabuna o lao heniamu be edena? Taunabunai, ia ladana e hatoamu Bama,* ema bona ina dina.) ³⁰ Taunabunai, Israel besena ba hamaoroa, baoto, Ĝaubada Iehova na ini e gwau tomamu: Senemui heġereġeredia ai ba hahemiro, bona edia ġau dika-rohorohodia igavadia ai ba raka siri, a? ³¹ Emui herahia ġaudia o henimu, bona natumui mamaruanedia na ġole-oho boubou ġaudia ai o halaodiamu, negadia ai na umui na sibomui o hahemiro, emui kaivakuku iboudiai ida, ema bona ina dina. Israel besena e, ba nanadaigu a? Ĝaubada Iehova na e tomu: Lau na maurimu heġereġerena, umui na basio nanadaigu.

* **20:29:** “Bama” anina na “atai gabuna”.

³² Emui lalo-hadai anina na nega ta ai basine vara; o laloamu, o tomu “Bese idau-idau, tano idau-idau besedia, heğereğeredia ai baia hahelao, au bona nadi baia toma henidia diho”.

³³ Čaubada Iehova na e tomu: Lau na maurimu heğereğerenä, momokani mai imagu goadana bona mai imagu itoi-rorona bona mai badu-hebubugu ida baina pavapavamui. ³⁴ Bese idau-idau bogaragidia amo baina hakaumui lasit bona lalodai vada o karoho rohoroho tandodia amo baina gogomui, mai imagu goadana bona mai imagu itoi-rorona bona mai badu-hebubugu ida. ³⁵ Bena bese idau-idau edia tano ġaġaena ai baina hakaumui vareai; unuseni ai hevaira-hehenida ai baina hahemaoro henimui. ³⁶ Aigupto tano-ġaġaena ai senemui na hahemaoro henidia heğereğerenä ai umui danu baina hahemaoro henimui. Čaubada Iehova na e herevamu. ³⁷ Itotohi henuna amo baina harakamui hanai, bona ta ta amo baina harakamui vareai. ³⁸ Dağedaġe taudia bona egu taravatu e tata utumu taudia na umui bogaragimui amo baina negedia daure, e noholiamu tanona amo baina hakaud a lasi, a Israel tanona lalonai basie raka vareai. Bena ba diba lau na Iehova.

³⁹ A oi, Israel besena e, Čaubada Iehova na ini e gwau tomamu: Bema basio kamonai henigu, vada baola, ta ta ena kaivakuku ena kaivakuku isiaidia ba lao hen, harihati bona nega gabedia ai danu; a lau ladagu helāġa na emui herahia ġaudia eiava emui kaivakuku amo nega ta ai basio hamuo lou.

⁴⁰ Čaubada Iehova na e tomu: Badina be egu ororo helāġa ai, Israel ororona dorina ai, un-

useni ai Israel besena idoinai, ena taunimanima iboudiai, ese lau isiaigu bae lao hen i una tano ai. Unuseni ai baina abidia dae; unuseni ai emui harihari ġaudia bona emui herahia ġaudia hereadaedia na emui ai baina gwaurai, bona emui boubou ġaudia helāġadiā danu. ⁴¹ Bese idauidau bogaragidia amo baina hakaumui lasi bona lalodiae o karoho rohoroho tanodia amo baina gogomui negana ai, lau ese baina abimui dae, bonana namo ġauna na heto. Itelaġaq u umui bogaragimui ai baina hahedinaraia, bese idauidau vairadiai. ⁴² Bena Israel tanona, senemui na gwau henidia hamata baina henidia nato tanona, Ialonai baina hakaumui vareai negana ai, umui na ba diba lau na Iehova. ⁴³ Unuseni ai emui dala bona sibomui o hahemirolai karadia iboudiai na ba lalodia une; bena sibomui ba hedadarai, emui kara dika iboudiai daidiae. ⁴⁴ Bena lau ladagu bagunai baina kara henimui, dia emui dala dikadia eiava emui kara bodagadia heġereġeredia, negana ai umui ba diba lau na Iehova. Israel besena e, Ĝaubada Iehova na e herevamu.

⁴⁵ Iehova ena hereva na egu ai e kau, eto,
⁴⁶ Taunimanima natuna e, talaimu na diho kahana ba henia, diho kahana latanai ba haroro, bona diho kahana uda-tanona latanai ba peroveta. ⁴⁷ Hari diho kahana udana ba hamaoroa, baoto, Iehova ena hereva ba kamonai. Ĝaubada Iehova na ini e gwau tomamu: A itaia, oi lalomu ai lahi ta baina ha-araia; bena una lahi ese au mauridia iboudiai bona au masedia iboudiai na baine aradia ore; ta ese lahi hururu-hururuna basine habodoa, bona vaira iboudiai, diho kahana amo ela bona mirigini kahana, na baine

hodaridia. ⁴⁸ Taunimanima iboudiai na bae diba lau Iehova ese na ha-araia; bena ta ese basine habodoa. ⁴⁹ Bena lau nato, Ġaubada Iehova e, idia ese e herevalaigumu, e tomu “Ia na sivarai heğereğeredia igwauraidia tauna ani?”

21

Iehova ena dare

¹ Iehova ena hereva na egu ai e kau, eto,
² Taunimanima natuna e, talaimu na Ierusalem ba henia, bona gabu helağadiä latadai ba haroro. Israel tanona latanai ba peroveta; ³ Israel tanona ba hereva henia, baoto, Iehova ini e gwau tomamu: Lau ese oi na inai henimumu; egu dare na iudalaina pauana amo baina veria lasi, bena kara maoromaoro taudia bona kara dika taudia na oiemu amo baina utudia oho. ⁴ Badina be kara maoromaoro taudia bona kara dika taudia na oiemu amo baina utudia oho dainai, egu dare na iudalaina pauana amo baine lasi, taunimanima iboudiai, diho kahana amo ela bona mirigini kahana, ihadikadia totona. ⁵ Bena taunimanima iboudiai bae diba, lau Iehova ese egu dare na iudalaina pauana amo vada na veria lasi; ġauna na basine hetoi vareai lou. ⁶ Taunabunai, taunimanima natuna e, ba ganağana, mai daradokomu bona mai lalo-hisihisimu iditana ida ba ġanağana, idia vairadai. ⁷ Bena idia ese bae hereva henimu, baeto “Dahaka dainai o ġanağanamu?” negana ai, baoto “Ini hari daidiae. Baine kau negana ai, dara iboudiai bae doko, bona ima iboudiai bae manoka, lauma iboudiai bae daure, bona tui iboudiai bae manoka-manoka ranu na heto. A ilaia, ia na e maimu,

bona karana na baine ġuguru”. Ġaubada Iehova na e herevamu.

⁸ Bena Iehova ena hereva na egu ai e kau, eto, ⁹ Taunimanima natuna e, a peroveta, baoto, Iehova ini e gwau tomamu: Baoto

Dare ta, dare ta vada e segea,
vada e hakimore-kimorea danu;

¹⁰ vada e segea, ala-ala totona,
vada e hakimore-kimorea, kevaru na heto
baine kevaru-kevaru totona.

Eiava baita moale hebou a? Natugu e, hekwadi auna vada o dadaraia, bona au amo e kara ġaudia iboudiai danu. ¹¹ Taunabunai, dare na vada e henilao, bae hakimore-kimorea, bona imadia ai bae abia kau totona; vada e segea bona vada e hakimore-kimorea, ala-ala tauna iunana ai bae atoa totona. ¹² Taunimanima natuna e, a tai, a tai lolololo. Badina be ia na egu bese ihadikana bona Israel lohiadia iboudiai ihadikadia ġauna; idia na egu bese taudia ida vada e henilao, dare ena. Taunabunai, mamumu ba pata. ¹³ Badina be ia na dia hahetoho. Hekwadi auna boma dadaraia, ia ese dahaka bema havaraia diba? Ġaubada Iehova na e herevamu.

¹⁴ Taunabunai, taunimanima natuna e, ba peroveta; imamu ba pata dagu, bena dare na baine dapadapa nega harua, oibe nega hatoi, taunimanima iala-masedia darena, ia na heala-ala badana darena, e ġegedia ahumu ġauna. ¹⁵ Bena daradia na bae doko bona hutuma na edia ik-oukou iboudiai lalodiai bae hekida diho totona, lau ese dare kimore-kimorena vada na henilao; ia na kevaru na heto e kevaru-kevarumu; vada e hakimore-kimorea, ala-ala totona. ¹⁶ Idibamu ai

bona launmu ai ba lapalapa, emu dare isena e lapa henimu gabudia. ¹⁷ Lau ese danu imagu baina pata dagu, egu badu ġaraġarana baina haoreea. Lau Iehova vada na hereva.

¹⁸ Bena Iehova ena hereva na egu ai ma e kau, eto, ¹⁹ Taunimanuna natuna e, Babulono pavapavana ena dare daladia rua toadia ba kara; ruaosi na tano tamona amo baema. Bona toa auna ba haginia, hanua dalana badi-tanona ai. ²⁰ Dare ena mai dalana toana ba karaia; Raba, Amono taudia edia hanua, bona Iuda, bona Ierusalem, hanua mai maguna, baine mai henidia. ²¹ Badina be Babulono pavapavana na dala katakata ai e ginimu, dala ruaosi badi-tanodia baine bagu haoro totona; diba e rubediamu, ena dirava laulaudia e nanadaidiamu, ase ai toa e tahudiamu. ²² Ia imana idibana ai Ierusalem hanua e hedinaraimu, lolо-dagu ihavarana, hanua iduaradia igwadadia vaġomadia iato-hatadia, tano ilarebana, bona hanua iġegelaina kohorodia ihaginidia. ²³ A idia ese mamina bae abia, baguhaoro koikoina na heto; idia ese gwauhamata helāġadie vada e gwaurai; a ia ese edia kerere e hahelololaidia une, bae heabi mauri totona.

²⁴ Taunabunai, Ġaubada Iehova na ini e gwau tomamu: Badina be emui kerere ihelololaidia na taunimanima lalodiae vada o havaraia, bona emui kara kerere vada o hulalalaidia, bena emui kara iboudiae lalodiae emui dika e hedinaraimu, bona badina be umui na sibomui o helalo unemu, una dainai emui kara dika lalodiae bae abimui. ²⁵ Oi danu, Israel pavapavana, tau dikana, o hahemiro taumu, emu dina vada e kau, davamu bavabia vaitani negana vada e kau. ²⁶ Ġaubada

Iehova na ini e gwau tomamu: Kwara dabuana ba ruhaia oho, kwara ivavalaina ġauna ba kokia oho; harihari e miamu ġaudia na basie mia; henu ai e miamu ġauna na ba hadaea, atai ai e miamu ġauna na ba hadihoa. ²⁷ Baina havahua, baina havahua, baina havahua; sisina taina basine mia, ela bona ia biaguna korikorina bainema; bena ia baina henia.

Hahemaoro Amono taudia latadiai

²⁸ Taunimanima natuna e, ba peroveta, baoto, Ĝaubada Iehova ese Amono taudia mai edia hegonaġonalai herevadia ida ini e herevalaidia tomamu. Baoto: Dare ta, dare ta vada e veria lasi, ala-ala totona. Vada e hakimorekimorea, baine hururu-hururu bona baine kevaru-kevaru. ²⁹ Idia ese oi daimu ai e mata hanai koikoimu bona e bagu haoro koikoimu lalonai, una dare na kara dika taudia, e hahemiro taudia, aiodia ai baine heato; edia dina vada e kau, davadia bae abi vaitani. ³⁰ Iudalaina pauana lalonai ba udaia lou. E havaramu gabuna ai, emu vara tanona korikorina ai, lau ese baina hahemaoro henimu. ³¹ Egu badu na latamu ai baina bubua dobi; egu badu-ġaraġara lahina amo baina pururumu; daġedäge taudia, hahebua-tari mai dibadia taudia, imadia ai baina atomu. ³² Oi na lahi auna ai baina halaomu; oi raramu na tano bogaraginai baine mia; badina be lau Iehova vada na hereva.

22

Jerusalem ena kara dika

¹ Iehova ena hereva na egu ai ma e kau, eto, ² Oi danu, taunimanima natuna, ba hahemaoro hen

a? Ina hanua mai rarana ba hahemaoro henia a? Benaini, ena kara dika-rohorohodia iboudiai ba gwaurai henia. ³ Oi na baoto, Ğaubada Iehova na ini e gwau tomamu: Hanuana binai, bogarag-inai rara e hahebubuamu, ena nega baine kau helaoreana, bona kaivakuku e karamu, ia sibona ihamirolaina. ⁴ Oi na vada o kerere, vada o hahebubua rarana dainai; bona vada o miro, vada o kara kaivakukudia daidiae; emu nega vada o hak-wadogia, vada e gwaurai henimu lağanidiae vada e ore. Taunabunai, hedunirai ġauna ai vada na halamu, bese idau-idau ediae, bona heğonağonalai ġauna, tano iboudiae ediae. ⁵ Harimu dika-rohoroho ġauna, heloġo-ahuahu hanuana, e noho hetabiramu taudia bona daudaudia ai e nohomu taudia ese bae ġonağonalaimu.

⁶ A itaia, oi lalomu ai Israel lohiadia, ta ta ena siahu ena siahu heğereğerediae ai, lalodia na rara ihahebubuna vada e uralai bada. ⁷ Oi lalomu ai tama bona sina na e hahemataidiamu; oi bogaragimu ai noho hedoa tauna na gwaurai-lagau karadia amo e hahisiamu; oi lalomu ai ihareha bona vabu e kara dika henidiamu. ⁸ Egu ġau helagadiæ vada o dadaraidiae; egu dina helagadiæ vada o hamirodia. ⁹ Oi lalomu ai haida ese e hahebademu, rara ihahebubuna totona; oi lalomu ai haida ese ororo ai e ani rahimu; oi bogaragimu ai haida ese lebulebu karadia e karamu. ¹⁰ Oi lalomu ai haida ese tamadia ediae geda e hamirodiamu; oi lalomu ai hahine na ediae rara-kara dinadia ai e hahemaraidiamu. ¹¹ Ta na dekena tauna adavana ida e heuda hanaimu; ma ta na rava-maragi hahinena ida e eno boumu; ma ta oi lalomu ai na ia taihuna korikorina ida e eno

boumu. ¹² Oi lalomu ai haida ese dava e abimu, rara ihahebubuna totona; heatokau monidia o abimu, bona gvaurai-lagau karadia ai dekemu taudia o dadihaidia; vada o lalogu boio. Ģaubada Iehova na e herevamu.

¹³ Taunabunai, a itaia, lau ese imagu ruaosi na tutu hekapumu, moni vada o abi koikoi bona rara na bogaragimu ai vada e hebubu daidiae. ¹⁴ Bainā kara henimu dinadia ai na emu ha-heauka baine hesiriū eiava imamu bae goada a? Lau Iehova vada na hereva, bona karana do baina karaia. ¹⁵ Bainā hakarohomui, bese idau-idau bogaragidiae, bona tano idau-idau ai baina hakarohomui rohoroho; bona emu miro na bogaragimu amo baina ha-oreia. ¹⁶ Bena oi daimu ai lau ladagu baine miro bese idau-idau vairadiae; bena ba diba lau na Iehova.

¹⁷ Bena Iehova ena hereva na egu ai e kau, eto: ¹⁸ Taunimanima natuna e, Israel besena na momo ai vada ela lauegu ai; iboudiae na *silver* bona auri labora-laborana bona auri hururu-hururuna bona auri bona auri metauna lahi lalonai na heheto. Momo ai vada ela. ¹⁹ Taunabunai, Ģaubada Iehova na ini e gwau tomamu: Umui iboumui ai na momo ai vada o hahelao dainai, taunabunai, a itaia, lau ese Ierusalem bogaraginai baina haboumui. ²⁰ Taunimanima ese *silver* bona auri labora-laborana bona auri bona auri metauna bona auri hururu-hururuna na lahi ai e haboumu, bena lahi e hahururuuhururuamu idia ihavevedia totona, unuheto lau ese egu badu ai bona egu badu ġaraġara ai baina haboumui, lahi lalonai baina atomui vareai, baina havevemui. ²¹ Bainā haboumui, egu badu ġaraġara lahina ai baina

pururumui, bena ia bogaraginai ba veve oho.
22 *Silver* na lahi ai e haveveamu na heto, lau ese egu badu ai baina havevemui; bena ba diba lau Iehova ese egu badu na latamui ai vada na bubua dobi.

23 Bena Iehova ena hereva na egu ai e kau, eto, **24** Taunimanima natuna e, ba hamaoroa, baoto, Oi na asie ha goevai  tanona, eiava latanai badu dinana ai medu se diho tanona. **25** Ia bogaraginai ena lohia verina na e goumu bona damuna e dareamu leonana na heto; idia ese taunimanima edia mauri vada e ha-oredia; kohu namo-hereadia bona dava bada  audia vada e dadidia, hahine momo vada e havabudia ia bogaraginai. **26** Ena hahela a taudia ese egu taravatu vada e tataia utu, bona egu  au helag ad a vada e hamirodia;  au helag ad a bona  au asi helag ad a asie ha-idaudia, bona  au mirodia bona  au  oevq oev ad a vada e hatamonadia; bona egu dina helag ad a asie badinadia; unu amo idia ese lau ladagu vada e hamiroa. **27** Ena lohia verina ia bogaraginai na uda sisiadia na heheto; damudia e daremu, rara e hahebubuamu, bona taunimanima edia mauri e ha orediamu, unu amo kohu e  aunai.

28 Ena peroveta taudia danu ahu ai e hedahu, vada e mata hanai koikoi bona vada e bagu haoro koikoi idia daidiae; vada eto “Gaub a Iehova na ini e gwau tomamu”, a  au be Iehova se gwa. **29** Tano taudia ese dava vada e gwaurai lagau, bona dadidadi karadia vada e kara; ogo ami tauna bona e dabumu tauna vada e hahisidia, bona noho-hedoa tauna enai dava vada e gwau-

rai lagau, ena ġāu na asi iabi-louna dalana.

³⁰ Bena idia bogaragidiai tau ta na tahua, maġu baine haginia, bena e mauru gabuna ai lau vairagu ai baine gini, tano igimana totona baina habuaia tari na garina; a tau ta asina davaria. ³¹ Taunabunai, egū badu na idia latadiai vada na bubua dobi; egū badu-ġaraġora lahina ai vada na ha-aradia; edia kara davana vada na haloua, idia kwaradia ai. Ĝaubada Iehova na e herevamu.

23

Sivarai hegeregere: Tadikaka raruia

¹ Iehova ena hereva na egū ai e kau, eto, ² Taunimanima natuna e, hahine raruia e nohova, hahine tamona natuna. ³ Idia ese ariara karadia e karava, Aigupto ai; ulatodia ai ariara karadia e karava. Unuseni ai tatau haida ese kemedia e rosidia; bona ulato rami-heboudia ai ratadia e ġigidia. ⁴ Hane guna ladana na Ohola; ia tadina ladana na Oholiba. Lau ese na adavadia; bena idia ese natudia mamaruanedia bona hahinedia e havaradia. Ladadia anidia na iniheto: Ohola na Samaria, bona Oholiba na Ierusalem.

⁵ Ohola na lau adavagu negana ai, ia ese ariara karadia e karava; e ura heniava taudia, Asuria taudia, na e mata dika henidiava. ⁶ Idia na tuari taudia, dabua kakakakadia e hahedokilaiva; idia na hekwara taudia bona tuari lohiadia; iboudiai na eregabé taudia namo-hereadia, hosi ai e guiva taudia. ⁷ Ia ese e kara lebulebu henidia; iboudiai na Asuria taudia goeva-daedia; bona e mata dika henidia taudia iboudiai edia kaivakuku iboudiai ediai e hahemiro. ⁸ Ena ariara karadia, Aigupto ai e nohova dinadia amo vada e kara, na se

hadokodia; badina be ulatona ai tatau na ia ida e eno bou, bona ulato rami-hebouna ai idia ese ratana e ġigidia; bona e kara lebulebu henia. ⁹ Taunabunai, e ura heniava taudia, hari Asuria taudia, ia ese e mata dika henidia taudia, imadia ai na atoa. ¹⁰ Idia ese ena geda e hamiroa; ia natuna mamaruanedia bona hahinedia na e dabaidia tao, a ia be dare amo e alaia mase; hahemaoro na ia latanai vada e haġuguruu negana ai, ia na gwaurai-gwaurai herevana ai ela hahine bogaragidiai.

¹¹ Ina kara na ia tadina Oholiba ese e itaia, ġau tamona ia ese kakana e hereaia, ena mata dika ai bona ena ariara karadia ai; unu kara ai kakana na dika, a ia be dika herea. ¹² Ia ese Asuria taudia e mata dika henidia; hekwara taudia bona tuari lohiadia, edia auri dabuadie e hahedokilaiva taudia, edia hosi ai e guiva taudia, iboudiai na eregabe taudia namo-hereadia. ¹³ Bena na itaia, vada e miro vaitani; idia raruosi na dala tamona ai vada e raka. ¹⁴ A ia ese ena ariara karadia ma e habada; ia ese tatau laulaudia haba ai e raraidia, Kaldea taudia laulaudia, muramura kakakakana amo vada e tore ġaudia, ¹⁵ mai edia gaba ġaudia koekoedia ai bona edia kwara dabuadie kwardaia ai, iboudiai ita-itadia na lohia taudia, Kaldea taudia, Babulono tanona ai e nohomu taudia, laulaudia. ¹⁶ E itadia negana ai na e mata dika henidia; bena gwaukau taudia na dekedia e siaidia lao Kaldea ai. ¹⁷ Bena Babulono taudia na ia dekena ela, ia ida e eno bou, ela bona edia lebulebu karadia amo e hamiroa. E hamiroa murinai, ia ese e rakatanidia mai hedadaraina ida. ¹⁸ Ena ariara karadia e kara hedinarai bona tau-anina e heaġilaiia negana ai na na rakata-

nia mai hedadaraigu ida, kakana na rakatania heğereğerenä. ¹⁹ To, ia ese ena ariara karadia e habada, hane-ulatona negana e laloa tao; una negana ai ia ese ariara karadia e karava Aigupto tanona ai; ²⁰ unuseni ai ia e ura heniava taudia, taudia reğedia na doniki reğedia na heheto bona natudia na hosi natudia na heheto taudia, na ia ese e mata dika henidia. ²¹ Unuheto hane-ulato ai Aigupto taudia ese kememu e rosia bona ratamu e ġġi negana ai lebulebu karadia o karava na oi ese o lalodia tao, mai lalo-hekisehekisemu ida.

²² Taunabunai, Oholiba e, Ġaubada Iehova na ini e gwau tomamu: A itaia, e ura henimumu taudia, mai hedadaraimu ida o rakatanidia taudia, na baina hatoredia isi, kaha iboudiai amo baina haboudia, oi ihadikamu totona: ²³ Babulono taudia bona Kaldea taudia iboudiai, Pekodo bona Soa bona Koa taudia, bona Asuria taudia iboudiai idia ida, iboudiai na eregabe taudia namohereadia bona hekwara taudia bona tuari biagudia, lohia taudia bona tuari taudia, iboudiai danu hosi gui taudia. ²⁴ Idia na oi ihadikamu totona miragini kahana amo baema, mai edia kariota bona edia rerue bona edia oreia taudia hutuma ida. Idia ese bae koumu heğeğe, mai edia keme auridia bona edia kesi bona edia kwara ġaudia, bona siahu baina henidia bae hanemaoro, bena edia hahemaoro herevadia amo bae hahemaoro henimu. ²⁵ Bena egū badu na baina siai henimu, edia badu ġaraġara ai bae kara henimu totona. Idia ese udu-baubaumu bona taiamu bae utudia oho, bona emu roho-mauri taudia na dare ai bae mase. Idia ese natumu mamaruanedia bona hahinedia bae dabaidia tao, bona emu roho

mauri taudia na lahi ese baine aradia ore. ²⁶ Idia ese danu emu dabua bae hadokidia oho, bona emu herahera nadidia namo-hereadia bae abidia oho. ²⁷ Unuhetomana lau ese emu lebulebu bona emu ariara karadia, Aigupto amo o mailai, na baina hadokodia; una dainai, Aigupto taudia na basio gaga dae henidia lou, bona basio lalodia tao lou. ²⁸ Badina be Ģaubada Iehova na ini e gwau tomamu: A itaia, lau ese o inai henidiamu taudia, mai hedadaraimu ida o rakatanidia taudia, imadia ai baina atomu; ²⁹ bena dağedağe ai bae kara henimu, emu hekwarahi anina idoinai bae abia oho, gagaemu ai bae rakatanimu, bena emu ariara karadia anidia korikori bae hedinarai. Emu lebulebu bona emu ariara karadia ese ³⁰ ina kara na latamu ai vada e hadihoa, badina be bese idau-idau ida ariara karadia o kara, bona edia kaivakuku ediai o hahemiro. ³¹ Kakamu ena dala ai vada o raka; taunabunai iena kehere na oi imamu ai baina atoa. ³² Ģaubada Iehova na ini e gwau tomamu:

Kakamu ena kehere amo ba inu,
ia na bada bona dobu;
bae kirikirilaimu, bae ġonaġonalaimu,
badina be anina na bada;
³³ kekerobona lalo-hisihisi ese
bae hahonumu.

Kakamu Samaria ena kehere na
gari-bada bona lauma-daure keherena;

³⁴ ba inua, anina ba ha-orea;
huimu ba tapusia bona kememu ba kakasia.
Badina be Ģaubada Iehova na e tomu, Lau vada na hereva. ³⁵ Taunabunai, Ģaubada Iehova na ini e gwau tomamu: Badina be vada o lalogu boio bona murimu ai vada o negegu, una dainai

emu lebulebu bona emu ariara karadia davadia bavabi.

³⁶ Iehova ese e hamaorogu, eto, Taunimanima natuna e, Ohola bona Oholiba ba hahemaoro henidia a? Benaini, edia kara dika-rohorohodia ba gwaurai henidia. ³⁷ Badina be idia na vada e heuda hanai, bona rara na imadia ai; edia kaivakuku ida vada e heuda hanai; bona natudia mamaruanedia, lauegu amo e abidia memerodia, na boubou karana ai idia e henidia, adia. ³⁸ Ina danu vada e kara henigu: dina tamona ai egu gabu helāgāna bona egu dina helāgādīa vada e hamirodia. ³⁹ Badina be natudia e aladia mase, edia kaivakuku iboulaidia ġaudia ai e halaodia, dinana lalonai idia ese egu gabu helāgāna lalonai e didi vareai, bae hamiroa totona. A itaia, egu dubu aiunu e kara toma. ⁴⁰ Idia ese danu gwaukau tauna ta e siaia lao, dauha amo tatau haida baema; bena vada ema. Idia daidiae o digu, matamu o ouda, bona taumu o haheraia; ⁴¹ ege-dihopatana namo-hereana ai o helai; ia vairanai pata ta o atoa, bona egu muramura mai bonana bona egu dehoro na pata latanai o atodia. ⁴² Hutuma edia moale reġedīa na taiana ai; bona gunika taudia na tano ġaġaena amo e hakaudia mai, kekerotaudia; bena vaġivagi na hahine imadia ai e atodia, bona havava ġaudia mai hairaidia na kwaradia e havavalaidia.

⁴³ Bena lau nato, Tatau na ia ida e eno boumu negadia ai, idia na asie heuda hanaimu a? ⁴⁴ Badina be idia na ia dekenai vada e raka vareai, haida ese ariara hahinena dekenai e raka vareaimu na heto. Ohola bona Oholiba dekediai unu e raka vareai toma, bae kara lebulebu totona.

⁴⁵ A ka a maoromaoro taudia ese bae hahemaoro henidia, heuda-hanai hahinedia bona rara ihahe-bubuna hahinedia davadia bae henidia; badina be idia na heudahanai hahinedia, bona rara na imadia ai.

⁴⁶ Badina be Ĝaubada Iehova na ini e gwau tomamu: Tuari oreana ba hakaua mai, gari ihavarana ĝauna ai bona dadidadi ĝauna ai ba halaodia. ⁴⁷ Bena hari tuari oreana taudia ese nadi amo bae hododia bona edia date amo bae aladia mase; natudia mamaruanedia bona hahinedia danu bae aladia mase, bona edia ruma bae doudia. ⁴⁸ Unu amo lebulebu karadia na tano ai baina hadokodia, hahine ese nahuadia bae toho totona, bena lebulebu karadia basie kara, umui vada o kara heğereğeredia. ⁴⁹ Bena emui lebulebu davana do bavabia, bona emui kara dikai ai kaivakuku o toma henidia diho na davadia bavabi; bena vada ba diba lau na Ĝaubada Iehova.

24

Hereva heğereğerenə: Uro mai değideğina

¹ Lağāni ihataurahani-tana huana ihagwautana dinana ihagwautana lalonai, Iehova ena hereva na egu ai e kau, eto, ² Taunimanima natuna e, Ina dina, hari ina dina, ladana ba toreia; Babulono pavapavana ese Ierusalem vada e koua heğeğe, hari ina dina ai. ³ Hereva heğereğerenə na ina gwau-edeede besena ba gwaurai henia, baoto, Ĝaubada Iehova na ini e gwau tomamu:
Uro ba laia kau, ba laia kau;
ranu na ia lalonai ba seia danu.
⁴ Hidio taidia ba uda dobi,
namodia, koekoe bona pağā;

turia namo-hereadia amo ba hahonua.

⁵ Mamoe ġoeva-đaena ta bavabia,
lahi audia ba rakudia,
hidio taidia ba nadudia,
mai turiana ida ba nadua.

⁶ Taunabunai, Ĝaubada Iehova na ini e gwau tomamu: Hanua mai rarana madi ihabaina! Uro mai değideğina, değideğina do asie negea ġauna, madi ihabaina! Hidio taidia taidia na ia lalona amo ba vai dae, namodia bona dikadia basio hididia. ⁷ Badina be rarana, vada e hebulu ġauna, na dounu ia bogaraginai; nadi latanai e atoa, tano ai se bubua bena ġahu ese se tahunia. ⁸ Egu badu ihavarana bona dava iabina totona, ia ese e ha-hebulua rarana na lau ese nadi latanai vada na atoa, basine hetahuni helaoreana. ⁹ Taunabunai, Ĝaubada Iehova na ini e gwau tomamu: Hanua mai rarana madi ihabaina! Lau ese danu senu baina habadaia. ¹⁰ Lahi audia momo ba raku, Iahi ba ha-araia, hidio ba nadua namonamo, vasiahu ba seia oho, turia ba haġoledia oho. ¹¹ Bena asi anina ai gida latadiai bavatoa kau, baine siahу totona, bena aurina labora-laborana na baine kiama-kiama; bena mirona na baine veve ia lalonai, bona değideğina na baine ara ore. ¹² Vada na hekwarahi kava; ia değideğina udunanana lahi ai se oremu. ¹³ Değideğina na oiemu lebulebu miro-hereana. Badina be bama haġoevamu, to emu miro badana amo asio goeva; basio ġoevaġoeva lou ela bona egu badu na baina hagugurua latamu ai. ¹⁴ Lau Iehova vada na hereva; ina na baine vara, lau ese baina karaia; lau na basina helalo lou, basina hebo-gahisi, basina helalo kerehai. Emu dala bona emu

kara heğereğeredia ai baina hahemaoro henimu.
Gaubada Iehova na e herevamu.

Esekiel adavana e mase

¹⁵ Iehova ena hereva na egu ai ma e kau, eto, ¹⁶ Taunimanima natuna e, mata-kunumai tamona ai oi matamu ihamoalena baina abia oho, ġau tamona lalomu basine hisihisi bona basio tai, bona iruru-matamu basie diho. ¹⁷ Ba hahodi, to basio ġanaġana; mase taina basio tai. Dabua na kwaramu ba kumilaia, bona tamaka na aemu ai ba kara; udumu basio ġovajia, bona basio ani helaġa. ¹⁸ Taunabunai, daba ai lau ese taunimanima na hereva henidia, bena adorahi ai adavagu na e mase. Bena daba rerena ai, e haġanigu heğereğerenā ai na kara.

¹⁹ Bena taunimanima ese e nanadaigu, eto, Ini ġau anidia emai ai, bona ini o kara karadia anidia, basio hamaoromai a? ²⁰ Bena na haere henidia, nato, Iehova ena hereva na egu ai e kau, eto, ²¹ Israel besena ba hamaoroa, baoto, Ġaubada Iehova na ini e gwau tomamu: A itaia, egu gabu helaġana baina hamiroa, emui siahū iheagħilaina toana, matamui ese e moalelaiamu ġauna, laumamui ese e uralaiamu ġauna; bena natumui mamaruanedia bona hahinedia unuseni ai o rakatanidia na dare amo bae mase. ²² Benalluegu kara heğereğerenā ai do ba kara; udumui basio ġovadja bona basio ani helaġa. ²³ Kwaramui dabuadja na kwaramui ai bae mia, bona emui tamaka na aemui ai bae mia; lalomui basie hisihisi bona basio taitai, a emui kara havara ai ba varoda-varoda, bona ba heġanaġana heheni. ²⁴ Unuhetomana, Esekiel na toa ta ai bainela emui

ai, ia ese e kara karadia iboudiai heğereğeredia, umui ese ba kara. Ina na baine kau negana ai, ba diba lau na Ĝaubada Iehova.

²⁵ iBona oi, taunimanima natuna e, edia gabu aukana, edia moale bona edia hairai, matadia ese e moalelaiamu bona lalodia ese e uraliamu ĝauna, bona natudia mamaruanedia bona hahinedia danu, na edia amo baina abidia oho dinana ai, ²⁶ una dina ai heau tauna ta na dekemu bainema, hari baine hamaorolaimu. ²⁷ Una dina ai, udumu baine hekeho una heau tauna enai; vada ba hereva, basio mu lou. Unu amo oi na toa ta ai baola, idia ediai; bena bae diba lau na Iehova.

25

Peroveta herevana Amono taudia latadai

¹ Iehova ena hereva na egu ai e kau, eto,
² Taunimanima natuna e, talaimu na Amono taudia ba henidia, bona idia latadai ba peroveta.
³ Amono taudia ba hamaorodia, baoto, Ĝaubada Iehova ena hereva ba kamonai. Ĝaubada Iehova na ini e gwau tomamu: Badina be umui oto “Aha” egu gabu helāgāna latanai, bona Israel tanona latanai, e havahua negana ai, bona Iuda besena latanai, dauhai e hanoho negana ai; ⁴ una dainai lau ese mairiveina kahana taudia imadia ai na atomuimu, idia ese edia ai bae halaomui, bona bogaragimui ai bae taruha bona bae noho; idia ese emui au-huahua bae ani bona emui rata bae inu. ⁵ Raba na kamelo edia rei gabuna ai baina halaoa, bona Amono taudia edia hanua na mamoe seridia edia mağu ai baina halaodia. Bena ba diba, lau na Iehova. ⁶ Badina be Ĝaubada

Iehova na ini e gwau tomamu: Badina be imamui vada o tutu bona aemui vada o pana, bona emui badu lalonai Israel tanona ihadikana o moalelaia,⁷ una dainai, a itaia, imagu na vada na toia roro, umui ihadikamui, bona bese idau-idau imadia ai baina atomui, edia ai bae halaomui; bena bese idau-idau edia amo baina negemui daure, bona tano idau-idau lalodia amo baina hamasemui, baina habuamui tari. Bena ba diba, lau na Iehova.

Peroveta herevana Moab latanai

⁸ Gaubada Iehova na ini e gwau tomamu: Badina be Moab eto “A itaia, Iuda besena na bese idau-idau iboudiai heğereğeredia”,⁹ una dainai lau ese Moab igimana na kaha ta amo baina abia oho, ena tano hetoana hanuadia amo baina abia oho; unu na tano hairaina, Bet-iesimoto, Baal-meono, Kiriataimi.¹⁰ Una tano, Amono taudia ida, na mairiveina kahana taudia baina henidia, edia ai bae halaoa, bena bese idau-idau bogaragidiai ta ese basine laloa tao lou;¹¹ bona Moab na baina hahemaoro henia. Bena idia na bae diba lau na Iehova.

Peroveta herevana Edom latanai

¹² Gaubada Iehova na ini e gwau tomamu: Badina be Edom ese Iuda besena taudia edia dağedağe e hadava henidia, bona e kerere dikadika idia ihadava-henidia ai,¹³ una dainai Gaubada Iehova na ini e gwau tomamu: Lau ese imagu na baina toia roro, Edom ihadikana, taunimanima bona ubu-ubu ǵaudiā na iena amo baina negedia daure. Bainā havahua; bena Teman amo ela bona Dedan idia na dare ai bae mase.¹⁴ Egu hahedava-heni na Edom latanai

baina atoa kau, egu bese Israel taudia imadia ai; Edom ai bae ġaukara, egu badu bona egu badu-ġaraġara heġereġeredia ai; bona egu hahedava-heni bae diba. Ġaubada Iehova na e herevamu.

Peroveta herevana Filistia taudia latadai

¹⁵ Ġaubada Iehova na ini e gwau tomamu: Badina be Filistia taudia na e hahedava hen, bona edia badu ai hahedava-hen karadia e kara, miahana ihanai heinai-hehenina ai bae hahebua tari totona; ¹⁶ una dinai Ġaubada Iehova na ini e gwau tomamu: A itaia, lau ese imagu na baina toia roro Filistia taudia ihadikadia, bona Kerete taudia baina negedia daure, bona kone kahana orena na baina habuaia tari. ¹⁷ Lau ese hahedava-hen badana baina karaia idia latadai; mai badugu ida davadia baina henidia. Bena egu hahedava-hen na latadai baina atoa negana ai, idia na bae diba lau na Iehova.

26

Peroveta herevana Turo latanai

¹ Laġani ihagwauta-tana lalonai, hua dinana gini-gunana ai, Iehova ena hereva na egu ai e kau, eto, ² Taunimanima natuna e, badina be Turo ese Ierusalem e herevalaia, eto “Aha, taunimanima edia ikoukou vada e makohi, egu ai vada e hekeho; ia vada e vahu dainai lau baina namo lou”; ³ una dainai Ġaubada Iehova na ini e gwau tomamu: Turo e, a itaia, lau ese na inai henimumu. Bese momo baina mailaidia oi ihadikamu, davara ese hurehurena na e mailaidiamu na heto. ⁴ Idia ese Turo maġudia bae ġigidia dobi, bena kohorodia bae haheġiġidia tari, bena lau ese tanona baina tahia oho, nadina mo baine

kikiri. ⁵ Ia na davara bogaraginai baine mia, reke itoredia gabuna ai bainela. Lau, Ģaubada Iehova, vada na hereva. Bena ia na bese idau-idau damudia ai bainela; ⁶ bona ia natuna hahinedia tanobada ai na dare ese baine aladia mase. Bena bae diba lau na Iehova.

⁷ Badina be Ģaubada Iehova na ini e gwau tomamu: A itaia, mirigini kahana amo Nebukadresara, Babulono pavapavana, pavapava edia pavapava, mai ena hosi bona ena kariota bona ena hosi-gui taudia bona ena tuari taudia hutuma herea ida, baina mailaidia, Turo latanai. ⁸ Ia ese natumu hahinedia tanobada ai na dare amo baine aladia mase. Ia ese mağu ta amo baine koumu heğege, bona tano baine larebaia bona kesi momo bae duduidia isi oi ihadikamu. ⁹ Ena vagomä amo mağumu baine hamakohidia, bona ena ira amo kohoromu baine hagaridia. ¹⁰ Ena hosi bae hutuma herea dainai, aedia kahudia ese bae govamu. Ia na ikoukoumu amo baine raka vareai, ta ese mağuna e hamaurua hanuana ai bema raka vareai heğereğerenä; una negana ai hosi-gui taudia bona rerue bona kariota reğedia ese mağumu bae haheude-heudedia. ¹¹ Ena hosi aedia amo ia ese ariaramu iboudiai baine moimoilaidia; emu taunimanima iboudiai ia ese baine aladia mase, emu au-tubua auka-hereadie na tano ai bae moru. ¹² Idia ese emui tağä na bae dadidia oho, bona emui hoihoi kohudia na damudia ai bae halaodia; mağumu bae gigi dobi, bona emui rumä namo-hereadie bae habuadia tari; emui nadi bona emui au bona emui uma tanodia na davara lalonai bae negedia dobi. ¹³ Emui ane reğedia baina hadoko; emui

gitara reğedia na basie hekamonai lou. ¹⁴ Nadi kikiri ai baina halaomu; reke itoredia gabuna ai ba hahelao; nega ta ai basie haginimu lou; badina be lau Iehova vada na hereva. Ĝaubada Iehova na e herevamu.

¹⁵ Gaubada Iehova ese Turo na ini e hereva henia tomamu: Ba moru negana ai na bae bero taudia bae ganağana, bona ala-ala na baine bada bogaragimu ai; una negana ai kone tanodia na basie heude-heude a? ¹⁶ Bena davara lohiadia iboudiai na edia terono amo bae diho, edia hahe-doki badadia bae atodia tabe bona edia hahedoki mai heraheradia bae dokidia oho. Mai heude-heudedia ida edia dabua bae hahedokilai; tano ai bae helai; nega idoinai bae heude-heude bona oi daimu ai bae gari. ¹⁷ Bena oi latamu ai bae rohe ahu, bae hamaoromu, baeto:

Mai harimu hanuana e,

davara ai vada o boio, madi, ihabaimu!

Davara ai o auka herea,

oi bona inoholaimu taudia danu;
oi ese tanobada tanodia iboudiai
o hagaridia dikadika.

¹⁸ Harihari, emu moru dinana ai,
motumotu na e heude-heudem;
oibe, davara motumotudia na e garimu,
oi vada o boio dainai.

¹⁹ Badina be Ĝaubada Iehova na ini e gwau tomamu: Hanua ahutuna ai baina halaomu, asie noholaidiamu hanuadia heğereğeredia, bona gadobada ai baina hamutumu bena ranu badadia ese bae habubunimu; ²⁰ una negana ai baina dorimu dobi, Guri Badana ai e dihomu taudia ida, sene taudia dekediai; bona tanobada henuna gabuna ai baina hanohomu, idau nega ai e heğigi

dobi hanuadia bogaragidiai, Guri Badana ai e dihomu taudia ida. Taunabunai, ta ese basine noholaimu, bona mauri taudia edia tano ai basio mia. ²¹ Dala dika-rohorohona amo baina hadokomu, bena ba puki oho; ena be bae tahumu, to nega ta ai basie davarimu lou. Ģaubada Iehova na e herevamu.

27

Rohe-ahu Turo latanai

- ¹ Iehova ena hereva na egu ai e kau, eto,
- ² Taunimanima natuna e, harihari Turo latanai ba rohe ahu. ³ Turo, davara raka-lasi ai e miamu hanuana, kone tanodia momo taudia edia hoihoi gabuna, ba hereva henia, baoto, Ģaubada Iehova na ini e gwau tomamu:
Turo e, vada o hereva, oto
“Hairaigu na ġoeva-dæ”.
- ⁴ Oi hetoamu na davara bogaragidiai,
oi ikaramu taudia ese hairaimu e haġuġurua.
- ⁵ Aumu iboudiai na beroso audia,
Seniri ororona amo e abidia.
Sida auna ta Lebanon amo e abia,
au-tubuamu ikaralaina.
- ⁶ *Oak** audia Basan amo na
oi baramu e karalaidia.
Oi reireimu na teasuru audia amo e karadia,
Kupro kone-tanodia amo e abi ġaudia;
bena aivori† amo e haheradia.
- ⁷ Dabua aukana mai heraherana na
Aigupto amo e abia;

* **27:6:** Beroso bona teasuru na au ladadia, Heberu gado ai. Oakna au ta ladana English gado ai. † **27:6:** Aivori na elefant doadia amo e abimu ġauna.

unu amo oi laramu e karaia,
bona pepemu danu.

Dabua vaiuridia bona kakakakadia Elisa kone-tartodia amo na
dina siahuna ilao-ahuna e karalaia.

⁸ Sidono taudia bona Aravada taudia na emu bara
taudia;
idibaka taudia Semere amo na oi lalomu ai,
idia na emu tari taudia.

⁹ Gebala tau-badadia bona ena idibaka taudia na
oi lalomu ai,
idia ese reireimu e demadia.

davara lagatoidia iboudiai na oi lalomu ai,
bona lagatoi taudia danu emu hoihoi kohu-dia e hoihoilai.

¹⁰ Parasa bona Lud bona Put taudia na emu
tuari taudia, emu tuari oreana lalonai; kesi bona
auri kwara ġauna na oi lalomu ai e taudia dae;
idia edia amo hairaimu o abia. ¹¹ Aravada bona
Heleke taudia na maġumu latadiae e gini heġeġe,
bona Gamada taudia na kohoromu ai; idia ese oi
maġumu heġeġe-madai ai edia kesi e taudia dae;
oi hairaimu na vada e haġuġurua.

¹² Tarasisi taudia na emui ai e hoihoiva,
emui kohu idau-idau momo herea daidiae; silver
bona auri bona auri haraga-haragana bona
auri metauna na e henimui, emui hoihoi ġaудia
davadia. ¹³ Iavan bona Tubal bona Meseik taudia
na emui ai e hoihoiva taunimanima bona auri
labora-labora ġaудia na e henimui, emui hoihoi
ġaудia davadia. ¹⁴ Bete-togarama taudia ese hosi
bona tuari hosidia bona doniki na e henimui,
emui hoihoi ġaudentia davadia.

¹⁵ Rodo taudia na emui ai e hoihoiva; kone
tanodia momo lalodiae emui hoihoi gabudia e

miava; idia ese elefant doadia bona eboni audia e matlai, emui ġau davadia.[‡] **16** Edom na emui ai e hoihoiva, emui kohu momo herea daidiae; idia ese samarago[§] nadidia bona dabua kakakakadia bona dabua mai heraheradia bona dabua aukadia namo-hereadie bona ramoto bona kadokodo nadidia e henimui, emui hoihoi ġaudia davadia. **17** Iuda bona Israel tanona taudia na emui ai e hoihoiva; idia ese uit, olive, suke huahuadia matamatadia, bada-ranuna, dehoro bona muramura mai bonana e henimui, emui hoihoi ġaudia davadia.

18 Damasko taudia na emui ai e hoihoiva, emui kohu momo herea bona emui taġa bada-hereā ġau idau-idau ai daidiae; idia ese Helebono ena vine ranuna, bona mamoe huina kurokurona **19** bona vine ranuna Usala amo e henimui, emui hoihoi ġaudia davadia; o hoihoilai ġaudia haida na auri hururu-hururuna bona kida bona kane.** **20** Dedan taudia na emui ai e hoihoiva, edia hoihoi ġaudia na hosi dorudia dabuadie. **21** Arabia bona Kedara lohiadia Iboudiai edia hoihoi ġaudia na o uralai bada: ġaudia na mamoe natudia bona mamoe mamaruanedia bona nani; ini ġau na emui ai e hoihoilaiva.

22 Sieba bona Raama edia hoihoi taudia na emui ai e hoihoiva; idia ese aniani mamidia ihanamolaidea muramuradia namo-hereadie idau-idau bona herahera nadidia idau-idau iboudiai bona *gold* e henimui, emui hoihoi ġaudia davadia. **23** Haran bona Kane bona

[‡] **27:15:** Eboni be au aukana namo hereana ta. [§] **27:16:** Samarago bona ramoto bona kadakodo na herahera nadidia haida ladadia. ** **27:19:** Kida bona kane na Heberu taudia edia muramura ladadia.

Eden bona Asuru bona Kilimada taudia na emui ai e hoihoiva. ²⁴ Idia ese hahedoki namohereadia, bona dabua vaiuridia, bona dabua mai heraheradia, bona dabua gedadia, oromadia idau-idau ġaudia, e loku ġoevāġoeva ġaudia, na emui ai e hoihoilai. ²⁵ Tarasisi lagatoidia na o vatudia, emui hoihoi ġaudia bae loalai totona. Taunabunai oi na o honu honu daeva, madunamu e metauva, davara bogaragidiai;

²⁶ emu bara taudia ese vada e baramu lao, gadobada ai; laurabada ese vada e hamutumu, davara bogaragidiai.

²⁷ Emu taġa, emu kohu, emu hoihoi ġaudia, emu neseriki taudia bona emu tari taudia, emu demadema taudia, emu hoihoi taudia, bona emu tuari taudia iboudiai lalomu ai, mai emu orea idoinai, bogaragimu ai e nohomu oreana, ida, ibouboudiai na davara bogaragidiai e mutumu, ihabua-tarimu diñana ai.

²⁸ Emu tari taudia edia tai e hekamonaimu negana ai, tano idoinai e heude-heudem;

²⁹ bona bara taudia iboudiai na edia lagatoi amo e dihomu.

Neseriki taudia bona tari taudia iboudiai na kone ai e ginimu;

³⁰ idia ese oi taimu e taimu, e tai dikadikamu;

ġahu na kwaradia ai e peta kaum, bona kahu ai e hekui-hekuimu.

³¹ Oi daimu ai huidia e naudiamu, bona puse dabuadia e riodiamu;

oi taimu e taimu, mai lalo-iditadia ida,
 mai lalo-hisihisi idita-hereadia ida.
 32 Edia taitai ai e herohe-ahulaimumu;
 daimu ai e herohe ahumu, e tomu:
 Nega ta ai daika na e hebua tari davara bogarag-
 inai,
 Turo na heto a?
 33 Emu hoihoi kohudia na davara kahadia idau-
 idau amo ema negadai na
 bese momo taudia lalodia o hamoaledia;
 emu kohu momo bona emu hoihoi ġaudia amo
 tanobada pavapavadia o hatāġalaidia.
 34 Harihari davara ese vada e hamutumu,
 dobu masemasedia ai;
 emu hoihoi kohudia bona emu neseriki taudia
 iboudiai na
 oi ida vada o mutu.
 35 Kone tañodia taudia iboudiai na
 oi daimu ai kudoudia e hetahamu;
 edia pavapava na e gari dikadikamu,
 vairadia na e haroromu.
 36 Bese idau-idau edia hoihoi taudia ese e nuku
 henimumu;
 mai garimu ida vada o baia,
 vada ba boio vaitani ela bona hanaihanai.

28

Peroveta herevana Turo pavapavana latanai

1 Iehova ena hereva na egu ai e kau, eto,
 2 Taunimanima natuna e, Turo pavapavana ba
 hamaoroa, baoto, Ġaubada Iehova na ini e gwau
 tomamu:
 Badina be lalomu na e hekokorokumu,
 oto “Lau na dirava ta,
 dirava edia helai gabudia ai na helaimu,

davara bogaragidiai”;
 āgau tamona, ena be oi na o tomu
 emu aonega na dirava ta ena aonega
 heğereğerena,
 to oi na taunimanima mo, dia dirava.
 3 (Momokani, emu aonega ese Daniel ena aonega
 na e hereaiamu,
 āgau hehunina ta na emu ai se hehunimu;
 4 emu aonega bona emu lalo-parara dainai,
 oi ese emu tağɑ vada o davaria;
 bona *gold* bona *silver* vada o haboudia,
 emu habou-habou rumadia lalodiae;
 5 emu aonega bada hoihoi karadia ai dainai,
 oi ese emu tağɑ vada o habadaia;
 bona lalomu na vada e hekokoroku,
 emu tağɑ dainai.)
 6 Una dainai, Āgaubada Iehova na ini e gwau
 tomamu:
 Badina be o laloamu emu aonega na
 dirava ta ena aonega heğereğerena,
 7 una dainai, a itaia, idau taudia na
 latamui ai baina mailaidia,
 mai garidia besedia;
 idia ese edia dare bae veridia lasi,
 emu aonega hairaina ihadikana,
 bena oi hairaimu bae hamiroa.
 8 Idia ese guri ai bae dorimu dobi,
 e aladiamu taudia edia mase ai ba mase,
 davara bogaragidiai.
 9 Ena be oi na taunimanima mo, dia dirava,
 e haberomumu taudia imadia ai,
 to bae alamu mase taudia vairadiae
 dounu baoto “Lau na dirava ta” a?
 10 Asie peritimedia taudia edia mase ai ba mase,

idau taudia imadia ai.
 Ğaubada Iehova na e tomu,
 Lau vada na hereva.

Rohe-ahu Turo pavapavana lat O lai

- ¹¹ Iehova ena hereva ma ta egu ai e kau,
 eto, ¹² Taunimanima natuna e, Turo pavapavana
 latanai ba rohe ahu. Ba hereva henia, baoto,
 Ğaubada Iehova na ini e gwau tomamu:
 Oi na o ġoeva-dae vaitani,
 aonega ai o honumu,
 oi hairaimu na herea dae.
- ¹³ Oi na Eden, Dirava ena imea, lalonai o nohova;
 herahela nadidia idau-idau iboudiai ese e
 ġovamu:
 sadio, topasio, iaspi,
 krusolito, berulio, onuku,
 sapairo, barekete, samarago;
 iseisedia na *gold* amo e kara,
 o koro ġaudiā danu na *gold*.
 Oi e karamu dinana lalonai
 idia na e kara hata.
- ¹⁴ Kerubi ta na horoa, oi igimamu kerubina ai
 bainela,
 oi na Dirava ena ororo helāgāna ai
 amu nadidia padapadadia amo o raka.
- ¹⁵ Oi na asi emu kerere, emu dala iboudiai lalo-
 diai,
 e karamu dinana amo
 ela bona kara havara na lalomu ai e vara.
- ¹⁶ Emu hoihoi karadia momo herea lalodiae
 dağedäge ese e hahonumu, bena o kara dika;
 una dainai Dirava ena ororo amo na negemu
 dobi,
 ġau mirona na heto;

bena hari hegima kerubina ese
 amu nadidia padapadadia amo e lulumu lasi.
 17 Lalomu na e hekokorokuva, raho-namomu
 dainai;
 emu aonega o hamiroava, hairaimu dainai.
 Tano ai na tahomu dobi,
 hanua pavapavadia vairadai na
 hahemaraimu,
 bae raraimu totona.
 18 Emu kara havara momo herea,
 bona emu kara gageva-gageva,
 emu hoihoi ai o karava karadia, amo
 emu gabu helāgadīa o hamirodia;
 una dainai oi bogaragimu amo lahi na ha-araia,
 bena e golemu oho;
 kahu ai na halaomu tano ai,
 e raraimuva taudia iboudiai vairadai.
 19 Bese idau-idau bogaragidai e dibamu taudia
 iboudiai na
 oi daimu ai e gari takumu;
 mai garimu ida vada o ore,
 vada ba ore vaitani.

Peroveta herevana Sidono latanai

20 Iehova ena hereva na egū ai e kau, eto,
 21 Taunimanima natuna e, talaimu na Sidono ba
 henia, ia latanai ba peroveta, 22 baoto, Ĝaubada
 Iehova na ini e gwau tomamu:
 Sidono e, a itaia, lau ese na inai henimumu;
 oi bogaragimu ai hairaigu baina hahedi-
 naraia.
 Bena ia lalonai hanemaoro karadia baina kara
 bona ia lalonai helāgagu baina hahedinaraia
 negana ai,
 idia bae diba lau na Iehova.

²³ Badina be dai-hanai gorerena na ia lalonai baina siaia,
 bona rara danu, ia ariarana lalodiae;
 bena bae aladia mase taudia na ia bogaraginai
 bae hekida bou,
 e hahegegea daemu darediae amo;
 bena idia na bae diba
 lau na Iehova.

²⁴ A Israel besena taudia na ava ġiniġinina ta eiava au ġiniġinina ta ese basine hahisidia, idia dekedia taudia, vada e dadaraidia taudia, iboudiae bogaragidiae. Bena idia bae diba lau na Gaubada Iehova.

²⁵ Gaubada Iehova na ini e gwau tomamu: Israel besena taudia na bogaragidiae vada e karoho rohoroho besedia lalodia amo ma baina gogodia bona egu helaġa idia lalodiae na bese idau-idau vairadien baina hahedinaraia negana ai, idia na edia tano korikori, egu hesiae tauna Iakob na henia tanona, lalonai bae noho. ²⁶ Una tano lalonai bae noho namonamo; ruma bae hagini dia bona vine imeadia bae hado. Lau ese dekedia taudia, vada e dadaraidia taudia, iboudiae baina hahemaoro henidiae negana ai, idia na bae noho namonamo. Bena idia bae diba lau na Iehova, edia Dirava.

29

Peroveta herevana Aigupto latanai

¹ Laġani ihagwautana huana ihagwautana dinana ihagwauta-ruana lalonai, Iehova ena hereva na egu ai e kau, eto, ² Taunimanima natuna e, Farao, Aigupto pavapavana, na vairamu ba hua henia, bona ia latanai bona

Aigupto idoinai latanai ba peroveta,³ baoto,
Āaubada Iehova na ini e gwau tomamu
 A itaia, lau ese na inai henimumu,

 Aigupto pavapavana Farao e,
 huala badana,
 ena sinavai bogaragidiai e hekuremu,
 e tomu “egu Nilo Sinavaina na lauegu,
 lau ese na karaia”.

⁴ Lau ese hmai amo aukimu baina gaua,
 bona emu sinavai gwarumedia na kopimu ai
 baina hakamodia kau;
 bena emu sinavai bogaragidia amo baina verimu
 lasi,
 emu sinavai gwarumedia iboudiai, kopimu
 ai e hekamo kaumu ġaudia, ida.

⁵ Bena tano ġāġaena ai baina negemui,
 oi bona emu sinavai gwarumedia iboudiai;
 tano paka ai ba moru,
 ta ese basine gogomui, basine gurimui.
 Tano boromadia bona atai manudia baina hen-
 dia,
 adia ai baola.

⁶ Bena Aigupto inoholaina taudia iboudiai na
 bae diba, lau na Iehova. Badina be oi na siriho
 itotohina, Israel enai; ⁷ imadia ai e dogomu tao
 negana ai o kwaidu, pagadia iboudiai e helada
 oho; bona emu ai e tabe kau negana ai o kwaidu,
 bena koekoedia iboudiai e herogi-herogi. ⁸ Una
 dainai Āaubada Iehova na ini e gwau tomamu: A
 itaia, dare na latamu ai baina mailaia, tauniman-
 ima bona ubu-ubu ġauna na oiemu amo baina
 negedia daure; ⁹ bena Aigupto tanona na baine
 hebua tari bona baine vahu. Bena idia na bae
 diba, lau na Iehova.

Badina be oi oto “Nilo sinavaina na lauegu, lau ese na karaia”, ¹⁰ una dainai, a itaia, lau ese na inai henimumu, bona emu sinavai na inai henidiamu, bona Aigupto tanona na baina havahua bona baina habuaia tari, Migdol amo ela bona Suene, ela bona Etiopia tano-hetoana. ¹¹ Tau ta aena ese basine rakaia hanai bona boroma ta aena ese basine rakaia hanai: asi inoholaina ai baine mia lağāni hari-ahui lalodai. ¹² Lau ese Aigupto tanona baina habuaia tari, vada e hebua tari tanodia bogaragidiai; bona hanuana iboudiai bae hebua tari, lağāni hari-ahui lalodai, e vahumu hanuadia bogaragidiai. Lau ese Aigupto taudia baina hakarohodia rohoroho, tano idau-idau lalodai.

¹³ Badina be Ĝaubada Iehova na ini e gwau tomamu: Lağāni hari-ahui bae ore, bena Aigupto taudia na bogaragidiai vada e karoho besedia lalodia amo ma baina gogodia; ¹⁴ bena Aigupto ena noho namo baina havaraia lou, bona Pataro tanona, edia sene tanona, Ialonai ma baina hakaudia vareai lou; unuseni ai idia na basileia maragina ai baela. ¹⁵ Basileia iboudiai bogaragidiai ia na baine maraḡi herea; nega ta ai basileia idau-idau daediae basine heaḡi lou; baina hamaragidia herea dainai, idia ese nega ta ai basileia idau-idau na basie biagudia lou. ¹⁶ Bena Israel besena taudia ese basie abidadama henidia lou, bona edia hekaha iabina totona basie kara havara lou. Bena idia bae diba lau na Ĝaubada Iehova.

¹⁷ Lağāni iharuahui-hituna huana gini-gunana dinana ginigunana lalonai, Iehova ena hereva na egu ai e kau, eto, ¹⁸ Taunimanima natuna e,

Nebukadresara, Babulono pavapavana, ese ena tuari oreana e siaia, Turo ituarihenina baine ha-aukaia totona; kwara iboudiai e haboha, bona pa a iboudiai e hatoto;  au tamona ia bona ena tuari oreana ese  au ta Turo amo asie abia, ituarihenina ai e hekwarahiva davana. ¹⁹ Taunabunai,  aubada Iehova na ini e gwau tomamu: A itaia, lau ese Aigupto tanona na Nebukadresara, Babulono pavapavana, baina henia; ia ese kohuna namodia baine laohai, baine dadihaia, ia damu ana ai baine halaoa; unu amo ena tuari taudia davadia baine henidia. ²⁰ Lau ese Aigupto tanona vada na henia, ena hekwarahi davana, badina be idia na lauegu ai e  aukara.  aubada Iehova na e herevamu.

²¹ Una dina ai lau ese doa ta baina hatubua Israel besena ena, bona oi udumu bibinadia baina hapapa, idia bogaragidiai. Bena idia bae diba lau na Iehova.

30

Aigupto ihabua-tarina

- ¹ Iehova ena hereva na egu ai e kau, eto,
- ² Taunimanima natuna e, a peroveta, baoto,  aubada Iehova ini e gwau tomamu:
A tai lolololo, aoto
“Dina madi ihabaina!”
- ³ Badina be una dina vada e kahikahimu,
Iehova ena dina vada e kahikahimu;
ia na ori momo dinana,
bese idau-idau ihabua-taridia dinana.
- ⁴ Dare ta na Aigupto latanai baine kau,
Ialo-hisihisi bada-herea na Etiopia ai baine vara,

bae aladia mase taudia na Aigupto ai bae hekida
diho,
bona taḡāna bae huaiā lao,

bona ena abdiholo bae heḡīgi dobi, negana ai.

⁵ Etiopia bona Put bona Lud bona Arabia
idoinai bona Libia taudia, bona idia ida e ġaukāra
heboumu taudia, na idia ida dare ai bae mase.

⁶ Iehova na ini e gwau tomamu:
Aigupto e duruamu taudia na bae hekida
diho,
bona ena hekokoroku taudia na bae moru;
Migdol amo ela bona Suene
idia na dare ai bae mase, ia lalonai,
Ğaubada Iehova na e herevamu.

⁷ Ia na baine vahu, vada e vahu tanodia bogaragidai,
ena hanua danu, vada e heḡīgi dobi hanuadia
bogaragidai.

⁸ Bena Aigupto baina ha-araia
bona iduruna taudia iboudiai bae darere
negana ai,
idia na bae diba lau na Iehova.

⁹ Una dina ai gwaukau taudia na mai heau-
dia ida lauegu amo baela, Etiopia taudia bae
hahebolorudia; bena lalo-hisihisi bada-herea na
latadiai bae kau, Aigupto ihabua-tarina dinana
ai; badina be, a itaia, dinana be e maimu.

¹⁰ Ğaubada Iehova na ini e gwau tomamu:
Aigupto tagana baina ha-oreea,
Nebukadresara, Babulono pavapavana,
imana amo.

¹¹ Ia mai ena oreea taudia, hahegari bada-herea
oreana bese idau-idau bogaragidai,

tano ihabua-tarina totona baina havareaidia;
 bena edia dare bae veridia lasi, Aigupto
 ihadikana,
 tano na hirua amo bae hahonudia.
¹² Lau ese Nilo sinavaina baina hakororoa,
 tano na baina hoia, kara dika taudia ediai;
 tano mai anina idoinai baina havahuradia,
 idau taudia imadia amo.
 Lau Iehova vada na hereva.

¹³ Ģaubada Iehova na ini e gwau tomamu:
 Kaivakuku baina habuadia tari
 bona dirava laulaudia baina ha-oredia
 Memefisi ai;
 Aigupto tanona ai pavapava ta basine noho lou,
 unu amo gari baina havaraia Aigupto tanona
 ai.
¹⁴ Pataro na baina havahua,
 Soan na baina doua,
 bona hahemaoro karadia na
 Tebe latanai baina kara.
¹⁵ Pelusio, Aigupto ena gabu aukana, latanai
 egu badu ġaraġara na baina bubua dobi,
 bona Tebe ena hutuma baina negedia daure.
¹⁶ Aigupto baina doua,
 Pelusio na baine hisihisi bada herea;
 Tebe na bae hamaurua,
 maġuna na bae heġġi dobi.
¹⁷ Ono bona Pibesete edia eregabe taudia na dare
 ai bae mase,
 bona hahinedia na iġuidia ai bae laohaidia.
¹⁸ Tehafenehe ai dina na baine dibura,
 Aigupto ena siahunuseni ai baina hadar-
 era negana ai;
 ena siahun, e heaġilaiamu ġauna, na baine ore,

ori ta ese baine ġovaiā ahu;
 bona natuna hahinedia na iġuidia ai bae
 laohaidia.

19 Unuhetomana lau ese hahemaoro karadia
 baina kara Aigupto latanai,
 bena idia na bae diba lau na Iehova.

20 Laġoni ihagwauta-tana huana gini gunana
 dinana ihahituna ai, Iehova ena hereva na egu
 ai e kau, eto, **21** Taunimanima natuna e, Farao,
 Aigupto pavapavana, imana vada na hakwaidua;
 a itaia, ihanamona totona ikumi dabuana amo
 bema kumia, bena bema auka, dare iġaukaralaina
 heġereġerena, a ta ese se kumia. **22** Taunabunai
 Ĝaubada Iehova na ini e gwau tomamu: A itaia,
 lau ese Farao, Aigupto pavapavana, na inai he-
 niamu, ia imana ruaosi baina hakwaidudia, mai
 goadana ġauna bona e kwaidu guna ġauna; bena
 dare na imana amo baina hamorua. **23** Aigupto
 taudia baina hakarohodia bese idau-idau bogar-
 agidiae, baina hakarohodia rohoroho tano idau-
 idau lalodiae. **24** Babulono pavapavana imana
 baina ha-aukadia, bona egu dare na ia imana ai
 baina atoa; a Farao imana na baina hakwaidudia,
 bena ia na ia vairanai baine ġaṇaġana, mase
 berona e davaria tauna na heto. **25** Babulono
 pavapavana imana baina hagoadadia, a Farao
 imana na bae hedabarai; bena idia na bae diba
 lau na Iehova. Egu dare na Babulono pavapavana
 imana ai baina atoa negana ai, ia ese Aigupto
 tanona baine dudui henia; **26** bena Aigupto taudia
 baina hakarohodia bese idau-idau bogaragidiae,
 baina hakarohodia rohoroho tano idau-idau lalo-
 diai. Bena idia na bae diba lau na Iehova.

31

Hereva heğereğerena: Sida auna badana

¹ Lağani ihagwauta-tana huana ihatoina dinana ginigunana ai, Iehova ena hereva na egu ai e kau, eto, ² Taunimanima natuna e, Farao, Aigupto pavapavana, mai ena hutuma ida, ba hamaorodia, baoto:

Emu herea-dae ai
oi na daika heğereğerena?

³ A itaia, lau ese Lebanon sida-auna ta ida baina haheğereğeremu,
mai rigina namo-hereadia bona mai ikerukeruna ida;
ia na ġaulatalata,
dorina na ori lalodai.

⁴ Ranu ese e ubua,
ranu dobudia ese e halataia,
e hadoa gabuna na
sinavaina ese e ha-arua heğeğe,
sinavai-sinavaidia na e ha-arudia lao,
uda audia iboudiai ediai.

⁵ Taunabunai ia na e tubu daga dae,
uda audia iboudiai e lahedia tao,
rigina na e tubu badabada,
e tubu latalata,
ranu momo na tuhutuhuna ai e dae dainai.

⁶ Atai manudia iboudiai ese
edia rumna ia rigina ai e kara;
ia rigina henudiai tano paka boromadia iboudiai
ese
natudia e havaradia;
ia ikerukeruna ai
bese badadia iboudiai na e nohova.
⁷ Vada e bada herea bona rigina na lalata dainai
ia hairaina na herea;

badina be ramuna na e diho e laova,
ranu momo gabudia ai.

⁸ Dirava ena imea sida-audia ese asie hereaia,
bona beroso audia rigidia ese ia rigina asie
hereadia;

tidara* audia rigidia na ġau pipikidia,
ia rigina ida asie heğereğere.

Dirava ena imea ai asi auna ta
mai hairaina ia hairaina heğereğeren.

⁹ Lau ese rigina momo amo
na hahairaia;

Eden audia iboudiai,
Dirava ena imea ai e varava ġaudia, ese
ia e vägeğe henia.

¹⁰ Taunabunai, Ġaubada Iehova na ini e gwau
tomamu: Badina be ia na e tubu daga dae ela
bona dorina na ori lalodiai, bona lalona ese ena
lata e heağilaia, ¹¹ una dainai lau ese bese idau-
idau edia siahu-herea tauna imana ai baina atoa;
ia ese ena kara dika davana baine henia. Lau ese
vada na negea daure. ¹² Idau taudia, hahegari
herea besena, ese baine utua, bena baine rakata-
nia. Ia rigina na ororo ai bona koura iboudiai
lalodiai bae moru; rigina haida na kwaidudia
ai bae mia, tano ena koupa iboudiai lalodiai;
tanobada besedia iboudiai na ia ikerukeruna
amo bae raka lasi, bae rakatania. ¹³ Hegigidobina ai, atai manudia iboudiai na ia latanai bae
noho, bona tano paka boromadia danu ia rigina
latadi. ¹⁴ Ini kara anidia be sinavai isedia audia
haida basie tubu daga dae ela bona doridia na ori
lalodiai bona ranu e inumu audia haida edia lata

* **31:8:** “Beroso” bona “tidara” na au rua ladadia, Heberu gado ai.

na idia edia lata ida basie hegeregere helaoreana; badina be iboudiai na bae mase, taunimanima bogaragidiai baela, mase gabuna ai, guri ai e dihomu taudia ida.

¹⁵ Gaubada Iehova na ini e gwau tomamu: Mase gabuna ai baine diho negana ai, lau ese ranu dobudia baina haiganidia, bae tailaia; bona sinavaina baina laodia ahu, ranu momo danu bae helao ahu. Lebanon na baina havaburaia, ia dainai, bona tano paka audia iboudiai na ia dainai bae marai. ¹⁶ Mase gabuna ai baina negea dobi, guri ai e dihomu taudia ida, negana ai, lau ese bese idau-idau baina haheude-heudedia, ena moru guruna amo; bona Eden audia iboudiai, Lebanon audia namo-hereadia, ena abi-hidi audia, ranu e inumu gaudia iboudiai, na tauhalo bae davaria, mase gabuna ai. ¹⁷ Idia danu ia ida mase gabuna ai bae diho, dare ai e mase taudia ida; oibe, bese idau-idau bogaragidiai ia ikerukeruna ai e nohova taudia na bae mase. ¹⁸ Taunabunai, Eden audia bogaragidiai oi na edena hegereggerena, hairai ai bona herea-dae ai? Eden audia ida mase gabuna ai do ba diho; asie peritomedia taudia ida, dare ai e mase taudia ida, do ba hekure.

Gaubada Iehova na e tomu, Farao mai ena hutuma ida na unuheheto.

32

Herohe-ahu Farao latanai

¹ LaGANI ihagwauta-ruana huana ihagvauta-ruana dinana gini-gunana ai Iehova ena hereva na egu ai e kau, eto, ² Taunimanima natuna e,

Farao, Aigupto pavapavana, latanai ba rohe ahu,
ba hereva henia, baoto:

Oi na o laloamu oi na leona ta, bese idau-idau
bogaragidiai,

a oi na davara hualana na heto;
emu sinavai lalodai o sese dae roha,
aemu amo ranu o halamiriamu,
bona edia sinavai ranudia o haduhudiamu.

3 *Gaubada* Iehova na ini e gwau tomamu:

Egu ole na latamui ai baina taho a kau,
bese idau-idau hutuma bada edia amo,
bena egu ole ai bae verimu vareai kone ai.

4 Tano ai baina tahomu dobi,
tano paka ai baina negemu;
atai manudia iboudiai baina siadia,
latamu ai bae roho roho kau;
tanobada idoinai ena uda boromadia bogadia na
oiemu amo baina hakunudia.

5 Oi hidiomu na ororo ai baina hapetapetalaia,
oi tau-animu amo koura baina hahonudia.

6 Oi raramu baina ha-arua,
tano idoinai baine utua dae ela bona ororo,
koupa na ba hahonudia.

7 Bainā habuamu tari negana ai guba baina
gōvaiā ahu,
bona hisiuna baina hadiburadia;
dina na ori amo baina gōvaiā ahu,
bona hua na basine diari.

8 Guba diaridia iboudiai na oi daemu ai baina
hadiburadia,
bona emu tano baina havaburaia.
Gaubada Iehova na e herevamu.

9 Bese idau-idau bogaragidiai, asi dibamu tan-
odia lalodai, mai iguimu ida baina laohaimu
negana ai, bese momo taudia kudoudia baina

hahetahadia. ¹⁰ Bese momo baina hagaridia taku oi bagumu ai, bona edia pavapava bae heude-heude oi daimu ai, egu dare baina hahelado henidia negana ai; bae heude-heude loulou, ta ta ena mauri ena mauri bagudiai, emu moru dinana ai. ¹¹ Badina be Ģaubada Iehova na ini e gwau tomamu: Babulono pavapavana ena dare na oi latamu ai baine kau. ¹² Emu orea taudia hutuma na goada taudia edia dare amo baina hamasedia, bese idau-idau bogaragidiai e gari henidia badamu taudia iboudiai bunu.

- Aigupto ena heāgi bae ha-oreea,
 ena orea taudia hutuma bae mase.
¹³ Ena ubu-ubu ġaudia iboudiai baina habuadia
 tari,
 ranu gabudia momo badibadidiai;
 taunimanima aedia ese unu gabu basie
 moimoilaidia lou,
 ubu-ubu ġaudia-aedia ese danu basie moidia
 tao.
¹⁴ Bena edia ranu gabudia baina hanegaridia,
 bona edia sinavai baina ha-arudia dehoro na
 heto,
 Ğaubada Iehova na e helevamu.
¹⁵ Aigupto tanona baina havahua,
 bona tano anina idoinai baina abia oho,
 bona e noholaiamu taudia iboudiai baina rahu-
 dia mamase negana ai,
 idia bae diba lau na Iehova.
¹⁶ Unu bae rohe ahu toma; bese idau-idau
 hahinedia ese bae rohe ahu; Aigupto latanai bona
 ena taunimanima hutuma latadiae bae rohe ahu.
 Ğaubada Iehova na e herevamu.

17 Lağani ihagwauta-ruana huana gini-gunana dinana ihagwauta-imana ai, Iehova ena hereva na egu ai e kau, eto: **18** Taunimanima natuna e, Aigupto ena orea taudia hutuma taidia ba tai, bona ba siaidia diho, idia bona bese herea-daedia hahinedia danu, mase gabuna ai bae diho, guri ai vada e diho taudia dekediai.

19 Daika na hairai ai o hereaiamu?

A diho lao, asie peritomedia taudia ida bae hahekuremu.

20 Idia na dare ese e aladia mase taudia bogaragidai bae hekida diho, bona ena orea taudia hutuma iboudiai na ia ida bae hekure. **21** Lohia herea-daedia ese idia bona idurudia taudia na mase gabuna bogaragina amo bae herevalaidia, baeto “Asie peritomedia taudia na vada e diho, e hekuremu, asie marere-mareremu; dare ese vada e aladia mase”.

22 Asuria na unuseni ai, ena orea idoinai danu; edia gara ese e gegea daemu, iboudiai na dare ai e mase taudia mo. **23** Edia gara na guri dobumasemasena ai e miamu, bona ena orea ese ena gara e gegea daemu; iboudiai, gunaguna mauri taudia edia tano ai hahegari karadia e karava taudia, na dare ai vada e mase.

24 Elam na unuseni ai, bona ena orea taudia hutuma iboudiai ese iena gara e gegea daemu. Iboudiai na dare ai e mase; do se heperitome ai idia na mase gabuna ela. Gunaguna idia ese mauri taudia edia tano ai hahegari karadia e karava; harihari guri ai e dihomu taudia ida e hemarai heboumu. **25** Idia ese ena hekure gabuna vada e lailaia, e aladia mase taudia bogaragidai,

ia mai ena orea taudia hutuma iboudiai ida; edia gara ese e ġeġea daemu, iboudiai na do se heperitome taudia, dare ai e mase taudia mo. Badina be idia igari-henidia vada e hepiu rohoroho, mauri taudia edia tano ai; idia na guri ai e dihomu taudia ida e hemarai heboumu, e aladia mase taudia ida e atodiamu.

²⁶ Meseck bona Tubal na unuseni ai, mai edia orea taudia hutuma ida; edia gara ese e ġeġedia daemu. Iboudiai na do se heperitome taudia, dare ai e mase taudia mo. Badina be idia ese mauri taudia edia tano ai hahegari e havaraia rohoroho. ²⁷ Idia na sene edia goada-herea taudia ida asie hekure heboumu. Unu na mai edia tuari ġaġidja ida mase gabuna ai e diho, edia dare ai e haheKwinadia bona edia kesi na turiadia latadijal heheato; badina be goada-herea taudia edia hahegari na mauri taudia edia tano ai e miava. ²⁸ Taunabunai ba makohi, dare ese e aladia mase taudia ida bahekida diho, do se haheperitome taudia bogaragidai.

²⁹ Edom na unuseni ai, ena pavapava bona ena lohia iboudiai. Idia na goada dikadika, to dare ai e mase taudia ida vada e hahekuredia. Idia na se haheperitome taudia, guri ai e dihomu taudia, ida e hekuremu.

³⁰ Mirigini kahana lohiadia iboudiai na unuseni ai, bona Sidono taudia iboudiai danu. Idia na e aladia mase taudia ida nda e hemarai heboumu, edia goada ese e havaraia hahegarina idoinai dainai. Idia na do se haheperitome ai e hekuremu, dare ai e mase taudia ida; idia na guri ai e dihomu taudia ida e hemarai heboumu.

³¹ Ġaubada Iehova na e tomu: Farao ese baine itadia negana ai, ia na sibona tauhalo baine

davaria, ena orea taudia hutuma daidai; oibe, Farao mai ena tuari oreana idoinai, dare ai e mase taudia, daidai. ³² Badina be ia ese hahegari e piua rohoroho, mauri taudia edia tano ai; una dainai ia na do se haheperitome taudia bogaragidia bae hahekurea, dare ai e mase taudia, Farao mai ena orea taudia hutuma iboudiai, ida. Ĝaubada Iehova na e herevamu.

33

Kito tauna ena ĝaukara

¹ Iehova ena hereva na egu ai e kau, eto,
² Taunimanima natuna e, emu bese taudia ba hamaorodia, baoto, Dare na tano ta latanai bama mailaia, bena una tano taudia ese tau ta idia bogaragidia amo bema abia hidi, edia gima tauna ai bema halaoa; ³ bena una tau ese dare na tano latanai e kaumu ai bema itaia negana ai, kibi bema hiriria, taunimanima ihadibadia: ⁴ una negana ai ta ese kibi reĝena bema kamonai to bema noho hedavauhe, bena dare na bema mai, ena maun bema abia oho; ia rarana na ia sibona kwarana ai baine mia. ⁵ Kibi reĝena e kamonai, to e noho hedavauhe; ia rarana na ia sibona latanai. A bema hedaraunelaia, bena ena mauri bema rauaia. ⁶ A gima tauna ese dare ena mai bema itaia, to kibi basinema hiriria, bena taunimanima na basiema diba, bena dare na bema mai, idia ta bema alaia; una tau na ena dika ai baine mase, a ia rarana davana na gima tauna enai baina gwauraia.

⁷ Taunabunai, taunimanima natuna e, lau ese Israel besena igimana tauna ai vada na halaomu; lau udugu herevana ta ba kamonai negadia

iboudiai na lau ladagu ai do ba sisibalai henidia.
⁸ Kara dika tauna bama hamaoroa, bama toma “Kara dika taumu e, oi na vada ba mase,” bena oi ese basioma hereva henia, basioma sisiba henia, ena dala amo baine raka siri totona; bena una kara dika tauna na ena dika ai baine mase, a ia rarana davana na oiemu ai baina gwauraia. ⁹ A kara dika tauna boma sisiba henia, ena dala amo baine raka siri totona, bena ia na ena dala amo basinema raka oho, ia na ena dika ai baine mase, a oi na emu mauri do ba rauaia.

Dirava ena dala na maoromaoro

¹⁰ Taunimanima natuna e, oi ese Israel besena taudia ba hamaorodia, baoto, Umui vada oto “Emai kerere bona emai kara dika na latamai ai, bena unu daidai taumai e varoda-varodamu; ede baia mauri toma?” ¹¹ Ba hamaorodia, baoto, Ģaubada Iehova na e herevamu, e tomu: Lau na maurimu heğereğerena, lau ese dika tauna ena mase asina moalelaiamu, a dika tauna na ena dala amo baine raka siri bena baine mauri, una na na moalelaiamu. A lou, emui dala dikadia amo a lou! Israel besena e, anina be dahaka ba mase? ¹² Taunimanima natuna e, oi ese emu bese taudia ba hamaorodia, baoto, Kara maoromaoro tauna ena kara maoromaoro ese basine hamauria, baine kerere negana ai; bona kara dika tauna ena kara dika ese basine haketao, ena kara dika amo baine raka siri negana ai. Kara maoromaoro tauna na ena kara maoromaoro dainai basine mauri, baine kara dika negana ai. ¹³ Ena be kara maoromaoro tauna na hamaoroamu ia na do baine mauri, to ena kara maoromaoro bema abidadama henia bena bema kara havara, bena ena kara maoromaorodia ta basine helalo tao, a

ia na ena kara havara ai baine mase. ¹⁴ Ina danu, ena be kara dika tauna na hamaoroamu, na tomu “Oi na do ba mase”, to ena kara dika amo bema raka oho, taravatu henunai bema noho bona kara maoromaorodia bema kara; ¹⁵ bema kara dika tauna ese gwauhamata davana ma bema haloua bona vada e dadi ġaudia bema heni lou, bona mauri haheganidia ai bema raka bona basinema kara havara, bena ia na do baine mauri; ia na basine mase. ¹⁶ Ena kara dikadia ta basine helalo tao, ia ihadikana; ia na taravatu henunai vada e kara maoromaoro, ia na do baine mauri.

¹⁷ Ĝau tamona, emu bese taudia na e tomu “Ĝaubada ena dala na dia maoro”; a ĝau be idia sibodia edia dala na dia maoro. ¹⁸ Kara maoromaoro tauna na ena kara maoromaoro amo baine raka oho, bena baine kara havara, ia na una kara dainai baine mase. ¹⁹ Bona kara dika tauna na ena kara dika amo baine raka oho bona taravatu henunai baine kara maoromaoro, ia na una kara dainai baine mauri. ²⁰ Ĝau tamona umui na o tomu “Ĝaubada ena dala na dia maoro”. Israel besena taumui e, lau ese baina hahemaoro henimui, ta ta ena kara ena kara heğereğeredia ai.

Jerusalem e darere harina

²¹ Emai noho-hedoia laġanina ihagwauta-ruana huana ihagwautana dinana iha-imana lalonai, Ierusalem amo e heau mauri tauna ta na dekegu ema, eto, Hanua na vada e darere. ²² Heau mauri tauna na do se gini dae ai, adorahi ai Iehova imana na latagu ai e kau; bena daba ai, hari tau na dekegu ai e kau negana ai, Iehova ese udugu

vada e kehoa guna; taunabunai, udugu vada e hekeho, egu mu negana vada e ore.

²³ Bena Iehova ena hereva na egu ai e kau, eto, ²⁴ Taunimanima natuna e, gabu ġaġaedia e noholaimu taudia Israel tanona lalonai na e hereva louloumu, e tomu, Abraham na tau tamona, to ia ese tano e ġaunaia; a ai na hutuma, matona, tano na bae henimai, vada baia ġaunaia. ²⁵ Taunabunai ba hamaorodia, baoto, Ĝaubada Iehova na ini e gwau tomamu: Hidio na mai rarana ida o aniamu, bona emui kaivakuku o gaga dae henidiamu, bona rara o hahebubuamu, matona, tano ba ġaunaia a? ²⁶ Dare amo o ala-alamu, kara dika-rohorohodia o karamu, bona umui iboumui ai na ta ta dekena tauna dekena tauna adavadia ida o heuda hanaimu; matona, tano ba ġaunaia a? ²⁷ Ini ba hamaorodia toma, baoto, Ĝaubada. Iehova na ini e gwau tomamu: Lau na maurimu heġereġerena, gabu ġagaedia ai e nohomu taudia na dare ai do bae mase; bona tano paka ai e nohomu tauna na uda boromadia baina henidia, idia ese bae ania; bona gabu aukadia ai bona kohua lalodiae nohomu taudia na dai-hanai gorerena ese baine hamasedia. ²⁸ Tano na baina havahua, tano ġaġaena ai bainela; ena siahu, e heaġilaiamu ġauna, na baine ore; Israel ororodia bae ġaġae vaitani dainai ta ese basine rakadia hanai. ²⁹ Bena edia kara dika-rohorohodia iboudiae daidiae lau ese tano na baina havahua, tano ġaġaena ai baina halaoa, negana ai idiu na bae diba, lau na Iehova.

³⁰ A, taunimanima natuna e, oiemu bese taudia ese rumu habadia badibadidiae bona rumu iduaradia ai oi e hereva heboulaimumu, e hereva

hehenimu, ta ta ese tadikakana tadikakana e hamaorodiamu, e tomu, Aoma, Iehova ena amo e maimu herevana be dahaka vada ba kamonai. ³¹ Idia na e vasimu, taunimanima na e hegogomu na heheto, bena oi vairamu ai e helaimu, lauegu orea na heto; bena oiemu hereva na e kamonaimu, to karana basie karaia; badina be udu-dia bibinadia amo lalokau herevadia momo e gwauraimu, to lalodia ai idia sibodia edia tāga ihabadana daladia e haeromu. ³² A itaia, idia ediai oi na lalokau anedia e abimu tauna na heto, gadona na namo-hereia, bona gitara e hataia āgoevāgoevāmu; badina be emu hereva bae kamonai, to karana basie karaia. ³³ Ina na bainema negana ai, (bona ia na momokani bainema), bena idia na bae diba peroveta tauna ta na bogaragidiai vada ema.

34

Peroveta herevana Israel iregūna taudia latadai

¹ Iehova ena hereva na egu ai e kau, eto,
² Taunimanima natuna e, Israel iregūna taudia latadai ba peroveta. Ba peroveta, iregūna taudia ba hereva henidia, baoto, Ģaubada Iehova na ini e gwau tomamu: Israel iregūna taumui e, sibomui o heubumu taumui! Mamoe iregūdia taudia na mamoe basie ubudia a? ³ Umui ese digara o animu, bona mamoe huidia dabuadia o hahe-dokilaimu, bona ubu-ubu ġaudia o aladiamu; a mamoe na asio ubudiamu. ⁴ Manoka taudia asio hagoadadia, gorere taudia asio hanamodia, ae-hedairike taudia aedia asio kumidia, e raka oho taudia asio hakaudia lou, e boio taudia asio

tahudia, a mai siahumui bona mai dagedagemui ida vada o biagudia. ⁵ Taunabunai idia na e karoho rohoroho, badina be asi ireğudia ta; bona uda boromadia iboudiai ediai e hahelao. ⁶ Egu mamoe na e karoho rohoroho, oIoro badadia gabaedia ai bona ororo marağidıa doridia ai e loa eva-eva; egu mamoe na tanobada kopina idoinai latanai e karoho rohoroho, bona ta ese se tahudia davari.

⁷ Taunabunai, mamoe ireğudia taumui e, Iehova ena hereva ba kamonai. ⁸ Ĝaubada Iehova na e tomu: Lau na maurimu heğereğerenä, badina be egu mamoe na uda boromadia iboudiai adia ai vada e hahelao, asi ireğudia dainai; bona badina be egu mamoe ireğudia taudia ese egu mamoe asie tahudia, a mamoe ireğudia taudia na sibodia e heubu, egu mamoe asie ubudia; ⁹ una dainai, mamoe ireğudia taumui e, Iehova ena hereva ba kamonai. ¹⁰ Ĝaubada Iehova na ini e gwau tomamu: A itaia, lau ese mamoe ireğudia taudia na inai henidiamu; egu mamoe na ediai baina gwaurai; mamoe iubudia ai baina hadokodia; mamoe ireğudia taudia na sibodia basie heubu lou. Egu mamoe na ududia amo baina rauadia, adia aniani ai basie halaodia.

¹¹ Badina be Ĝaubada Iehova na ini e gwau tomamu: A itaia, lau sibogu ese egu mamoe baina tahudia ela bona baina davaridia. ¹² Mamoe ireğudia tauna ese ena mamoe serina baine tahua davari, ena mamoe haida vada e karoho rohoroho negana ai, una heğereğerenä ai lau ese egu mamoe baina tahudia davari; bona dagadaga bona dibura masemase dinana ai e

karoho rohoroho gabudia iboudiai amo baina rauadia. ¹³ Bese idau-idau bogaragidia amo baina hakaudia lasi, bona tano idau-idau lalodia amo baina gogodia, edia tano korikori lalonai baina hakaudia vareai. Bena Israel ororodia ai baina ubudia, ranu-lohilohi gabudia badibadidiai, bona taunimanima ese tano ai e noholaimu gabudia iboudiai lalodiai danu. ¹⁴ Rei namona gabudia ai baina ubudia; Israel ororodia doridia ai rei bae ani; unuseni ai rei namona gabudia ai bae hekure, bona rei namo-hereana bae ania, Israel ororodia ai. ¹⁵ Ĝaubada Iehova na e tomu: Lau sibogu ese egu mamoe baina regudia bona baina hahekuredia. ¹⁶ Boio ĝaudia na baina tahudia davari, bona e raka eva-evamu ĝaudia baina hakaudia lou, bona ae-hedairike ĝaudia aedia baina kumidia; manoka ĝaudia baina hagoedadia, bona mai digaradia bona mai goadadia ĝaudia na baina gimadia, hahemaoro ĝoevaĝoeva ai baina ubudia.

¹⁷ Ĝaubada Iehova na e tomu: egu seri e, a itaia, lau na mamoe padadiai na hahemaoromu, bona mamoe mamaruanedia bona nani mamaruanedia padadiai. ¹⁸ Rei namona o aniamu na dia heğereğere, una dainai emui rei orena na aemui amo o moia taomu a? Ranu negari-negarina o inuamu na dia heğereğere, bena orena na aemui amo o haduhuamu a? ¹⁹ Lauegu mamoe ese aemui amo o moia tao reina bae ania bona aemui amo o haduhua ranuna bae inua a?

²⁰ Taunabunai, Ĝaubada Iehova na ini e gwau henidia tomamu: A itaia, lau sibogu na mamoe mai digaradia bona mamoe varodadia padadiai baina hahemaoro. ²¹ Badina be ohemui bona

paḡamui amo o hebibimu, bona manoka ġaudia iboudiai na doamui amo o bibidia ohomu, ela bona o hakarohodia rohorohomu; ²² una dainai egu mamoe serina baina hamauria. Idia na damu ai basie hahelao lou; lau ese mamoe ta bona mamoe ta padadiai baina hahemaoro. ²³ Lau ese mamoe ireġudia tauna tamona, egu hesiai tauna David, na idia ireġudia tauna ai baina halaoa; ia ese baine ubudia bona baine reġudia. ²⁴ A lau Iehova na edia Dirava ai bainala, bona egu hesiai tauna David ese baine lohiadia. Lau Iehova vada na hereva.

²⁵ Lau idia ida baia herohemaino; uda boromadia na tano amo baina luludia lasi, bena tano ġaġaena ai bae noho namonamo bona uda ai bae mahuta. ²⁶ Bena egu ororo badi-tanodia ai baina hanohodia; bona medu batugudia baina hadihodia, negadia korikoridua ai; idia na hahenamo medudia ai baela. ²⁷ Huahua audia huahuadua na bae dobi, tano anidua na bae habada, bona tano taudia na edia tano ai bae noho namonamo, bena edia gadea baina hamotudia bona e ġuidia taudia imadia amo baina hamauridua negana ai, idia bae diba lau na Iehova. ²⁸ Idia na bese idauidau damudia ai basie hahelao lou, bona uda boromadia ese basie anidua lou; idia bae noho namonamo, bona tau ta ese basine hagaridua. ²⁹ Lau ese imea namodia baina henidua, bena basie hitolodia lou edia tano ai, bona bese idauidau ese basie ġonaġondalaidua lou. ³⁰ Bena idia na bae diba, lau Iehova, edia Dirava, na idia ida bona idia, Israel besena taudia, na lauegu oreia taudia. Ġaubada Iehova na e herevamu. ³¹ Umui na lauegu mamoe, egu rei mamoedia, bona lau

na emui Dirava. Ģaubada Iehova na e herevamu.

35

Peroveta herevana Seiri ororona latanai

¹ Iehova ena hereva na egu ai e kau, eto,
² Taunimanima natuna e, vairamu ba huaia Seiri
 ororona enai; bena ia latanai ba peroveta, ³baoto,
 Ģaubada Iehova na ini e gwau tomamu: Seiri
 ororona e, a itaia, lau ese na inai henimumu.
 Lau imagu baina toia roro, oi ihadikamu to-
 tona; baina habuamu tari bona baina havahumu.
⁴ Emu hanua na baina habuadia tari; oi na gabu
 ġaġaena ai ba hahelao; bena ba diba lau na
 Iehova. ⁵ Badina be o daġedäġe hanaihanaiva,
 bona Israel taudia na dare ena siahu ai o atodia
 kauva, edia hisi-ani negana ai, edia dava-abi
 orena ai; ⁶ una dainai, (Ğaubada Iehova na e
 gwaumu), lau na maurimu heġereġerena ai lau
 ese baina haheġaeġemu rara ena, bona rara
 ese baine hahavamu; badina be rara vada o
 hahebubua, una dainai rara ese baine hahavamu.
⁷ Seiri ororona na baina havahua bona baina
 habuia tari; bona lao mai taudia iboudiai na
 iena amo baina hadokodia dae. ⁸ Emu ororo
 iboudiai na e aladia mase taudia ai baina ha-
 honudia; dare amo bae aladia mase taudia na
 emu ororo ai bona emu koura ai bona emu koura
 dobudobudia iboudiai lalodliai bae hekida diho.
⁹ Baina habuamu tari hanaihanai, bona emu
 hanua na haida ese basie noholaidia. Bena vada
 ba diba lau na Iehova.
¹⁰ Badina be oi oto “Ini bese ruaosi bona ini
 tano ruaosi na lau ese baina abidia, bena ai ese
 baia ġaunaidia”, (gau tamona Iehova na unuseni
 ai); ¹¹ una dainai (Ğaubada Iehova na e gwaumu)

lau na maurimu heğereğerena ai, oi ese o inai
 henidia dainai badu bona vağeğe karadia o kar-
 alai henidia heğereğeredia ai lau ese baina kara
 henimu; bona bogaragimu ai baina hedinarai,
 baina hahemaoro henidia negana ai. ¹² Bena ba
 diba, lau Iehova ese emu hereva, Israel ororodia
 o gonağonalaidia herevadia, iboudiai vada na
 kamonai; oto “Idia na vada e habuadia tari; vada
 e henimai, baia ha-oredia”. ¹³ Sibomu emu heağı
 vada o habadaia, lau ihadikagu herevadia vada
 o gwaurai; bona emu hereva vada o hahohodia,
 lau ihadikagu; lau vada na kamonai. ¹⁴ Ğaubada
 Iehova na ini e gwau tomamu: Tanobada idoinai
 ihamoalena totona lau ese baina habuamu tari.
¹⁵ Israel ahuna latanai o moaleva, vada e hebua
 tari dainai, heğereğerena ai lau ese baina kara
 henimu; oi danu ba hebua tari, Seiri ororona
 bona Edom idoinai, oibe, idoinai. Bena idia bae
 diba lau na Iehova.

36

Israel ihamauri-louna

¹ Taunimanima natuna e, Israel ororodia ba
 peroveta henidia, baoto, Israel ororodia e, Iehova
 ena hereva ba kamonai. ² Ğaubada Iehova na
 ini e gwau tomamu: Badina be inaimui ese e
 herevalaimui, eto ‘Aha”, bona “Ororo gunadia
 doridia vada a ġaunaidia,” ³ una dainai ba per-
 oveta, baoto, Ğaubada Iehova na ini e gwau
 tomamu: Oibe, badina be idia ese e habuamui
 tari, bona kaha iboudiai amo e taomui tari, bena
 besе oredia ese e ġaunaimui, bona tauniman-
 ima ese e herevalaimui bona e hesivarailaimui.
⁴ Taunabunai, Israel ororodia e, Ğaubada Iehova

ena hereva ba kamonai; ororo badadia bona maraġidia, bona koura dobudobudia bona koura iboudiai, bona gabu gagaedia bona hanua ahutudia, bese oredia hegegemadai ai ese damudia ai vada e halaodia bona vada e kirikirilaidiamu ġaudia na Gaubada Iehova ese ini e hereva henidia tomamu. ⁵ Taunabunai, Gaubada Iehova na ini e gwau tomamu: Egu vaġeġe bada lalonai lau ese bese oredia bona Edom idoinai danu na gwau dika henidiamu; idia ese egu tano e ġaunaia mai moale badana bona mai hedadarai bada-hereana ida, bae abia bona lalonai bae dadidadi totona. ⁶ Taunabunai, Israel tanona ba perovetalaia, ororo badadia bona maraġidia, bona koura dobudobudia bona koura iboudiai, ba hamaorodia, baoto, Gaubada Iehova na ini e gwau tomamu: A itaia, egu vaġeġe baduna ai na herevamu; badina be bese idau-idau edia hedunirai herevadia na umui latamui ai. ⁷ Taunabunai, Gaubada Iehova na ini e gwau tomamu: Lau na gwau hamatamu, na tomu, e gegemui dae besedia latadiai hedunirai herevadia na bae kau.

⁸ A umui, Israel ororodia e, emui au rigidia bae gara kau, bona emui au huahuadia bae dobi, egu bese Israel adia; badina be asi vanahana edia gabu korikori bae lou henia. ⁹ Badina be, a itaia, lau na umui ida; lau ese baina hageremui, bema bae ruamui bema uhemui bae hado. ¹⁰ Bema lau ese taunimanima baina hahutumadia latamui ai, Israel besena idoinai, oibe, idoinai; hanua bae noholaidia, bona e heġiġi dobi hanuadie ma bae haginidie lou. ¹¹ Taunimanima bona ububu ġaudia na baina hahohodia umui latamui ai; bae hutuma, bae vara rohoroho. Bae no-

holaimui taudia baina hahutumadia, nega gunadia heğereğeredia, bona baina hanamomui badabada. Bena vada ba diba lau na Iehova. ¹² Oibe, baina gwau maoro, bena egu bese, Israel taudia, na latamui ai bae loaloa; bae ġaunaimui, ahudia ai bae halaomui; bona natudia na mase ai basio abidia oho lou. ¹³ Ĝaubada Iehova na ini e gwau tomamu: Badina be taunimanima ese e gwau henimuimu, e tomu “Umui ese taunimanima o ha-orediamu bona emui bese taudia natudia na mase ai o abidia ohomu”, ¹⁴ una dainai umui ese taunimanina basio ha-oredia lou, bona emui bese taudia natudia na mase ai basio abidia oho lou. Ĝaubada Iehova na e herevamu. ¹⁵ Bena lau ese bese idau-idau baina gwaudia tubu, basie lodu henimui lou, bona taunimanima hemaraidia na basio hua lou, bona emui bese na basio hahek-wakwanaia lou. Ĝaubada Iehova na e herevamu. ¹⁶ Iehova ena hereva na egu ai e kau, eto, ¹⁷ Taunimanima natuna e, Israel besena taudia na edia tano korikori ai e nohova negana ai, idia ese edia dala bona edia kara amo e hamiroa; edia kara lau vairagu ai na mimiro, hahine ta ena rara-kara mirona na heto. ¹⁸ Taunabunai egu badu na latadai na bubua, idia ese rara na tano ai vada e hahebubua bona tano na kaivakuku amo e hamiroa davana. ¹⁹ Bese idau-idau bogaragidiae na hakarohodia, bena tano idau-idau lalodiae e karoho rohoroho; edia noho bona edia kara heğereğeredia ai na hahemaoro henidia. ²⁰ A bese idau-idau ediae e kau, bena e kau gabudia iboudiae lalodiae idia ese lau ladagu helāgāna e hamiroa; badina be taunimanima ese e herevalaidia, eto, Ina na Iehova ena oreia taudia, ġau tamona iena tano amo e harakadia lasi. ²¹ A

lau ladagu helağana, Israel taudia ese ediai e kau besedia bogaragididi e hamiroa ġauna, na lau ese na helalolaia bada.

²² Taunabunai, Israel besena taudia ba hamaorodia, baoto, Ĝaubada Iehova na ini e gwau tomamu: Israel besena e, lau ba ġaukaramu na dia umui daimui ai, to lau ladagu helağana, ediai o kau besedia bogaragidiai o hamiroa ġauna, dainai. ²³ Lau ladagu hereana ena helağā, bese idau-idau bogaragidiai vada e miro badina be umui ese vada o hamiroa ġauna, na lau ese baina gwauraia maoro; bena umui emui amo egu helağā na idia vairadiai baina gwauraia maoro negana ai, bese idau-idau bae diba lau na Iehova. Ĝaubada Iehova na e herevamu. ²⁴ Badina be bese idau-idau bogaragidia amo baina abimui, bona tano iboudiai lalodia amo baina gogomui, bena emui tano korikori ai baina hakamui vareai. ²⁵ Lau ese ranu negarinegarina amo baina sisirimui, bena emui miro idoinai amo ba ġoeva; bona emui kaivakuku iboudiai edia amo baina haġoevamui. ²⁶ Lalo matamatana baina henimui, bona lauma matamatana na lalomui ai baina atoa; Ialo-auka na umui lalomui amo baina abia oho, Ialo-manada baina henimui. ²⁷ Egu lauma na lalomui ai baina atoa; egu taravatu lalodiai baina harakamui; bona egu hahemaoro herevadia ibadinadia ai baina hamanadamui. ²⁸ Senemui na henidia tanona ai ba noho; egu bese ai baola, lau danu emui Dirava ai bainala. ²⁹ Emui miro iboudiai amo baina haġoevamui; bona uma ġaudia baina haġanidia, bae vara momo; basina hahitolomui. ³⁰ Au huahuadia bona uma anianidia baina hahohodia; bena bese

idau-idau bogaragidiai basio hemarai lou, hitolo dainai. ³¹ Bena emui dala dikadia bona emui kara dia nanamo ba lalodia tao, bena sibomui ba hedadarai, emui kara havara bona emui kara dika-rohorohodia daidiae. ³² Gaubada Iehova na e tomu, Bainā ġaukara, to dia umui daimui ai; una na ba diba. Israel besena taumui e, emui dala daidiae ba hemarai bona ba baia.

³³ Gaubada Iehova na ini e gwau tomamu: Emui kara havara iboudiae amo baina haġoevamui dinana ai, lau ese taunimanima na hanua lalodiai baina hanohodia, bona e heġiġi dobi hanuadia na bae haginidia lou. ³⁴ E vahu tanona na bae biru henia, bena raka-hanai taudia iboudiae ese vahuna ai basie itaia lou. ³⁵ Bena idia na baeto, Hari e vahu tanona na Ede imeana heġeregerena ai vada ela; bona e havahudia, e habuadia tari, e ġiġidiae dobi hanuadia na haida ese e noholaidia-mubona e maġdiamu. ³⁶ Bena doene e ġeġemui daemu besedia na bae diba lau Iehova ese e heġiġi dobi hanuadia vada na haginidia lou, bona e vahu tanodia ai vada na hadohado lou. Lau Iehova vada na hereva; bona karana do baina karaia.

³⁷ Gaubada Iehova na ini e gwau tomamu: Israel besena taudia baina ha-uradia dainai, ina danu egu ai bae noia; edia taunimanima na baina hahutumadia, mamoe serina na heto. ³⁸ Boubou mamoedia serina na heto, e gwaurai hata negadia ariadia ai Ierusalem ai e habouamu serina na heto, vada e vahu hanuadia na taunimanima seridiae ai bae honu. Bena idia bae diba lau na Iehova.

37

Turia kakorodia kourana

¹ Iehova imana na latagu ai, bena ia ese Iehova ena Lauma amo e abigu, e laohaigu, koura ta ai e atogu diho; una koura na turia ai e honu. ² Bena bogaragidiai e hakaugu eva-eva; na itadia, idia na momo herea una koura ai, bona idia na kakakoro. ³ Bena ia ese e nanadaigu, eto, Taunimanima natuna e, ini turia na bae mauri diba a? Lau na haere, nato, Ģaubada Iehova e, oi hari mai dibamu. ⁴ Ma e hereva henigu, eto, Ini turia na ba peroveta henidia, baoto, Turia kakorodia e, Iehova ena hereva ba kamonai. ⁵ Ģaubada Iehova ese ini turia na ini e hereva henidiatomamu: A itaia, baina hahoho henimui, bena ba mauri. ⁶ Varovaro na latamui ai baina atodia, bona hidiomui baina hadudu, bona kopi amo baina govamui; bena baina hahoho henimui, bena ba mauri. Bena ba diba lau na Iehova.

⁷ Taunabunai, lau na peroveta, vada e hağanigu heğereğerena; bena na perovetava lalonai hesede-hesede reğena e reğedagu; bena turia na e hahebou, turia ta ta ena gabu ena gabu ai e hemudu-hemudu kau. ⁸ Na itadia negana ai, idia na mai varovarodia, bona hidio ese e hadududia ahu, bona kopi ese e ġovadıa, a dounu asi lağadia. ⁹ Bena ia ese e hamaorogu, eto, Taunimanima natuna e, lağ'a ba peroveta henia, lağ'a ba hamaoroa, baoto, Ģaubada Iehova na ini e gwau tomamu: Lağ'a e, lai haniosi kahadia amo baoma, ini vada e aladia mase taudia na ba hahoho henidia, bena bae mauri. ¹⁰ Taunabunai, lau na peroveta, e hağanigu heğereğerena, bena

laḡa na idia lalodai e vareai; bena e mauri, e tore isi, hutuma bada herea.

¹¹ Bena ia ese e hamaorogu, eto, Taunimanima natuna e, ini turia na Israel besena idoinai. A itaia, idia na e tomu, Turiamai vada e kakoro, emai helaro vada e boio; vada e negemai daure. ¹² Taunabunai ba peroveta henidia, baoto, Ġaubada Iehova na ini e gwau tomamu: Egu bese e, a itaia, emui guri baina kehodia, emui guri amo baina hatoremui isi, bena baina hakaumui lou, Israel tanona ai. ¹³ Egu bese e, emui guri baina kehodia bona emui guri amo baina hatoremui isi negana ai, vada ba diba lau na Iehova. ¹⁴ Bena egu Lauma na lalomui ai baina atoa, bena ba mauri; bena emui tano korikori ai ma baina hanohomui. Bena ba diba, lau Iehova vada na hereva bona karana vada na karaia. Iehova na e herevamu.

Iuda bona Israel bae tamona

¹⁵ Iehova ena hereva na egu ai e kau, eto, ¹⁶ Taunimanima natuna e, au ta bavabia bona ia latanai ba torea: “Iuda, bona Israel taudia ia ida e heboumu, edia”. Bena au ma ta bavabia bona ia latanai ba torea: “Iosef (Efraim auna), bona Israel besena idoinai ia ida e heboumu, edia”. ¹⁷ Bena au ruaosi ba hahesiriudia, au tamona ai baela oi imamu ai. ¹⁸ Bena emu orea taudia ese bae nanadaimu, baeto “Ina kara anina basioma hamaorolaimai a?” negana ai ¹⁹ ba haere henidia, baoto, Ġaubada Iehova na ini e gwau tomamu: A itaia, Iosef bona Israel iduhudia ia ida e heboumu edia au (Efraim imana ai e miamu ġauna) aina abia, Iuda ena au ida baina hahesiriudia, au tamona ai baina halaodia lau

imagu ai. ²⁰ Hari latadiai revareva vada o tore audia na idia vairadai ui imamu ai bae mia negana ai, ²¹ ba hereva henidia, baoto, Gaubada Iehova na ini e gwau tomamu: A itaia, lau ese Israel taudia na bogaragidai vada ela besedia edia amo ma baina abidia, kaha iboudiai amo baina haboudia, edia tano korikori lalonai baina hakaudia vareai. ²² Bena bese tamona ai baina halaodia una tano ai, Israel ororodia ai; pavapava tamona ese iboudiai baine pavapavadia. Idia na bese rua ai basie hahelao lou, bona basileia rua ai basie haheparara lou. ²³ Edia kaivakuku eiava edia ġau dika-rohorohodia eiava edia kerere amo sibodia basie hahemiro lou; a edia raka muri ai e kara dika karadia iboudiai amo baina hamauridia bona baina hagoevadia. Idia na lauegu bese ai baela, bona lau na edia Dirava ai bainala.

²⁴ Egu hesiai tauna David ese baine pavapavadia; iboudiai na ireġudia tauna tamona ese baine regudia. Egu hahemaoro herevadia na bae gavia,

bona egu taravatu na bae badinadia namonamo. ²⁵ Senemui ese e noholaia tanona, egu hesiai tauna Iakob na henia tanona, lalonai bae noho; idia bona natudia bona garadia na unuseni ai bae noho, ela bona hanaihanai; bona egu hesiai tauna David ese baine pavapavadia hanaihanai. ²⁶ Lau na idia ida baia herohemaino; emai herohemaino baine hesiriu hanaihanai. Lau ese baina hanamodia bona baina hahutumadia; egu gabu helāgħa na idia bogaragidai baina atoa, unuseni ai baine mia hanaihanai. ²⁷ Idia ida baina noho; edia Dirava ai bainala, egu bese ai baela. ²⁸ Bena egu gabu helāgħa na idia

bogaragidiai e miamu ma baine mia hanaihanai dainai, bese idau-idau na bae diba lau Iehova ese Israel na hahelagaiamu.

38

Peroveta herevana Gog latanai

¹ Iehova ena hereva na egu ai e kau, eto,
² Taunimanima natuna e, Gog, Magog tanona tauna, Mesek bona Tubal lohiadia badana, ba vaira henia bona latanai ba peroveta, ³ baoto, Gaubada Iehova na ini e gwau tomamu: Gog e, Mesek bona Tubal lohiadia badana e, lau ese oi na inai henimumu; ⁴ baina haginiimu kerehai, igau na aukimu ai baina ġau, bena baina verimu lasi; bona emu tuari oreana idoinai danu, hosi bona hosi-gui taudia, iboudiai na mai edia tuari dabuadia, tau-anidia iġovalai-ġuġurudia ġaudia, oreia bada-hereana, iboudiai na mai edia keme auridia bona kesi, bona mai edia dare imadia ai. ⁵ Parasa bona Kusu bona Put taudia na idia ida; iboudiai na mai edia kesi bona auri kwara-gaudia; ⁶ Gomere mai ena hutuma idoinai ida; Bete-togarama danu mirigini kahana gabu daudaudia amo, mai ena hutuma idoinai ida; bese momo na oi ida.

⁷ A hegaegae, bona ba heġaeġae noho, oi bona emu ai e heboumu oreadia badadia iboudiai, bona ba gimadia. ⁸ Dina hoho muridiae bae haheboumui; bena laġani gabedia ai tuari ena hahedika amo vada e hanamo lou tanona, bese loġora bogaragidia amo taunimanima na Israel ororodia ai vada e haboudia tanona, vada e vahu loulou tanona, na umui ese do ba tuari henia. Ena

taunimanima na bese idau-idau bogaragidia amo e hakaudia lasi, bona harihari idia iboudiai na e noho namonamomu. ⁹ A ba orea isi, baola, lai gubana na heto, dagadaga ese tano bema ġovaiā ahu na heto, oi bona emu hutuma idoinai bona bese momo oi ida.

¹⁰ Ĝaubada Iehova na ini e gwau tomamu: Una dina ai lalo-hadai haida na lalomu ai bae vara, bena kara dikana ta ba laloa hata, ¹¹ baoto, Lau ese asi maġudia hanuadia tanona baina tuari henia; unu asi reġereġedia e noho namonamomu, edia rumu na asi maġudia, asi auridia, asi ik-oukoudia, taudia na baina daedia; ¹² edia kohu baina dadi, bona baina dadi ġaudia na baina laohai; gunagna e vahu a harihari taunimanima ese e noholaimu gabudia baina tuari henidia; bona bese idau-idau bogaragidia amo vada e hahebou edia boromakau bona edia kohu vada e habou taudia, tano bogaraginai e nohomu taudia, danu baina tuari henidia. ¹³ Sieba bona Dedan, bona Tarasisi ena hoihoi taudia bona hanuana iboudiai, ese bae nanadaimu, baeto, Oi na kohu idadidia totona vada oma a? Emu hutuma vada o haheboudia, ba dadi kohudia bae hua lao, *silver* bona *gold* bae huadia lao bona boromakau bona kohu bae laohaidia, ġau momo herea bae dadi totona a?

¹⁴ Taunabunai, taunimanima natuna e, ba peroveta, Gog ba hamaoroa, baoto, Ĝaubada Iehova na ini e gwau tomamu: Una dina ai egu bese Israel e noho namonamomu negana ai, oi na ba tore isi, ¹⁵ emu gabu, mirigini kahana gabu daudaudia, amo baoma, oi bona bese momo oi ida, iboudiai na hosi ai bae gui, hutuma bada-

herea, tuari oreana mai goadana. ¹⁶ Baoma, egu bese Israel taudia ba daedia, dagadaga ese tano e ġovajā ahumu na heto. Dina gabedia ai, lau ese baina hakaumu mai, egu tano ituari-henina totona; bena oiemu amo, Gog e, egu helaġa na bese idau-idau vairadiai baina hamomokania, unu amo idia ese bae dibagu.

¹⁷ Ĝaubada Iehova na ini e gwau tomamu: Nega gunadia ai egu hesiai taudia, Israel ena peroveta taudia, ududia amo na herevalaia tauna na oi a? Idia na laġani gunadia lalodai e perovetava oi baina mailaimu idia ituarihenidia totona. ¹⁸ Ĝaubada Iehova ma e tomu, A una dina ai, Gog ese Israel tanona ituari-henina bainema dinana ai, egu badu baine vara. ¹⁹ Badina be egu vasege ai bona egu badu ġaraġara ai na gwaumu, Una dina ai Israel tanona baine heude-heude bada; ²⁰ davara gwarumedia, atai manudia, uda boromadia, tano ai e raumu ġaudia iboudiai, bona tanobada latanai e nohomu taudia iboudiai danu, bae heude-heude lau vairagu ai; ororo danu bae heġiġi dobi bona haga nadidia bae moru, bona maġu iboudiai na tano ai bae heġiġi dobi. ²¹ Ĝaubada Iehova na e lomu, Hahegari karadia idau-idau iboudiai baina havaradia, Gog ihadikana; taunimanima iboudiai na tadikakadia ida bae heala-ala heheni, edia dare amu. ²² Dai-hanai gorerena bona rara ihahebubuna amo baina hahemaoro henia, bona medu badahereadia bona medu-hetaridia, lahi bona teio na ia bona ena hutuma bona baine bamoa besedia

lōgora latadiai baina hadiho.* ²³ Unu amo egu herea-dae bona egu helāga baina hahedinaraidia, bona bese momo vairadiai sibogu baina hahedinarai. Bena idia bae diba lau na Iehova.

39

¹ Taunimanima natuna e, Gog latanai ba peroveta, baoto, Ģaubada Iehova na ini e gwau tomamu: Gog e, Mesek bona Tubal lohiadia badana, lau ese na inai henimumu; ² lau ese baina haginimu kerehai bona baina lulumu lao, mirigini kahana gabu daudaudia amo baina mailaimu, baina hakaumu, Israel ororodia ituari-henidia ai; ³ bena emu peva na imamu laurina amo baina pataia oho, bona emu diba na imamu idibana amo baina hamorudia. ⁴ Bena Israel ororodia ba hekida diho, oi bona emu hutuma idoinai bona e bamomumu besedia; bena lau ese baina abimui, kasiri-ani manudia idau-idau bona uda bolomadia adia ai baina halaomui; ⁵ tano paka ai do ba hekida diho, badina be lau, Ģaubada Iehova, vada na hereva. ⁶ Lau ese lahi baina siaia lao, Magog latanai, bona kone tanodia ai e noho namonamomu taudia latadiai; bena idia bae diba lau na Iehova.

⁷ Bena lau ladagu helāgāna baina hahedibalaia, egu bese Israel bogaraginai; baina gwaudia tao, lau ladagu helāgāna basie hamiroa lou; bena bese idau-idau na bae diba, lau na Iehova, Helāga Diravana Israel ai. ⁸ Ģaubada Iehova na e tomu,

* **38:22:** Teio; Nadi ta ladana, Helene gado ai. E aramu bena bonana dika-hereana e daemu, taunimanima e hamasediamu. Ladana English gado ai na “sulphur”.

A itaia, ia na e maimu, vada be kaumu. Lau ese vada na herevalaia dinana bunai.

⁹ Bena Israel hanuadia e noholaidiamu taudia na bae raka lasi, tuari ġaudia na Iahi ai bae haboudia, bae doudia; kesi bona keme auridia, peva bona diba, kareva bona io. Lahi audia ai bae halaodia ela bona laġani hitu bae ore; ¹⁰ taunabunai idia ese au na tano paka ai basie abi eiava uda ai basie utu, badina be edia lahi na unu tuari ġaudia amo bae raku; edia ġau e dadi taudia ediai ġau ma bae dadi, bona edia kohu e abi oho taudia ediai kohu ma bae abi oho. Ĝaubada Iehova na e herevamu.

¹¹ Una dina ai lau ese Gog na gara gabuna ta baina henia Israel ai, koura ta ladana na “Lao-lao taudia edia Koura”, Tadi Gohuna mairiveina kahana ai. Laolao taudia edia dala na baine helao ahu, badina be unuseni ai Gog bona ena hutuma idoinai na bae guridia; ladana bae hatoa Hamono-gog Kourana. ¹² Hua hitu lalodiae Israel besena taudia ese bae guridia, tano ihaġoевана totona. ¹³ Tano taudia iboudiae ese bae guridia; bena idia haridia bae namo, lau ese hairaigu baina hahedinaraia dinana ai. Ĝaubada Iehova na e herevamu. ¹⁴ Tatau haida bae gwauraidia hidi, idia ese tano bae rakaia hanai loulou bona tano kopina ai miadia taudia bae guridia totona; unu amo tano bae haġoевая. Hua hitu bae ore ai do bae hetahu. ¹⁵ Bena tano iraka-hanaina ai idia ta ese tau ta turiana baine davaria negana ai, ia ese toa ta baine holoa una turia badibadina, ela bona mase iguridia taudia ese Hamono-gog Kourana ai bae ġuria. ¹⁶ (Hanua ta ladana Hamona na unuseni ai danu.) Tano na unu bae

haǵoevaiā toma.

¹⁷ Taunimanima natuna e, Ğaubada Iehova ese ini e hereva henimu tomamu: Manu idau-idau bona uda boromadia iboudiai na ba hereva henidia, baoto, Ba hegogo bena baoma; kaha iboudiai amo ba hebou, boubou ariana lau ese na hegaegaelaiamu amui na bavania, boubou ariana badana Israel ororodia ai; vamu bame ani bona rara bame inu. ¹⁸ Goada-herea taudia hidiodia bavani, bona tanobada lohiadia raradia ba inu; mamoe mamaruanedia bona mamoe natudia bona nani bona boromakau mamaruanedia danu, iboudiai na Basan ubu-ubu boromadia. ¹⁹ Digara bavania, ela bona bogamui bae kunukakunuka, bona rara ba inua, ela bona ba keker, hari boubou ariana, amui na heǵaeǵaelaiamu ǵauna, lalonai. ²⁰ Egu dabara ai, hosi bona hosigui taudia amo, goada-herea taudia bona tuari taudia idau-idau amo, bogamui do bae kunu. Gaubada Iehova na e herevamu.

²¹ Lau hairaigu na bese idau-idau bogaragidiai baina hahedinaraia; bena bese iboudiai ese egu hahemaoro karana bona imagu, latadiai na atoa ǵauna, bae itadia. ²² Israel besena na una dina amo bae diba, lau na Iehova, edia Dirava. ²³ Bena bese idau-idau na bae diba, Israel besena na iǵui gabuna ai ela, edia kara havara dainai; badina be edia kara amo e koigu dikadika dainai lau ese vairagu na edia amo na hunia, bona adia inai taudia imadia ai na atodia, bena iboudiai na dare ai e mase. ²⁴ Edia miro bona edia kerere heǵereǵeredia ai na kara henidia, bona vairagu na edia amo na hunia.

²⁵ Taunabunai, Ğaubada Iehova na ini e gwau

tomaunu: Harihari Iakob ena noho-namo baina havaraia lou, bona Israel besena idoinai baina bogaia hisi; bona lau ladagu helağona vageğena baina vageğe. ²⁶⁻²⁷ Bena bese idauidau bogaragidia amo baina loulaidia, bona inaidia edia tano hidaosi amo baina haboudia, bona idia edia amo egu helağā na bese momo vairadiai baina hamomokania negana ai, idia ese edia hemarai bae laloa boio, bona edia kara koikoi, lau e koilaigu karadia, edia tano ai e noho namonamova bona haida ese asie hagaridiava negadia ai e karava karadia, danu bae lalo boio. ²⁸ Bena idia bae diba, lau na Iehova, edia Dirava; badina be gabu daudau ai na hanohodia, bese idau-idau bogaragidiai, bena ma na gogodia lou, edia tano korikori ai. Lau ese idia ta na bese idau-idau bogaragidiai basina rakataia lou; ²⁹ bona vairagu na edia amo basina hunia lou; egu Lauma ese Israel besena baine rohea. Ģaubada Iehova na e herevamu.

40

Esekiel ena mata-hanai

¹ Dauhai e hanohomai lağanina iharuahui-imana matamana ai, hua dinana ihagwautana ai, hanua badana e hadarerea murinai lağani gwauta-hani vada e lao bubuni ai, una dina lalonai Iehova imana na vada latagu ai; ² bena Dirava ese e henigu mata-hanaidia ai Israel tanona e laohaigu, ororo badana ta dorina ai e haginigu diho, ġau ta, ita-itana na hanua badana ta na heto, hevaira-hehenina ai. ³ Unuseni ai e haginigu diho negana ai, tau ta na itaia, ita-itana na auri labora-labora na heto, mai ena hahetoho varona

bona ena hahetoho sirihona imana ai. Ia na ikoukou ai e gini. ⁴ Bena una tau ese e hereva henigu, eto, Taunimanima natuna e, lau ese baina haheitalaimu ġaudia iboudiai na matamu amo ba itadia, bona taiamu amo ba kamonai bona lalomu amo ba haerodia, badina be ini ġau baina haheitalaimu totona e mailaimu iniseni ai. Ba ita ġaudia iboudiai na Israel besena taudia ba hamaorolaidia.

⁵ Bena na itaia, maġu ta ese dubu tanona e ġeġeä dae. Hari hahetoho sirihona una tau imana ai latana na kiubit badadia tauratoi.* (Unu kiubit badadia ta anina be kiubit idoinai ta bona ima-palapala lababana ta). Bena ia ese maġu udunana e hahetoho, hahetoho sirihona auta heġereġerena; harana latana danu hahetoho sirihona auta heġereġerena. ⁶ Bena mairiveina kahana e vaira henia ikoukouna idae-lao-henina ai, vadavadana amo e dae; bena ikoukou raka-vareaina e hahetoho, lababana na hahetoho sirihona auta heġereġerena. ⁷ Ohe daiutudia danu latadiai na hahetoho sirihona auta, bona lababadia danu hahetoho sirihona auta. Daiutu padadia na kiubit ima. Ikoukou raka-vareaina, ikoukou dehena laloma kahana ai, na hahetoho sirihona auta heġereġerena. ⁸ Bena ia ese ikoukou dehena e hahetoho: ia na kiubit taurhani; ⁹ bona ena ihua-ihua danu, idia na kiubit rua. Hari ikoukou dehena na laloma kahana ai. ¹⁰ Mairiveina kahana ikoukouna ohena kahana kahana na daiutu toi toi amo; toiosi edia bada na heġereġere; bona ohe kahana kahana ihua-ihuadia edia bada danu heġereġere. ¹¹ Bena ia ese

* **40:5:** Kiubit hadadia tauratoi = 3 metres sisivana.

ikoukou raka-lasina e hahetoho, kiubit gwauta; bona ikoukou idoinai lababana, kiubit gwautatoi. ¹² Ohe kahana kahana daiutudia na mai seaseadia lababadia kiubit tamona, bona hari daiutu na kiubit tauratoi, ohe kahana kahana ai. ¹³ Bena ikoukou na e hahetoho, ohena ta daiutuna durana iduarana amo ela bona ma ohena ta daiutuna durana iduarana, lababa idoinai na kiubit ruahui-imā, iduara amo ela bona iduara. ¹⁴ Dehe danu e hahetoho, kiubit ruahui; mağu ta ese ikoukou dehena e ġeġea dae. ¹⁵ Ikoukou vairakahana raka-vareaina ela bona ikoukou lalona kahana dehena na kiubit imahui. ¹⁶ Ikoukou heġegemadai ai na gaba-mauru haida; ihua-ihua padadia na hahaga murimuri kahadia ai bona i'iora laloma kahadia at; bona dehe danu mai gaba-mauruna laloma kahana heġegemadai ai. Ihua-ihua ai be pamu audia laulaudia.

¹⁷ Bena ia ese murimuri kahana mağuna lalonai e hakaugu vareai; unuseni ai daiutu haida bona nadi ariarana ta na itadia, mağu e ġeġea dae; daiututoi-ahui ese hari nadi ariarana e vaira henia. ¹⁸ Hari nadi ariarana na ikoukou badibaddiai ela; lababana na hari ikoukou lababadia heġereġeredia. Una nadi ariarana na henu ariarana. ¹⁹ Bena ia ese hari henu ikoukouna ena laloma kahana bona laloma mağuna ena murimuri kahana padadia e hahetoho; padadia na kiubit sinahu-ta.

Bena ia na lau vairagu ai ela, mirigini kahana ala; ²⁰ unuseni ai ikoukou ta ese mirigini kahana e vaira henia; una na murimuri kahana mağuna ikoukouna. Ia ese latana bona lababana e hahetohodia. ²¹ Ena ohe daiutudia, toi kahana ai toi kahana ai, bona ena ihua-ihua bona ena dehe edia

bada na ikoukou gini-gunana ena heğereğeredia; latana na kiubit imahui bona lababana na kiubit ruahui-imā. ²² Ena gaba-mauru, ena dehe bona ena pamu audia laulaudia edia bada na hari mairiveina kahana e vaira henia ikoukouna ena heğereğeredia. Vadavada moi-kaudia auhitu amo e dae henia; bona dehena na ena laloma kahana ai. ²³ Hari miriginī kahana ikoukouna hevaira-hehenina ai na laloma mağuna ikoukouna ta, mairiveina kahana ġauna heğereğeredia; bena ia ese padadia e hahetoho, ikoukou ta ela bona ikoukou ta padadia na kiubit sinahu-ta.

²⁴ Bena ia ese diho kahana ma e hakaugu lao; bena ikoukou ma ta na itaia diho kahana ai. Ena ihua-ihua bona ena dehe e hahetohodia; edia bada na unu haida edia heğereğeredia. ²⁵ Gaba-mauru ese ia bona ia dehena e haheğeğedia dae, unu haida edia gaba-mauru heğereğeredia; ia latana na kiubit imahui bona lababana na kiubit ruahui-imā. ²⁶ Vadavada moi-kaudia auhitu amo e dae henia, bona dehena na ena laloma kahana ai; ena ihua-ihua ai na pamu audia laulaudia, ta ohena ta ai, ma ta ohena ta ai. ²⁷ Laloma mağuna ena diho kahana na mai ikoukouna. Bena ia ese padadia e hahetoho, ikoukou ta amo ela bona ikoukou ta, diho kahana ai; padadia na kiubit sinahu-ta.

²⁸ Bena ia ese laloma mağuna lalonai e hakaugu vareai, diho kahana ikoukouna amo. Bena ia ese diho kahana ikoukouna e hahetoho; ena bada na unu haida edia heğereğeredia. ²⁹ Ena ohe kahana kahana daiutudia, ena ihua-ihua bona ena dehe na unu haida heğereğeredia; gaba-mauru ese ia bona ia dehena e haheğeğedia dae; ia latana

na kiubit imahui bona lababana na kiubit ruahui-imā. ³⁰ Dehe haida ma e ġegeā dae, latadia na kiubit ruahui-imā bona lababadia na kiubit imā. ³¹ Dehena na murimuri kahana maġuna e vaira henia; ena ihua-ihua ai na pamu audia laulaudia; vadavada moi-kaudia taurahani amo e dae henia.

³² Bena ia ese laloma kahana maġuna ai e hakaugu vareai, mairiveina kahana ai. Ia ese ikoukou e hahetoho; ena bada na unu haida edia heġereġeredia. ³³ Ena ohe kahana kahana daiutudia, ena ihua-ihua bona ena dehe edia bada na unu haida edia heġereġeredia. Gaba-mauru ese e haheġeġea dae. Ia latana na kiubit imahui, bona lababana na kiubit ruahui-imā. ³⁴ Ia dehena ese murimuri kahana maġuna e vaira henia. Ena ihua-ihua ai na pamu audia laulaudia, ta ohena ta ai, ma ta ohena ta ai. Vadavada moi-kaudia taurahani amo e dae henia.

³⁵ Bena ia ese ma e hakaugu lao, mirigini kahana ikoukouna ala. Bena e hahetoho; ena bada na unu haida edia heġereġeredia. ³⁶ Ena ohe kahana kahana daiutudia, ena ihua-ihua bona ena dehe edia bada na unu haida edia heġereġeredia. Gaba-mauru ese e haheġeġea dae. Ia latana na kiubit imahui, bona lababana na kiubit ruahui-imā. ³⁷ Ia dehena ese murimuri kahana ikoukouna e vaira henia. Ena ihua-ihua ai na pamu audia laulaudia, ta ohena ta ai, ma ta ohena ta ai. Vadavada moi-kaudia taurahani amo e dae henia.

³⁸ Daiutu ta iduarana na ikoukou dehena ai; unuseni ai ġole-oho boubouna na bae huria. ³⁹ Ikoukou dehena ai danu na pata rua, ohe kahana kahana ai; idia latadai ġole-oho bona kara dikha bona kerere boubou ġaudia bae aladia mase.

40 Dehe murimurina kahana ai, mirigini kahana ikoukouna raka-vareaina ai, na pata rua; hona ikoukou dehena kahanadanu pata rua. **41** Pata hani na laloma kahana ai bona pata hani na murimuri kahana ai, ikoukou raka-vareaina ai; pata taurahaniosi latadiai boubou ġaudia na bae aladia mase. **42** E utu hata nadidia patadia hani danu mimia, ġole-oho boubou ġaudia patadia. Latadia na kiubit ta mai kahana, lababadia danu kiubit ta mai kahana, bona haradia latadia be kiubit tamona. Ġole-oho bouboudia bona boubou haida ialalaidia ġaudia na unu pata latadiai bae heato. **43** Igau haida danu, edia lata na impalapala ta lababana heġereġerena, na lalonai e hetau dae heġeġe. Unu pata latadiai na boubou ġaudia hidiodia bae atodia.

44 Bena ia ese murimuri kahana amo e hakaugu vareai, laloma maġuna lalonai; unuseni ai daiutu rua na itadia, laloma maġuna lalonai. Ta be mirigini kahana ikoukouna badibadinai, diho kahana e vaira henia. Ma ta be diho kahana ikoukouna badibadinai, mirigini kahana e vaira henia. **45** Ia ese e hamaorogu, eto, Ina diho kahana e vaira heniamu daiutuna na hahelaġa taudia, dubu e biaguamu taudia, edia; **46** bona mirigini kahana e vaira heniamu daiutuna na hahelaġa taudia, ihaboulaina patana e biaguamu taudia, edia. Unu na Sadok garana; Levi garana iboudiai bogaragidiae amo idia sibodia ese Iehova bae raka henia kahi, isiaina ilao-henina totona. **47** Bena ia ese maġu e hahetoho: ena lata na kiubit sinahu-ta bona ena lababa na kiubit sinahu-ta; kahana haniosi na heġereġere. Ihaboulaina

patana na dubu vairanai.

⁴⁸ Bena ia ese e hakaugu lao, dubu dehena ala. Ia ese dehe ihua-ihuana e hahetohodia; idia na kiubit ima, ohe kahana kahana ai. Ikoukou lababana na kiubit gwauta-hani; bona ikoukou ohena habadia na kiubit toi, ohe kahana kahana ai. ⁴⁹ Dehe ena lata na kiubit ruahui, bona ena lababa na kiubit gwauta-rua. Vadavada moi-kaudia gwauta amo e dae henia; bona ihua-ihuua badibadidiae na au-tubua, ohe kahana kahana ai.

41

¹ Bena ia ese dubu ai e hakaugu vareai; bena ihua-ihuua e hahetohodia. Ohe kahana kahana ai ihua-ihuua padadia na kiubit tauratoi. ² Rakavareaina lababana na kiubit gwauta; bona raka-vareaina ohena habadia na kiubit ima, ohe kahana kahana ai. Dubu laloma kahana e hahetoho; ena lata na kiubit hari-ahui bona ena lababa na kiubit ruahui. ³ Bena ia ese laloma daiutuna ai e raka vareai, raka-vareaina ihua-ihuana e hahetohodia, kiubit rua; bona raka-vareaina lababana, kiubit tauratoi; bona raka-vareaina ohena habadia, kiubit hitu. ⁴ Daiutu e hahetoho, ena lata bona ena lababa na kiubit ruahui, dubu durana kahana ai. Ia ese e hamaorogu, eto, Ina na gabu helaga-hereana.

⁵ Bena ia ese dubu habana e hahetoho, udunana na kiubit tauratoi. Ohena daiutudia lababadia na kiubit hani, idia ese dubu e ha-hegegea dae. ⁶ Hari ohe daiutudia na ere toi, latana latana ai. Daiutu na toi-ahui toi-ahui amo, ere Ia ta ai. Dubu hegegemadai ai to-tao gaudia e kara, dubu habana ai, bena daiutu lavadia na unu gau latadiai e heato kau, unu lava na dubu

habana lalonai basie hetoi vareai helaoreana. ⁷ Hari ohe kahana kahanil daiutudia lababadia na e bada e laova, henu erena amo ela bona atai erena, to-tao ġaudia na henu erena amo ela bona atai erena e bada e laova heğereğerena, dubu heğeğemadai ai. Dubu ohena ai vadavada ta e daeva, unu amo taunimanima na henu erena amo e dara daeva ela bona bogaragi erena, bona bogaragi erena amo e dara daeva ela bona atai erena. ⁸ Na itaia danu, dubu heğeğemadai ai na patapata ta. Hari ohe kahana kahana daiutudia badidia na e hahetohodia, idia na hahetoho sirihona idoi ta, kiubit badadia tauratotai heğereğerena. ⁹ Ohe kahana kahana daiutudia murimuridia kahadia habadia lababadia na kiubit ima; patapata mia-ġaġaena kahana lababana na kiubit ima. Hari dubu patapatana ¹⁰ bona maġu daiutudia padadia na kiubit ruahui, dubu hegegemadai idoinai. ¹¹ Hari ohe kahana kahana daiutudia iduaradia na patapata mia-ġaġaena kahana ai e hekeho, iduara ta na mirigini kahana e vaira henia, bona iduara ta na diho kahana e vaira henia. Una patapata mia-ġaġaena kahana lababana na kiubit ima, dubu heğeğemadai ai.

¹² Lahara kahana ai dubu maġuna e vaira henia rumana ena lababa nil kiubit hituahui. Ruma habana udunana na kiubit ima, ruma heğeğemadai ai; bona ena lata na kiubit taurahanita-ahui.

¹³ Bena ia ese dubu e hahetohoa, ena lata na kiubit sinahu-ta; bona maġu mai rumana ida edia lata na kiubit sinahu-ta; ¹⁴ bona dubu mai maġuna ida, mairiveina kahana ai, labahadia na kiubit sinahu-ta.

¹⁵ Bena ia ese mağu e vaira henia rumana, lahaha kahana ai, mai ohe kahana kahana habadia ida, e hahetohodia, latadia na kiubit sinahu-ta.

Dubu laloma kahana hona laloma daiutuna bona murimuri kahana dehena habadia ¹⁶ na mai iğovalaidia reireidia, bona toiosi heğeğemadai ai na gaba-mauru; unu gaba-maurudia ioradia na au rotonadia amo e kara. Rakavareaina hevaira-hehenina habana heğeğemadai ai na mai iğovalaina reireidia, ruma reireina amo ela bona gaba-mauru, (hari gaba-mauru na mai ikoulaidia ġaudia), ¹⁷ ma ela bona iduara daena, ma ela bona laloma daiutuna, bona murimuri ai danu. Bona haba iboudiai heğeğemadai ai, laloma daiutuna ai bona dubu ai, na laulau e koro: ¹⁸ kerubi laulaudia bona pamu audia laulaudia; kerubi padadia amo na pamu audia ta ta. Kerubi ta ta vairadia na rua rua: ¹⁹ vaira ta, taunimanima vairana na heto, ese pamu auna ta e vaira henia ohena ta ai; bona vaira ta, leona natuna vairana na heto, ese pamu auna ta e vaira henia, ohena ma ta ai. Idia na dubu idoinai heğeğemadai ai e hekoro; ²⁰ dubu reireina amo ela bona iduara daena, kerubi bona pamu audia laulaudia na haba ai e hekoro.

²¹ Dubu iduarana ihua-ihuadie na kaha haniosi heğereğere audia. Gabu helāğāna vairanai na ġau ta, ²² ita-itana na pata helāğāna, au amo e karaia ġauna; harana latana na kiubit toi, bona latana bona lababana na kiubit rua. Daigunina bona badina bona habahabana na au amo e kara. Ia ese e hamaorogu, eto, Ina na Iehova vairanai e miamu patana.

²³ Dubu bona gabu helāğāna ruaosi iduaradia

na kaha rua rua amo. ²⁴ Iduara ta ta mai kahadia rua rua, bona kaha ruaosi e helokuva bona e hulalava, iduara ta ta ai. ²⁵ Dubu iduaradia kopidia ai kerubi bona pamu audia laulaudia na e hekoro, haba ai e hekoro na heto. Bona murimuri ai dehe na mai guhina, au-reireidia amo e karaia. ²⁶ Ohe kahana kahana ai, dehe ohena habadia ai, na gaba-mauru, ioradia na au rotonadia amo e kara ġaudia; bona pamu audia laulaudia danu.

42

¹ Bena ia ese e hakaugu lao, laloma maġuna lalonai, mirigini kahana ai, ela bona dubu maġuna bona mirigini kahana rumana e vaira henidia daiutudia. ² Hari mirigini kahana rumana ena lata na kiubit sinahu-ta bona ena lababa na kiubit imahui. ³ Laloma kahana maġuna ena kiubit ruahui badibadidiai bona murimuri kahana maġuna nadi-ariarana vairanai na dehe haida e hevaira heheniva, ere toiosi ai. ⁴ Daiutu vairadiah, raka-hanai gabuna ta ese laloma kahana e lao heninya, ena lababa na kiubit gwauta bona ena lata na kiubit sinahu-ta; daiutu iduaradia na mirigini kahana ai. ⁵ Atai daiutudia na taidia i'iora, badina be idia dehedia lababadia na taidia babada a henu bona bogaragi eredia dehedia lababadia na taidia mamaraġi. ⁶ Badina be idia na ere toi ai bona asi edia au-tubua, murimuri kahana maġuna ena au-tubua heġereġeredia, una dainai atai daiutudia na taidia mamaraġi a henu bona bogaragi eredia daiutudia na taidia babada. ⁷ Murimuri ai na hehari maġuna ta, ia bona hari daiutu padadia idoinai na heġereġere. Ia na murimuri kahana

mağuna e lao heniava, bona daiutu e vaira henidiava. Ena lata na kiubit imahui. ⁸ Badina be murimuri kahana mağuna daiutudia edia lata na kiubit imahui, a dubu e vaira heniava daiutudia edia lata na kiubit sinahu-ta. ⁹ Ini daiutu henuidiai na raka-vareai gabuna ta, mairiveina kahana ai, murimuri kahana mağuna amo daiutu lalodiae raka vareaiva gabuna ai. ¹⁰ Murimuri kahana mağuna na unu amo e hematama.

Diho kahana ai danu, mağu bona ruma hegagahenina ai na daiutu haida, ¹¹ bona raka-hanai gabuna ta na idia vairadiai. Idia na mirigini kahana daiutudia heğereğeredia, edia lata bona edia lababa na unu idia ida heheğereğere; edia raka lasi gabudia bona ihaginidia daladia bona iduara danu na unu idia ida heheğereğere. ¹² Hari diho kahana daiutudia henuidiai na raka-vareai gabuna ta, mairiveina kahana ai, unuseni ai raka-hanai gabuna ai e raka vareaimu. Idia vairadiai be hehari mağuna ta.

¹³ Bena ia ese e hamaorogu, eto, Mirigini bona diho kahadia daiutudia, mağu hevaira-hehenina ai, na daiutu helagadia; hahelağɑ taudia ese Iehova bae raka henia kahi negadia ai, herahia anianidia helağɑ-hereadia na unuseni ai bae ani; unuseni ai herahia anianidia helağɑ-hereadia bae atodia - naoa boubouna, bona kara dika bona kerere iabi-ohodia bouboudia ġaudia; badina be una gabu na helağɑ. ¹⁴ Hahelağɑ taudia na gabu helağɑna ai bae raka vareai negadia ai, idia na unu amo basie raka lasi murimuri kahana mağuna ai ela bona kara helağɑdia ikaradia totona e hahedokilai dabuadria na unuseni ai bae dokidua oho bona bae atodia guna, badina be unu

dabua na hehelaga. Idia ese dabua idaudia bae dokilaidia guna, bena hanua taudia edia gabu bae raka henia kahi.

¹⁵ Ia ese dubu mağuna laloma kahana e hahetoho vaitani, bena mairiveina kahana e vaira henia ikoukouna amo e hakaugu lasi, bena dubu mağuna murimurina kahana e hahetoho heğege. ¹⁶ Mairiveina kahana na hahetoho siri-hona amo e hahetoho; ia na kiubit sinahu-ima, hahetoho siri-hona ai. ¹⁷ Bena kahana ma ela, mirigini kahana e hahetoho, kiubit sinahu-ima hahetoho siri-hona ai. ¹⁸ Ma kahana ela, diho kahana e hahetoho, kiubit sinahu-ima hahetoho siri-hona ai. ¹⁹ Ma kahana ela, lahara kahana e hahetoho, kiubit sinahu-ima hahetoho siri-hona ai. ²⁰ Ia ese kaha haniosi e hahetohodia. Magu ta ese e ġegea ahu, ena lata na kiubit sinahu-ima bona ena lababa na kiubit sinahu-ima; una mağu ese tano helağana bona tano uhuğaina e kaharuadiava.

43

Iehova hairaina ese dubu e hahonua

¹ Una murinai ia ese e hakaugu lao, mairiveina kahana e vaira henia ikoukouna ai. ² Bena Israel Diravana hairaina na itaia, mairiveina kahana amo ema. Ena mai reğena na sinavai momo reğedia na heheto; bena ia hairaina ese tanobada na e haklama-kiamaa. ³ Egu mata-hanai na hanua ihabua-tarina totona ema negana ai na mata hanailaia ġauna bona Kebara sinavaina badibadinai na mata hanailaia ġauna heğereğeredia. Bena tano ai na goru diho. ⁴ Bena Iehova hairaina na mairiveina kahana e vaira

heniava ikoukouna amo dubu ai e vareai negana ai,⁵ Lauma ese e abigu isi, laloma kahana mağuna lalonai e laohaigu; bena na itaia, Iehova hairaina ese dubu vada e hahonua.

⁶ Una tau na badibadigu ai ginina ai, lau ese gado ta na kamonai, dubu lalona amo e hereva henigu; ⁷ e hamaorogu, eto, Taunimanima natuna e, Egu terono bona ae-palapalagu imoina gabuna binai; iniseni ai baina noho hanaihanai, Israel taudia bogaragidiai. Israel besena taudia ese lau ladagu helağana basie hamiroa lou, idia bona edia pavapava edia ariara karadia amo, eiava edia pavapava tau-anidia masedia amo, ⁸ eiava edia raka-vareaina na lauegu raka-vareaina bona edia iduara ihuaihuadie na lauegu iduara ihua-ihuadie badibadidiae bae alodia, bena lau bona idia padamai ai na hehari mağuna mo baine mia dainai. Edia kara dika-rohorohodia vada e kara dainai lau ladagu helağana vada e hamiroa, taunabunai lau ese egu badu garağarana ai vada na haoredia. ⁹ Harihari edia kaivakuku itemadihohenidia bona edia pavapava tau-anidia masedia na bae negedia daure, bena lau na idia bogaragidiai baina noho hanaihanai.

Dubu bona Ihaboulaina Patana Taravatudia

¹⁰ Taunimanima nahma e, dubu ita-itana bona ilalo-hatana na Israel besena taudia ba hamaorolaidia, edia kara havara hemaraidia bae hemarai helaoreana. ¹¹ Benä edia kara iboudiae hemaraidia bema hemarai, bena dubu bona ihaero-hatana, raka-lasina bona raka-vareaina, bona oromana idoinai, ba haheitalaidia, bona ena hahedua herevadia bona ena taravatu

iboudiai ba hadibalaidia; idia vairadiai ba toreia, bena idia ese ena taravatu bona ena hahedua herevadia iboudiai na bae badinadia bona karadia bae kara. ¹² Dubu taravatuna binai ororo dorina tanona hegegemadai idoinai baine helāga herea. A itaia, dubu taravatuna bunai.

¹³ Ihaboulaina patana ihahetohona, kiubit amo e hahetoho, binai. (Ini kiubit na kiubit ta bona ima-palapala lababana ta). Ia badina hara-latana na kiubit ta, bona lababana na kiubit ta; ia na mai isena, ohena idoinai e ġeġea ahu ġauna, isena lababana na ima-kwakikwaki daġana ta heġereġerena. Ihaboulaina patana harana latana na ini baine heto: ¹⁴ badina, tano ai, amo ela bona henu digina, kiubit rua, bona lababana na kiubit tamona; bona digi maraġina amo ela bona digi badana, kiubit hani, bona lababana na kiubit tamona. ¹⁵ Ihaboulaina patana rahurahuna na kiubit hani; bona ihaboulaina patana rahurahuna amo doa hani e hagini, edia lata na kiubit tamona. ¹⁶ Hari rahurahu ena lata bona ena lababa bae heġereġere, lalana kiubit gwauta-rua bona lababana danu kiubit gwauta-rua. ¹⁷ Digina danu ena lata bona ena lababa bae heġereġere, latana kiubit gwauta-hani bona lababana kiubit gwauta-hani; isena danu baine geġea ahu, ia lababana na kiubit duduna. Bona ia badina hegegemadai ai na kiubit tamona. Ihaboulaina patana vadavadana na mairiveina kahana baine vaira henia.

¹⁸ Bena ia ese e hamaorogu, eto, Taunimanima natuna e, Ĝaubada Iehova na ini e gwau tomamu: Hahedua herevadia, ihaboulaina patana ena, bini. Ĝole-oho bouboudia na latanai bae ha-helāgadie bona rara bae nevarilaia totona bae

haginia dinana ai, ¹⁹ Levi hahelaḡa taudia, Sadok ena iduhu taudia, kara helaḡadia ikaradia totona e raka henigu kahimu taudia, na boromakau maruanena ta ba henidia, kara dika iabi-ohona boubou ġauna ai bainela. Ġaubada Iehova na e herevamu. ²⁰ Bena rarana kuri ta bavabia, ihaboulaina patana ena doa haniosi ba dahulaidia, bona digi daigunina haniosi danu, bona isena heġegemadai ai; unu amo ihaboulaina patana ba haġoевαια bona kara dika na iena amo bavabia oho. ²¹ Bena una boromakau maruanena, kara dika iabi-ohona ġauna, na bavabia, vada e gwauraia hidi gabuna ai ba haġolea oho, dubu tanona ai, to helaḡa gabuna murimurinai. ²² Bena dina iharuana ai, nani maruanena asi bebekabebekana ta ba hahelaḡa, kara dika iabi-ohona ġauna ai bainela. Unu amo ihaboulaina patana ma ba haġoевαια, boromakau maruanena amo o haġoевαια heġereġerena. ²³ Ba haġoевαια ġuġuru, bena boromakau maruanena asi bebekabebekana ta bona seri mamoe maruanena asi bebeka-bebekana ta ba hahelaḡadia. ²⁴ Iehova vairanai ba hen, bena hahelaḡa taudia ese damena na latadiai bae ġiġi, bena bae haġoledia oho, Iehova ena. ²⁵ Dina hitu lalodiae, dina ta ta ai nani maruanena ta ba hen, kara dika iabi-ohona ġauna ai bainela; bona boromakau maruanena ta bona seri mamoe maruanena ta asi bebekabebekadia, danu ba hen. ²⁶ Dina hitu lalodiae boubou karadia bae kara, dika na ihaboulaina patana amo iabi-ohona bona ihaġoевана totona; unu amo ba hahelaḡa. ²⁷ Unu dina bae haġuġurudia, bona dina ihataurahanina amo ha-

helaḡa taudia ese emui ġole-oho bouboudia bona emui maino bouboudia ġaudia na bae hahe-laḡadia, ihaboulaina patana latanai; bena lau ese baina abimui dae. Ġaubada Iehova na e herevamu.

44

Kara helagadia

¹ Bena ia ese e hakaugu lou lao, gabu helagāna murimurina kahana ikoukouna ala, mairiveina kahana e vaira heniamu ġauna. Ġauna na vada e hekou. ² Bena ia ese e hamaorogu, eto, Ina ikoukou na hekouna ai do baine mia; ta ese basine kehoa, bona ta na iena amo basine raka vareai; badina be Iehova, Israel Diravana, na iena amo vada e raka vareai, una dainai ia na hekouna ai do baine mia. ³ Hanua pavapavana sibona na ia lalonai baine helai, Iehova vairanai baine aniani totona. Ia na ikoukou dehena amo baine raka vareai, bona unu amo ma baine raka lasi.

⁴ Bena ia ese mirigini kahana ikoukouna amo e hakaugu lao, ela bona dubu vairanai a kau. Bena na roha lao, na itaia, Iehova hairaina ese Iehova ena dubu vada e hahonua; bena tano ai na goru diho. ⁵ Bena Iehova ese e hereva henigu, eto, Taunimanima natuna e, a laloa namonamo; baina hamaorolaimu ġaudia iboudiai ba itadia bona herevadia ba kamonai, Iehova ena dubu herevadia, hahedua herevadia bona taravatuna iboudiai danu. Ba laloa namonamo danu, daika daika na dubu ai bae raka vareai diba, bona daika daika na gabu helagāna lalonai basie raka vareai diba. ⁶ Bona gwau-edede besena, Israel besena, na ba hamaorodia, baoto, Ġaubada

Iehova na ini e gwau tomamu: Israel besena e, emui kara dika-rohorohodia iboudiai ba hadoko. ⁷ Idau bese taudia, lalodia asie hahelaḡadia bona tauanidia asie peritomedia taudia, na egu gabu helaḡana lalonai o harakadia vareai, bona gabu o hamiroa, agu aniani, digara bona rara, na egu ai o hahelagadiamu negadia ai. Emui kara dika-rohorohodia iboudiai latadiai danu egu taravatu itata-utuna vada o atva kau. ⁸ Egu ġau helaḡadia danu asio baladia hen, a idau bese taudia vada o duanaidia, egu ġau bae baladia hen, egu gabu helaḡana lalonai.

⁹ Taunabunai, Ġaubada Iehova na ini e gwau tomamu: Idau bese tauna ta, lalona se hahelaḡaia bona tau-anina asie peritomea tauna, idau bese taudia iboudiai Israel besena taudia padadiai e nohomu taudia ta, na egu gabu helaḡana lalonai basine raka vareai. ¹⁰ A Levi taudia ese edia dika davadia bae hua, egu amo idauhai e raka kerere dainai; idia ese lau e rakatanigu bona edia kaivakuku muridiae ela, Israel besena e raka kerere negana ai. ¹¹ Idia ese egu gabu helaḡana ġaukaradia bae kara, bona dubu ik-oukoudia bae itadia tao, bona dubu ai kara helaḡadia bae kara. Idia ese ġole-oho boubou ġauna bona taunimanima edia boubou ġaudia na bae aladia mase; taunimanima bae naridia bona isiaidia bae lao hen. ¹² Badina be idia ese kara helaḡadia e kara, edia kaivakuku vairadiae, bona kara dika-rohorohodia amo Israel besena ihahekwanaina ġauna ai ela; taunabunai Ġaubada Iehova na e gwaumu: Lau na idia latadiai vada na gwau hamata, edia dika davadia

do bae hua. ¹³ Idia ese basie raka henigu kahi, hahelaḡa karadia ai isiaigu basie lao heni; egu ġau helāḡadia bona egu ġau helāḡa-hereadìa basie raka henidìa kahi, a hemaraidìa bae hemarai, kara dika-rohorohodia vada e kara daidìai. ¹⁴ Ġau tan-onà lau ese baina duanaidìa, dubu bae naria; bona toma-dìho karadia iboudìai bona ġaukāra iboudìai ia lalonai e karamu na idia ese bae kara.

¹⁵ A Levi taudìa haida, Sadok vevena, hahelaḡa dagina e abia bena egu gabu helāḡana e nariava, Israel besena taudìa ese e rakatanigu negana ai, ese bae raka henigu lialu, bona isiaigu bae lao heni; idia na lau vairagu baema, digara bona rara bae hahelaḡadia egu. Ġaubada Iehova na e herevamu. ¹⁶ Idia danu egu gabu helāḡana lalonai bae raka vareai, bona egu pata bae raka henia kahi, isiaigu bae lao heni bona egu hahe-dua bae badinadia totona. ¹⁷ Laloma maġuna ikoukoudìa lalodìai bae raka vareai negana ai, idia ese dabua auka hahedokidia bae dokilai; In-amoe huidìa dabuadìa basie hahedohlai, laloma maġuna ikoukoudìa ai bona maġu lalonai kara helāḡadia bae kara negadia ai. ¹⁸ Kwaradìa na dabua aukadìa amo bae havavalaidìa, bona koekoedia ai dabua auka piriboudìa bae kara; varahu ihavarana ġauna ta basie dokilaia. ¹⁹ Bena murimuri maġuna ai taununanimà dekediai bae raka lasi negana ai, idia ese unu dabua, kara helāḡadia e karalai ġaudìa, na bae doki oho, daiutu helāḡadia ai bae atodia, bena dabua idau-dìa bae dokilai, edia dabua amo unu taunimanima na helāḡa siahuna bae henidìa hanai na garina. ²⁰ Kwaradìa basie naudìa, bona huidìa

basie halata; kwaradia huidia bae utu kwadogi mo. ²¹ Hahelaḡa tauna ta ese vine ranuna basine inua, laloma maḡuna ai e raka vareaimu negana ai. ²² Idia ese vabu ta eiava e diho hahinena ta na basie adavaia, a rami-hebou ulatona ta, Israel besena amo, eiava hahelaḡa tauna ta vabuna. ²³ Idia ese egu orea taudia na bae hadibadia, ġau helāḡadia bona ġau uhugaidia ede e idau tomamu; bona ġau dia gogoeva bona ġau ġoevaḡoevadia edia idau ede bae diba toma. ²⁴ Heai lalodaii idia na hahemaoro taudia ai baela; bona lauegu hahemaoro daladia amo bae hahemaoro. Egu taravatu bona egu hahedua herevadia bae badinadia, vada na gwauraidia ariadia iboudiai lalodaii; bona egu dina helāḡadia bae hahelaḡadia. ²⁵ Mase tauna iraka-kahi-henina ai sibodia basie hahemiro; ġau tamona tamadia eiava sinadia eiava natudia mamaruanedia eiava hahinedia, eiava tadikakadia eiava taihudia ulatodia daidiae sibodia bae hahemiro diba. ²⁶ Ta baine hahemiro murinai, ia sibona ese dina hitu baine hagaudia, bena ia na baine ġoeva. ²⁷ A gabu helāḡana, laloma maḡuna ai, lalonai baine raka vareai, gabu helāḡana ai kara helāḡadia baine kara totona, una dina ai ia ese ena kara dika iabi-ohona boubouna ġauna na baine hahelaḡaia. Ġaubada Iehova na e herevamu.

²⁸ Ahudia ta basie abia, badina be ahudia na lau; bona kohu ta Israel ai basio henidia, badina be edia kohu na lau. ²⁹ Flaoa boubouna bona kara dika bona kerere iabi-ohodia bouboudia ġaudia na bae ani; bona ġau helāḡadia iboudiai Israel ai na idia edia. ³⁰ Uma ġaudia roboadria idau-

idauboudiai bona emui herahia ġaudia idau-
 idau iboudiai, na hahelaġa taudia ese bae abidia
 edia; bona emui igabu roboadia danu hahelaġa
 taudia ba henidia, hahenamo na emui rum
 latadiai baine mia helaoareana. ³¹ E mase kava
 ġauna ta eiava ġau ta ese e haberoa ġauna ta, roho
 manuna eiava timo kopina ai e nohomu ġauna,
 na hahelaġa taudia ese basie ania.

45

Tano iharina bona hahetoho

¹ Tano ba haria negana ai, tano kahana ba
 gwauraia hidi Iehova ena, kaha helaġana ai
 bainela. Ena lata na kiubit gerebu rua dahanima
 bona ena lababa na kiubit gerebu rua; ia na baine
 helaġa ela bona hetoana idoinai. ² Ia lalonai gabu
 ta baine mia, dubu helaġana gabuna, ena lata
 bona ena lababa bae heġereġere, kiubit sinahu-
 ima; bona hegeġemadai ai tano taina baine mia
 ġagħae, ia lababana na kiubit imahui. ³ Hari kaha
 helaġana lalonai, tano ta ba hahetoho, ena lata
 na kiubit gerebu-rua dahanima bona ena lababa
 na kiubit gerebu-ta; ia lalonai dubu helaġana,
 helaġa herea gabuna, na baine gini. ⁴ Una tano na
 tano helaġana ai bainela; ia na hahelaġa taudia,
 dubu helaġana ai kara helaġadha e karamu bona
 Iehova isiaina ilaoħenina totona e raka henia
 kahimu taudia edia; edia rum aqabudia tanona,
 bona dubu helaġana tanona helaġana ai bainela.
⁵ Ma kaha ta, ena lata na kiubit gerebu-rua
 dahanima bona ena lababa na kiubit gerebu-ta
 na Levi taudia, dubu lalonai kara helaġadha e

karamu taudia, edia; bae ġaunaia, bae noholaidia hanuadia unuseni ai bae hadai.

6 Vada o gwauraia hidi, kaha helāgāna ai o halaoa, tanona badibadinai, hanua tanona ba duanaia, ena lababa na kiubit daha-imā bona ena lata na kiubit gerebu-rua daha-imā; ia na Israel besena idoinai ese baine ġaunaia.

7 Bena kaha helāgāna ohena ohena tanodia bona hanua ena kaha ohena ohena tanodia, la-hara kahana ai bona laurabada kahana ai, na hanua pavapavana ese baine ġaunaia, ena lata na iduhu ta ahuna ena lata heğereğerena, la-hara kahana hetoana ela bona laurabada kahana hetoana. **8** Una na ia ahuna korikorina Israel ai. Bena pavapava ai baina halaodia taudia ese egu oreá taudia na basie hahisihisidia lou; a tano na Israel besena taudia bae henidia, edia iduhu ta ta ai.

9 Ġaubada Iehova na ini e gwau tomamu: Israel pavapavadia e, vadaeni! Dağedağe bona hahehisí karadia ba negedia; hahemaoro ġoevāġoeva bona kara maoromaoro ba kara; egu oreá taudia ilululasidia ba hadokoa. Ġaubada Iehova na e herevamu.

10 Hahetoho ġaudia momokanidia bavabi, bona efa momokanina bona bata momokanina danu.

11 Efa bona bata anidia bae heğereğere; bata gwauta na homere ta heğereğerena, bona efa gwauta na homere ta heğereğerena. Hahetoho ġaudia iboudiai ibadidia na homere. **12** Sekele na gera ruahui heğereğeredia; sekele ima be sekele anidia korikoridia inta ba hení, bona sekele gwauta be sekele anidia korikoridia gwauta ba hení. Emui mina lalonai sekele bae imahui.

Boubou bona Aria

¹³ Boubou ġaudia na ini ba heni toma: uit homere ta lalona amo efa ta ba karoaia, karoa tauratoi, bena karoa ta ba heni; bona bali homere ta lalona amo efa ta ba karoaia, karoa tauratoi, bena karoa ta ba heni; ¹⁴ bona de-horo ahuna na koro ta ta lalodia amo bata ta ba karoaia, karoa gwauta, bena karoa ta ba heni. (Hari koro lalonai na bata gwauta, homere heğereğerena). ¹⁵ Bona mamoe sinahu-rua sinahu-rua amo mamoe ta ta ba heni; Israel iduhudia iboudiai ese unu bae heni toma. Boubou ġaudia bunu, flaoa bouboudia bona ġole-oho bouboudia bona maino bouboudia, edia dika iabi-ohodia ġaudia. Ġaubada Iehova na e here-vamu.* ¹⁶ Tano taudia iboudiai ese ini boubou ġaudia na Israel pavapavana bae henia. ¹⁷ Hanua pavapavana ena ġaukara korikori be ġole-oho bouboudia bona flaoa bouboudia bona inuinu bouboudia ġaudia baine heni, aria negadia ai bona hua matamatadia negadia ai bona dina helağadia ai, Israel besena ena aria korikoridia iboudiai negadia ai. Ia ese kara dika bouboudia bona flaoa bouboudia bona ġole-oho bouboudia bona maino bouboudia ġaudia baine heni, Israel besena ena kara dika iabi-ohodia ġaudia.

¹⁸ Ġaubada Iehova na ini e gwau tomamu: Hua gini-gunana dinana gini-gunana ai, boro-makau natuna maruanena asi bebeka-bebekana ta bavabia, bena gabu helağana ba hağoevaiā.
¹⁹ Hahelağā tauna ese kara dika iabi-ohona

* **45:15:** Efa; bata; homere; sekele; gera; mina; koro. Ini na Heberu taudia edia hahetoho ġaudia haida ladadia.

boubou ġauna rarana kuri ta baine abia, dubu iduaradia ihua-ihuadie bona ihaboulaina patana isena daigunina haniosi bona laloma maġuna ik-oukouna audia baine dahulaidia. ²⁰ Hua dinana ihahituna ai danu unu ba kara toma, kara-rea eiava mata-lahui dainai vada e kara dika tauna bagunai; unu amo dubu ba haġoevaia.

²¹ Hua gini-gunana dinana ihag vauta-hanina ai, lagau-hanai ariana ba karaia; dina hitu lalod-diai asie hatubua flaoana bae ania. ²² Una dina ai, hanua pavapavana ese boromakau natuna maruanena ta baine hen, dika iabi-ohona boubouna ġauna, ia bona tano taudia iboudiai daidiae. ²³ Bona aria dinadia hituosi lalodiai ia ese boromakau natudia mamaruanedia hitu bona mamoe mamaruanedia asi bebeka-bebekadia hitu baine hen, Iehova ena, unu dina ta ta ai, ġole-oho boubou ġaudia; bona nani maruanena ta, unu dina ta ta ai, dika iabi-ohona boubouna ġaudia. ²⁴ Ia ese danu flaoa boubouna baine hen, efa ta ta boromakau mamaruanedia ta ta edia, bona efa ta ta mamoe mamaruanedia ta ta edia, bona dehoro hini† ta ta efa ta ta ida. ²⁵ Hua ihahituna dinana ihagwauta-imana ai, bona aria dinadia hituosi lalodiai, ia ese unu heġereġeredia ma baine hen, dika iabi-ohona bouboudia bona ġole-oho bouboudia bona naoa bouboudia ġaudia, bona dehoro danu.

46

¹ Ġaubada Iehova na ini e gwau tomamu: Laloma maġuna ikoukouna, mairiveina kahana e

† **45:24:** “Efa” bona “hini” na Heberu taudia edia hahetoho ġaudia ladadia.

vaira heniamu ġauna, na baine hekou, ġaukara dinadia tauratoiosi lalodai; a dina helaġa ai bona hua matamatana dinana ai vada bae ke-hoa. ² Hanua pavapavana na murimuri kahana amo baine raka vareai, ikoukou dehena ai; bena ikoukou auna badibadinai baine gini. Bena hahelaġa taudia ese ena ġole-oho boubouna bona ena maino bouboudia ġaudia na bae ha-helaġadıa; bena ia na ikoukou raka-vareaina ai baine toma diho. Bena ia na baine raka lasi, a ikoukou na basie koua ela bona dina baine diho. ³ Tano taudia na Iehova vairanai bae toma diho, una ikoukou raka-vareaina ai dina helaġadıa ai bona hua matamata dinadia ai. ⁴ Ġole-oho boubouna, hanua pavapavana ese dina helaġa ai Iehova baine henia ġauna, na mamoe natudia asi bebeka-bebekadia tauratoi, bona mamoe maruanena asi bebekabebekana ta. ⁵ Flaoa boubouna mamoe maruanena ida baine heni ġauna na efa ta, bona flaoa boubouna ġaudia mamoe natudia ida na ena goada heġereġerena ai baine hen; flaoa efadia ta ta ida dehoro hini ta ta baine hen danu. ⁶ Hua matamata dinana ai, ia ese boromakau natuna maruanena asi bebekabebekana ta, bona mamoe natudia tauratoi bona mamoe maruanena ta, asi bebeka-bebekadia, na baine hen. ⁷ Ena ilaoa bouboudia na boromakau maruanena ida efa ta bona mamoe maruanena ida efa ta, bona mamoe natudia ida ena goada heġereġerena ai baine hen; flaoa efadia ta ta ida dehoro hini ta ta baine hen. ⁸ Hanua pavapavana baine raka vareai negana ai, ia na ikoukou dehena amo baine raka vareai, bona unu amo ma baine raka lasi.

⁹ E gwaurai ariadia daidiae tano taudia na

Iehova vairanai baema negadia ai, mirigini kahana ikoukouna amo toma-dihō totona baine raka vareai tauna na diho kahana ikoukouna amo baine raka lasi; bona diho kahana ikoukouna amo baine raka vareai tauna na mirigini kahana ikoukouna amo baine raka lasi; asi tauna ta ese e raka vareai ikoukouna amo ma baine raka lasi; a ta ta na bae raka vairai, bena bae raka lasi. ¹⁰ Bae raka vareai negana ai, hanua pavapavana na idia ida baine raka vareai; bona bae raka lasi negana ai, ia danu baine raka lasi.

¹¹ Aria negadia ai bona e gwaurai negadia ai, flaoa boubouna boromakau natuna maruanena ida bae henī ġauna na efa ta; bona mamoe maruanena ta ida danu efa ta; a mamoe natudia ida ihenina tauna ena goada heğereğerenā ai baine henī. Eta ta ta ida dehoro hini ta ta bae henī. ¹² tlanua pavapavana ese ena ura-kwalimu ai boubou ġauna bema henī, ġole-oho boubouna eiava maino bouboudia, ena ura-kwalimu ġauna Iehova ena; bena baine henī negana ai mairiveina kahana e vaira heniamu ikoukouna na bae kehoa iena. Bena ia ese ena ġole-oho boubouna eiava ena maino bouboudia ġaudia baine henī, dina helāga ai heğereğerenā. Bena ia na baine raka lasi; bena baine raka lasi murinai ikoukou na bae koua.

¹³ Dina ta ta amo ia ese mamoe natuna ta, laġani tamona ġauna asi bebeka-bebekana, baine henī, ġole-oho boubouna ai bainela, Iehova ena; daba daba iboudiai ia ese baine henī. ¹⁴ Daba ta ta amo danu ia ese flaoa boubouna baine henī; efa ta baine karoaia, karoa tauratoi, bena karoa ta baine henī, bona dehoro hini ta baine karoaia, karoa toi, bena karoa ta baine henī,

flaoa ikuilaina; una na flaoa boubouna ai bainela, Iehova ena. Ğole-oho bouhouna, bae hení loulou ġauna, haheğanina bunai. ¹⁵ Taunabunai, mamoe natuna bona flaoa boubouna bona dehoro na daba daba iboudiai bae hení, ġole-oho boubouna, bae hení loulou ġauna, ai bainela.

¹⁶ Ğaubada Iehova na ini e gwau tomamu: Bema hanua pavapavana ese harihari ġauna na ia ahuna amo natuna haida baine henidia, unu natuna ese bae abia, bae ġaunai, ahudia korikoridia ai baela. ¹⁷ A bema ia ese harihari ġauna na ia ahuna amo ena hesiai taudia ta baine henia, una tau ese baine abia, ela bona heruha-nege lağanina; una negana ai hanua pavapavana ese baine abia lou. Ia natuna mo sibodia ese harihari ġauna ta ia ahuna amo na bae dogoa tao diba. ¹⁸ Hanua pavapavana ese ena orea taudia ahudia taina basine abia diba, ahudia amo basine luludia lasi; ia ese natuna ahudia baine henidia, ia sibona ahuna amo, taunabunai egu orea taudia ta ena ġau basine heabi oho.

¹⁹ Bena ia ese ikoukou badina iduarana amo e hakaugu hanai, ela bona hahelağtaudia edia daiutu helağadia mirigin kahana erena; bena una ere dokodokona ai, lahara kahana ai, gabu ta na itaia. ²⁰ Bena ia ese e hamaorogu, eto, Gabuna binai hahelağtaudia ese kerere bona kara dikia iabi-ohodia bouboudia ġaudia na bae nadudia, bona flaoa bouboudia ġaudia na bae gabudia; murimuri kahana mağuna ai basie lasilaidia, tau-nimanima na helağtaudia siahuna bae henidia hanai na garina.

²¹ Bena ia ese e hakaugu lasi, murimuri kahana

mağuna ala, bena e hakaugu lao, mağu daigunina haniosi a lao hen; mağu daigunina ta ta na mai mağumağudia. ²² Mağu daigunina haniosi na mai mağumağudia, edia lata na kiubit hari-ahui bona edia lababa na kiubit toi-ahui; haniosi edia bada na heğereğere. ²³ Laloma kahadia ai, hari mağumağu haniosi hegegemadai ai, na nadi palakadia ere ta, bona unu ere henudiae na rahurahu. ²⁴ Bena ia ese e hamaorogu, eto, Nanadu gabudia bini, kara helagadia dubu ai e karamu taudia ese taunimanima edia boubou ġaudia na iniseni ai bae nadu.

47

Dubu ranudia

¹ Bena ia ese e hakaugu lou, dubu iduarana ai; bena na itaia, ranu na dubu raka-vareaina henuna amo e lasiva, mairiveina kahana ai, (badina be dubu na mairiveina kahana e vaira henia); bona dubu raka-vareaina diho kahana henuna amo danu ranu e lasiva, ihaboulaina patana diho kahana ai. ² Bena ia ese mirigini kahana ikoukouna amo e hakaugu lasi, murimuri kahana ai e hakaugu heğege ela bona murimuri kahana ikoukouna, mairiveina kahana e vaira heniamu ġauna; ranu na diho kahana amo e lasiva.

³ Mairiveina kahana ma ala; ia na mai ena hahetoho varona imana ai, bena kiubit dahan-ta e hahetohodia, bena ranu amo e hakaugu hanai; aemai ganaganadia ai e raro. ⁴ Ma kiubit dahan-ta e hahetohodia, bena ranu amo ma e hakaugu hanai; tuimai ai e raro. Ma kiubit dahan-ta e hahetohodia, bena ranu amo ma e hakaugu

hanai; koekoemai ai e raro. ⁵ Ma kiubit daha-ta e hahetohodia, bena ranu na vada sinavai ta; asi turu-hanai dibagu, badina be ranu vada e dae; vada e dobu, nahu heğereğerenə, ta basinema turu hanai diba. ⁶ Bena ia ese e nanadaigu, eto, Taunimanima natuna e, ina na vada o itaia a?

Bena e hakaugu riri lou, sinavai isena amo. ⁷ Lougu ai, au momo herea na itadia sinavai isena kahana kahana ai. ⁸ Bena ia ese e hamaorogu, eto, Ina ranu na mairiveina kahana e aru e laomu, Araba kourana ai e dihomu; bena gohu ai e aru lasimu negana ai, gohu na e negarimu. ⁹ Bena sinavai na e aru e laomu gabudia iboudiai, mauri ġaudia na bae vara heğīgi oda-oda, bona gwarume danu seridia seridia. Badina be ina ranu na e aru e laomu, gohu baine hanegaria; taunabunai sinavai na e aru e laomu gabudia ai, ġau iboudiai na bae mauri daehai daehai. ¹⁰ Haoda taudia na gohu badinai bae gini; Engedi amo ela bona En-eglaimi edia reke bae tore; gwarumena bae idau-idau, Davara Badana gwarumedia heğereğeredia. ¹¹ A gohugohuna bona laguta-lagutana na basie negari; bae mia, damena gabudia. ¹² Sinavai isena kahana kahana ai huahua audia idau-idau iboudiai bae vara. Idia raudia basie marai, bona huahuadıa basie hehuhu, a hua ta ta amo huahuadıa bae dobi, badina be ihapariparidıa ranudıa na gabu heläġana amo e aru e laomu. Huahuadıa na aniani ġaudia bona raudia na hahemauri ġaudia ai baela.

Tano Hetoadia

¹³ Čaubada Iehova na ini e gwau tomamu: Tano hetoadia bini: tano na ba haria, Israel iduhudia gwauta-ruaosi ese ahudia bae abi, a Iosef na ahu rua baine abi. ¹⁴ Ba haria, ahu iboudiai bae hegeregere; na gwau hamata senemui baina henidia nato; ina tano na ahumui korikori ai bainela.

¹⁵ Tano hetoana binai: mirigini kahana ai, Davara Badana amo baine hematama, bena Hetelono amo bainela ela bona Hamat raka-vareaina, bena Sedad ¹⁶ bona Berota bona Sibiraimi amo (una Sibiraimi na Damasko bona Hamat hetoadia ai) ela bona Hasere-hatikono, Haurana hetoana ai. ¹⁷ Unu amo hetoa na davara amo bainela ela bona Hasara-enono, Damasko mirigini kahana hetoana ai. Hamat hetoana danu na ia miriginina kahana ai. Mirigini kahana hetoana bunai.

¹⁸ Laurabada kahana ai, hetoa na Hasara-enono amo baine hematama, Haurana bona Damasko padadia amo bainela; bena Ioridane sinavaina amo bainela, Gilead bona Israel tandodia padadia amo, ela bona laurabada kahana davarana, ela bona Tamara. Laurabada kahana hetoana bunai.

¹⁹ Diho kahana ai, hetoa na Tamara amo baine hematama, bainela ela bona Meribata-kade ranu gabudia, bena Aigupto Dokana amo bainela, ela bona Davara Badana. Diho kahana hetoana bunai.

²⁰ Lahara kahana ai, hetoa na Davara Badana, ela bona Hamat rakavareaina hevaira-hehenina. Lahara kahana hetoana bunai.

²¹ Ina tano na unu ba haria toma, Israel iduhudia hegeregredia. ²² Ahumui ba duanaidia,

umul emui bona idau taudia, bogaragimui ai e nohomu bona natudia na bogaragimui ai vada e havaradia taudia. Idia na Israel memerodia korikoridia heğereğeredia ai baela umui emui ai; umui ida ahumui ba duanaidia Israel iduhudia bogaragidiai. ²³ Edena iduhu ai idau tauna na e nohomu, unuseni ai ia ahuna ba henia. Ğaubada Iehova na e herevamu.

48

¹ Iduhu ladadia bini. Mirigini kahana hetoana na davara amo baine hematama, Hetelono amo bainela ela bona Hamat raka-vareaina, ela bona Hasara-enono (una na Damasko mirigini kahana hetoana, Hamat hevaira-hehenina ai), laurabada kahana amo ela bona lahara kahana: una na Dan ahuna, ahu ta. ² Dan ena tano ohena ai, laurabada kahana ela bona lahara kahana, Asere ahuna, ahu ta. ³ Asere ena tano ohena ai, laurabada kahana ela bona lahara kahana, Napatali ahuna, ahu ta. ⁴ Napatali ena tano ohena ai, laurabada kahana ela bona lahara kahana, Manase ahuna, ahu ta. ⁵ Manase ena tano ohena ai, laurabada kahana ela bona lahara kahana, Efraim ahuna, ahu ta. ⁶ Efraim ena tano ohena ai, laurabada kahana ela bona lahara kahana, Ruben ahuna, ahu ta. ⁷ Ruben ena tano ohena ai, laurabada kahana ela bona lahara kahana, Iuda ahuna, ahu ta.

⁸ Iuda ena tano ohena ai, laurabada kahana ela bona lahara kahana, tano ta ba gwauraia hidi. Ena lababa na kiubit gerebu-rua daha-ima, ena lata na unu iduhu ahudia ta heğereğerena, laurabada kahana ela bona lahara kahana; ia bogaraginai na gabu helağana. ⁹ Iehova ena ba gwau-

raia hidi tanona ena lata na kiubit gerebu-rua
daha-ima, bona ena lababa na kiubit gerebu-rua.
10 Tano helağana inogodia bini: hahelağā taudia
edia inogo ena lata na kiubit gerebu-rua daha-
ima muringini kahana ai, ena lababa na kiubit
gerebu-ta laharā kahana ai bona kiubit gerebu-
ta laurabada kahana ai, bona ena lata na kiubit
gerebu-rua daha-ima diho kahana ai. Iehova en:
gabu helağana na ia bogaraginai. **11** Una na vada
e hahelağā taudia, Sadok vevena, edia; idia ese
egu hahedua e badinadiava, bona Israel taudia
e raka siri negana ai idia na asie raka siri, hari
Levi taudia e raka siri na heto. **12** Idia ahudia
korikorina ai bainela, tano helağana lalonai, gabu
helağā-hereāna ai bainela, Levi taudia edia tano
ohena ai. **13** Hahelağā taudia edia tano ohena
ai, Levi taudia ese edia inogo bae abia; ena lata
na kiubit gerebu-rua daha-ima bona ena lababa
na kiubit gerebu-ta. Latana idoinai na kiubit
gerebu-rua daha-ima, bona lababana idoinai na
kiubit gerebu-rua. **14** Taina basie hoia, eiava basie
hebodohilaia. Ina ahu namohereana tanona na
haida basie henidia, badina be ia na helağā,
Iehova ena.

15 Orena miana, ena lababa na kiubit daha-
ima bona ena lata na kiubit gerebu-rua daha-
ima, na hanua ena, ruma bona gabiruma tan-
odia. Ilanua badana na bogaraginai baine gini.
16 Ena bada be iniheto: mirigini kahana, kiubit
daha-hani sinahu-ima; diho kahana, kiubit dahan-
i sinahu-ima; laurabada kahana, kiubit dahan-
i sinahu-ima, bona laharā kahana, kiubit
daha-hani sinahu-ima. **17** Hanua ena gabiruma

tanona danu baine mia: mirigini kahana ai, kiubit sinahu-rua imahui; diho kahana ai, kiubit sinahu-rua imahui; laurabada kahana ai, kiubit sinahu-rua imahui; bona lahara kahana ai, kiubit sinahu-rua imahui. ¹⁸ Orena miana ena lata tano helağāna ohena ai na kiubit gerebu-ta laurabada kahana ai bona kiubit gerebu-ta lahara kahana ai, tano helağāna ohena ai. Una tano huahuana na hanua ena ġaukara taudia adia aniani. ¹⁹ Hanua ena ġaukara taudia, Israel iduhudia iboudiai amo, ese bae biru henia. ²⁰ Ba gwauraia hidi, tano idoinai ena lata bona ena lababa bae heğereğere, kiubit gerebu-rua dahanima; una na tano helağāna bona hanua tanona.

²¹ Tano orena, tano helağāna bona hanua tanona ohena ohena ai, na hanua pavapavana ena. Tano helağāna ena kiubit gerebu-rua dahanima amo ela bona laurabada kahana hetoana, bona lahara kahana ai hari kiubit gerebu-rua dahanima amo ela bona lahara kahana hetoana, na hanua pavapavana ena tano. Una tano bona iduhu ta ta ahudia padadia na basie maraġi bona basie bada edia lata idoinai. Tano helağāna bona dubu helağāna ia bogaraginai danu, ²² bona Levi taudia edia tano bona hanua tanona, na hanua pavapavana ena tano bogaraginai bae mia. Hanua pavapavana ahuna na Iuda ena tano bona Beniamina ena tano padadiai baine mia.

²³ Iduhu oredia na iniheto: laurabada kahana amo ela bona lahara kahana, Beniamina ahuna, ahu ta. ²⁴ Beniamina ena tano ohena ai, laurabada kahana amo ela bona lahara kahana, Simeon ahuna, ahu ta. ²⁵ Simeon ena tano ohena ai, laurabada kahana amo ela bona lahara ka-

hana, Isakara ahuna, ahu ta. ²⁶ Isakara ena tano ohena ai, laurabada kahana amo ela bona lahara kahana, Sebulun ahuna, ahu ta. ²⁷ Sebulun ena tano ohena ai, laurabada kahana amo ela bona lahara kahana, Gad ahuna, ahu ta. ²⁸ Gad ena tano ohena ai, diho kahana ai, hetoa na Tamara amo bainela, ela bona Meribatakade ranu gabudia bena Aigupto Dokana amo bainela, ela bona Davara Badana. ²⁹ Tanona bunai ba haria, Israel iduhudia ahudia ba henidia; ahudia ta ta bunu. Gaubada Iehova na e herevamu.

Hanua ikoukouna bona ladana

³⁰ Hanua lalona amo bae raka lasi gabudia bini: Mirigini kahana ai (ena lata na kiubit daha-hani sinahu-imma), ³¹ ikoukou toi bae mia, Ruben ena ikoukou, Iuda ena ikoukou, bona Levi ena ikoukou. Hanua ikoukoudia na Israel iduhudia ladadia bae nemaidia. ³² Laurabada kahana ai (ia danu ena lata na kiubit daha-hani sinahu-imma), ikoukou toi bae mia, Iosef ena ikoukou, Beniamina ena ikoukou, bona Dan ena ikoukou. ³³ Dih kahana ai (ia danu ena lata na kiubit daha-hani sinahu-imma), ikoukou toi bae mia, Simeon ena ikoukou, Isakara ena ikoukou, bona Sebulun ena ikoukou. ³⁴ Lahara kahana ai (ia danu ena lata na kiubit daha-hani sinahu-imma) ikoukou toi bae mia, Gad ena ikoukou, Asere ena ikoukou, bona Napatali ena ikoukou. ³⁵ Hanua na bae hahetoho hegege na kiubit gerebu-ta daha-taurahani. Bona una negana amo hanua ladana bae hatoa “Iehova ena noho gabuna”.

**Buk Baibel long tokples Motu
The Holy Bible in the Motu language of Papua New
Guinea
Buk Baibel long tokples Motu long Nuigini**

Copyright © 1959-1973 Bible Society of Papua New Guinea

Language: Motu

Translation by: Bible Society of Papua New Guinea

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-12-09

PDF generated using Haiola and XeLaTeX on 11 Nov 2022 from source files dated 9 Oct 2020

f540ed61-0b88-5365-8502-08ea44547ef2